

كيرلس بهجت

Telegram:@mbooks90

المدخل لفهم

سيكولوجية

الإنسان

الدكتور زكي

الوطن للنشر والتوزيع

الوطن

للتشرُّف والتوزيع



اسم الكاتب كيرلس بهجت

رقم الإيداع 2021 / 15628

الترقيم الدولي 978-977-85919-6-5

الطبعة الأولى

تصميم الغلاف إسلام جاويش

التدقيق اللغوي محمود سلام أبو مالك

المدير العام خالد ناصف

0100 018 8557

alwatanpublishinghouse@gmail.com

FB.com/alwatanpub

35 شارع أحمد ذكي المعادي - القاهرة

جميع حقوق الطبع والنسخ والترجمة
محفوظة لدار الوطن للنشر والتوزيع، حسب
قوانين الملكية الفكرية، ولا يجوز نسخ
أو طبع أو اقتزاء أو إعادة نشر أية معلومات
أو صور من هذا الكتاب إلا بإذن خططي من الناشر

كل الحقوق
محفوظة

«أصفح عن الآخرين ولكن لا أنسى كي لا أجرح مرة أخرى، الصفح يغير وجهات النظر، بينما النسيان يفقدك الدرس».

باولو كويلو.

الإهداء

مش حاسس إنني عاوز أهدي الكتاب دا لأي حد غير نفسي.. آه فيه ناس جميلة
حوالئ تستحق كل الشكر والعرفان اللي في الدنيا بس مش عيب لما أهديتني
حاجة نفسي فيها وخصوصاً إنني مش باهديها كأس العالم.. دا كتاب عن الإنسان
المهزاً.

၁၁။

م

5

مقياس عبشي اخترعثه لقياس مدى هزوجية الإنسان المهزأ.. من خلال تجميع نقاط سلوكياته المهزأة.

السلوكيات بحيث كل إجابة بـ (نعم) تعتبر بـ (نقطة) :

- أوقات كتير بتقول «أيوه» وانت عاوز تقول «لا».
 - بتتألم بالعافية على أوضاع ما تليقش بيك وتقنع نفسك إنها حتتغير قدام.
 - بتقارن نفسك بناس تانية حياطهم واختياراتهم وأحلامهم مش بتاعتكم وبتتأثر قوي لو حسيتهم مبسوطين أو ناجحين!
 - بتحس بأسف دايماً تجاه مشاعرك الحقيقية.
 - بتقول «لا ما فيش حاجة» وانت الموضوع بالنسبة لك يعتبر «كل حاجة».
 - بتتعمد تتجاهل أي كلام حلو بيجي لك وحساس دايماً إنك ما تستحقهوش.
 - بتخجل من تلقاءتك وممكّن تعاقب نفسك عليها!
 - مش بتقبل أي نقد، ولو حسيت إنك غلطت بتتعصب على اللي حواليك وتتعتمد تقل منهم!
 - بتجري ورا ناس مش عاوزاك.
 - دايماً مجرور للماضي ومش عارف تركز مع مستقبلك.

طريقة الحساب:

أقل من (٢) نقطة أو (٢) = قشطة، إنت مش مهزاً.

أكتر من (٢) نقطه، لكن أقل من (٥) = ممهم، بص إنت مش مهزأ بس ممكن
الظروف تدوس عليك جامد فتتقلب!

(٥) نقط، لكن أقل من (٨) = صديقي، الوضع خطير! لا ما ينفعش الكلام دا.

(٨) نقط او اڪتر = ايه یا اسٹي؟! دا انت متکھرت خالص!

المقدمة

هي مهزاً ولا مهزق؟

الموضوع بيبتدي سنة ٢٠١٢، لما وقعت تحت إيدي مقوله عجبتني لكاتب روسي اسمه (تشيخوف)، المقوله كانت:

«إذا رسخت فكرة في ذهن إنسان عجزت الحجج جميعها عن إقناعه بالعدول عنها».

المقوله دي كانت بداية معرفتي بالمفكر الروسي الكبير (أنطون تشيخوف)، تشيخوف كان دكتور وفي نفس الوقت كان كاتب وفيلسوف عظيم، ساعتها ابتدت أقرأ أكثر عنه وعن أعماله واللي لمستني واحدة من أجمل قصصه القصيرة بعنوان (المغفلة)، كانت قصة (المغفلة) بتتكلم عن واحد جاي يحاسب الشغالة اللي عنده في البيت واللي بيستخدم معاهها أسلوب الترهيب والعنف في الكلام، فمثلاً يقول لها احنا كنا متفقين نديك في الشهر ٣٠ روبيل، تقول له «لا، ٤٠ روبيل»، فيزعق لها! فتكش وتتوافق على كلامه لغاية ما ادأها حوالي ٥ روبيل! واللي وصل معاهها في آخر القصة للحوار دا:

«سألت الخادمة: شكرًا على ماذا؟

قالت: على النقود.

قلت: يا للشيطان! ولكنني نهبتك.. سلبتك! لقد سرقت منك! فعلام تقولين شكرًا؟

قالت: في أماكن أخرى لم يعطوني شيئاً.

قلت: لم يعطوك؟ أليس هذا غريباً؟ لقد مزحْتُ معك، لقنتك درساً قاسيَا سأعطيك نقودك (الثمانين روبيلاً) كلها، ها هي في المظروف جهزتها لك! ولكن هل يمكن أن تكوني عاجزة إلى هذه الدرجة؟ لماذا لا تتحتجين؟ لماذا تسكتين؟ هل يمكن في هذه الدنيا ألا تكوني حادة الأنیاب؟ هل يمكن أن تكوني مغفلة إلى هذه الدرجة؟

ابتسمت بعجز فقرأت على وجهها: «يمكن».

سألتها الصفح عن هذا الدرس القاسي وسلمتها المبلغ (الثمانين روبيلاً) كاملاً، فشكرتني بخجل وخرجت.

تطلعت في أثراها وفكّرت: ما أبغى أن تكون ضعيفاً في هذه الدنيا!».

طبعاً القصة فيها تفاصيل كتير جميلة لازم الواحد بنفسه يقرأها، بس من ساعتها وانا بافكر ايه اللي يصل إنسان انه يبقى كدا؟! مغفل؟! ضعيف؟! سلبي؟! وحاولت أجمع كل الصفات دي في كلمة مصرية عامية وهي «المهزا». فالشخصية المهزأة

الل蜚ظ الأصح هو المهزأ مش المهزق، ودا عشان جاية من فعل الاستهزاء، إن الإنسان بسماح منه بيقبل إن الآخر يستهزاً بحدوده وحقوقه وكيانه. في الكتاب دا باحاول بمقالات مختلفة أفهم دماغ الكائن دا وخصوصاً إني ساعات باحس إن كلنا الكائن دا، فغصب عن الإنسان ساعات بيقع في لحظات ضعف أو يحس انه مش قادر يحمي نفسه، واللي ساعتها مش المفروض رد فعل يبقي توتر وغضب أو استنكار لحالة الضعف دي، إنما المطلوب فعلًا محاولة فهم وتحليل. فللأسف، شريحة كبيرة حتتضايق من لفظ «مهزأ» وتهاجم فكرة إن الإنسان الطيب اللي على نياته يتقال عليه كدا، بس اللي ححاول أوصل له في الكتاب دا إن فيه فرق شاسع بين الإنسان الطيب والإنسان المهزأ. فالطيبة عمرها ما كانت مجرد بس سلوك، إنما جوهر إنساني نقى، لازم له وعي حر وضمير شجاع، قدرة حقيقة على تحقيق كيان الإنسان واختياراته. فالطيبة اللي تتولد من رحم الضعف والعجز دي مش طيبة، إنما خوف وذل، طيبة مزيفة، طيبة مهزأة!

فالشاعر «تشيزاري بافيزي» بيقول:
Telegram:@mbooks90

«الطيبة التي تنشأ من واقع أن المرء منهك من المعاناة، هي أكثر فضاعة من المعاناة نفسها».

فالمهما مش طيب إنما هو انسان شرير، بس شرير على الكائن الوحيد اللي يقدر عليه: نفسه.

اللى مش مهزاً

عشان نفهم ازاي الإنسان بيتحول لكائن مهزأ، لازم نفهم اللي مش مهزأ، فالشخصية المهزأة في مقابلها الشخصية الحازمة، اللي بترفض أي محاولة استهzaء بحدودها، حقوقها، كيانها وكرامتها، الشخصية الـ **Assertive**.

للأسف فيه اعتقاد خاطئ إن الحزم بيتناقض مع رقة وطيبة الإنسان، والحقيقة إن مش بس ما فيش تناقض لا دا الحزم هو اللي بيبرز رقة ونبيل الإنسان، فالإنسان المتساهل أو المترaxi بيقتل أي صفات جميلة جواه، بيكون شخص منزوع الإرادة وشخص مش قادر يرسم حدود شخصيته، أي فعل طيب بيعمله بيختفي تحت عجزه الشديد إنه يكون محدد أو واضح، فاللي عكس الرقة هي القسوة، واللي مختلف تماما عن الحزم! بس في مجتمع منتشر فيه الجهل التربوي، مجتمع قائم

على النفاق والرياء بيدفع أفراده للجبن والتهاون في حقوقهم، لازم يتم تشويه أي إنسان حازم، صارم قصاد أي حاجة تعتدي على وجوده ومبادئه، إنه فظ، إنه عنيف، إنه قاسي.

من المسميات الشعبية للشخصية التقيلة Assertive، هي الشخصية التقيلة.

وفي وجهة نظري، أعتقد لفظ «الشخصية التقيلة» أو مصطلح «الواد التقيل» أو «اتقل تاخد حاجة نضيفة»، كل دا نابع من ربط رصانة ونضوج الشخصية بفكرة «الثقل» واللي يعكس صعوبة تحريك أصحاب الشخصية دي أو تحركهم عند الشديد القوي على عكس الشخصية المهزأة الخفيفة! فالناس دي متعرفش تاخد منهم أي رد فعل أهوج وقتني أو تجاوب انفعالي فوري غير محسوب، إنما مهما كانوا جوا طواحين وصراعات بيقدروا يظهروا بمظهر جبال هادية مش بسهولة شوية هوا انفعالي يأثر فيهم! فالصورة لازم توضحلهم بكل تفاصيلها وبعد كدا يكون رد الفعل في شكله القاطع الحاسم مفهوش شك او اهتزاز، رد فعل واضح ومحدد، معبر عنهم وعن حقيقتهم مفهوش قيل وقال!

وعشان كدة نضوج الإنسان مرهون باستيعابه النقطة دي إنه مش لازم يبقى دائياً له رد فعل في كل حاجة بتحصل حواليه، مش مطلوب منه يبقى سريع في استنتاجاته أو خفيف في أفكاره، مش من الحكم أو القوة خالص إنه يقعد يتنطط أو يهدى ويظهر بشكل استفزازي دسم في صباح مشهد! إنما السيطرة دائياً في التقل،

فالfilisوف الصيني «صن تزو» مؤلف كتاب (فن الحرب) بيقول:

«الخبير بالقتال يحرك عدوه، ولا يسمح للعدو أن يحركه».

طب ليه فيه مهذّبين ومش مهذّبين؟

فيه في علم النفس فرع مهم جداً اسمه الـ Behaviorism (السلوكية) والتي بتتكلم عن ازاي الإنسان بيقي سلوكه بالشكل اللي عليه، يعني مثلاً:

مروان وكريم أصحاب في المدرسة وبالرغم من إنهم اكتر اتنين أصحاب بعض في الفصل، بس شخصية مروان مختلفة جامد عن شخصية كريم، فمثلاً كريم شخص بيحب يتعرف على ناس جديدة ولما المدرس يسأل على طول يبقي أول واحد يرفع إيه يجاوب، حتى ولو مش متأكد من الإجابة، كريم كل المدرسة بتحب تتعامل معاه وجدع جداً مع أي حد، ما فيش أي طلاب بيعرفوا يرخصوا عليه، حتى اللي أكبر منه في السن! بيقلقوا منه عشان عارفين إنه مش بيسيب حقه بسهولة، على عكس مروان! مروان في حاله دائماً، مش بيtalk كثير ويا دوب تخلص الحصص يجري علي البيت، فيه طلاب كثير بترخم عليه بس هو بيعدني أي

موقف، دايماً تحسه مسکوف أو وشه في الأرض، مع انه ولد مؤدب جداً ومش بتاع مشاكل.

ويبقى السؤال ليه شخصية كريم بتاعة كريم؟! وشخصية مروان بتاعة مروان؟!
ال Behaviorism (السلوكية) بتحاول توصلنا للإجابة وصعب جدًا تتلخص في كتاب خصوصاً لو اسمه (المدخل لفهم سيكولوجية الإنسان المهزأ)! بس بالملخص المفيد في عناصر كتير بتدخل مع بعض عشان تعمل شخصيات البشر اللي يعتبر أهتمهم:

- الجينات.
 - التربية.
 - البيئة والمتغيرات الاجتماعية.

لغاية وقت قريب ما كانش حد ممكن يصدق إن سلوك الشخصية ممكن يبقى بيتوثر زي لون الشعر أو شكل المناخير، بس العلم بيقول لنا إن الجينات بتلعب دور مهم في تكوين شخصية البشر، فممكן تلاقي واحد أبوه بشخصية معينة هو طالع زيه، فممكnen للأسف الشخصيات المهزأة يكون الوراثة عامل قوى في صنعها.

التربية والمتغيرات الاجتماعية والبيئية عامل مهم جداً جداً في صنع شخصية الإنسان! لك أن تخيل إن مروان وهو بيتربي أهله حشوا دماغه بأفكار كلها عجز وفشل، أفكار صنعت منه كائن مهزأً مش قادر يحمي كيانه وحدوده! على عكس كريم اللي اتربي على قناعات رسخت جواه مفهوم الشخصية القوية، فمثلاً:

المدونة Denise Witmer واللي مشهورة بمقالاتها في مجال علم النفس التربوي، ليها مقال بعنوان Why Teens Need Privacy From Their Parents (ليه الشباب محتاجين الخصوصية من أهاليهم؟) بتتكلم فيه إن ازاي حاجة زي مثلاً (إنك تخبط علي باب أوضة ابنك قبل ما تفتح الباب عليه) بتربيري جواه نقطة احترامه لحدوده وحقوقه! ... فقيس على السلوكيات دي كتير.

حاجة كمان مشهورة قوي في مجتمعات العالم الثالث بالنسبة ل التربية للأطفال وهي نظرية الشبشب! فكرة إنك تربى ابنك أو بنتك على مبدأ الخوف المستمر، فيبقى أي اختلاف على المسار اللي انت راسمه ليهم بيكون نتيجته العقاب المتمثل في الخزانة، الخرطوم، الشبشب! ودا طبعاً بيأسس لشخص حاسس دايماً انه لو طلع برا المعتاد حيتعاقب، لو عمل غير اللي متوقع انه يعمله حبيقى مستحق الأذى! ما عندوش فلسفة الدفاع عن نفسه أو عن اختياراته.. لأن دا لو اعترض على شكل العقاب أو حب يفسر وجهاً نظره، حياخد أكثر بالشبشب!

ومن هنا حيكون الكتاب دا بيتكلم عن أهم الأفكار المهزأة اللي بيت تكون في عقل

الانسان تخليه هو العدو الأول لنفسه، هو العقبة الحقيقية قصاد انه يبقى كائن قوي قادر يعبر عن احتياجاته بشكل واعي وواضح.. من خلال التقسيمة دي:

- شوية فروقات غايبة عند أصحاب العقول المهزأة.
 - القناعات الغبية اللي ساهمت في تكوين العقلية المهزأة.
 - الأشكال المؤذية اللي بتتعمد انتشار القهر وثقافة احتقار الذات.
 - فكرة المهزأ العصبي وفن إن الإنسان يقول (لا).
 - إزاي ممكن يكون الإنسان يتغير من كونه ضحية الأفكار المهزأة.
 - محاولة في النهاية للتأكيد على كام نقطة مهمة.
 - شوية تعريفات مهمة قبل ما نبدأ في الكتاب
 - المواطن المهزأ

لا يجب أن تخاف الشعوب من حكوماتها، بل على الحكومات أن تخاف من شعوبها.

V for Vendetta فیلم

يظهر المواطن المهزأ بقوة في المجتمعات الديكتاتورية، فهي العامل الأساسي لنشائه، فهو يا إما شخص سلبي ونمطي لأقصى حد، تحسه دائمًا مكسور وغير قادر على الإبداع، أو شخص عدواني يبفرغ شعوره الدفين إنه ولا حاجة بسلوكيات مؤذية للآخرين اللي أضعف منه زي (التحرش، العنف الأسري، الفساد الإدراي... إلخ)، فهو مش حاسس بقيمة كمواطن مؤثر في قرار البلاد، مش مصدق إنه عضو فعال في الحياة، دائمًا خايف يعبر عن اللي جواه أو مش مهم، فهو ما عندوش مشكلة يتدارس عليه أو على حقوقه ولا أنه يقر بحقيقة قهره وظلمه اللي هو مسجون جواهم! طموحاته بدائية جدًا (أكل، جواز، استقرار أمني... إلخ) وعشان يتعايشه مع الخوف والعجز اللي هو فيه دائمًا يبرر أي قرف سياسي أو اجتماعي بيحصل حواليه بتفسيرات متخلفة ولامنطقية.

• الموظف المهزأ:

لَالَّهُ مَاذَا يَنْتَفِعُ الْإِنْسَانُ لَوْ رَبِّ الْعَالَمَ كُلُّهُ وَخَيْرُ نَفْسَهُ؟

طبعاً فيه التزامات مادية واجتماعية بتخلينا عن غصب عنا نكون في وظائف فيها
تعب أو إرهاق بس الموظف المهزأ هو اللي مش بيأخذ باله إن فيه خطوط حمرا،
مهما كانت صعوبة وظيفته ما ينفعش يقبل بيهَا! كرامته وخصوصياته، حقوقه
وواجباته، فالمشكلة عمرها ما كانت في حجم الشغل أو المجهود المبذول إنما
ظروف الشغل اللي فيها تعدد على حدود وكيان الفرد، فأنا شغلني طالب مني كذا

حاعمله، لكن في ظروف تحترم شخصي وإنسانيني، ما فيش حاجة اسمها أتحمل
تجاوز عشان الشغل يمشي! أرضى بوضع يستهلكني نفسياً عشان أثبت جدارتي
كموظف! أتفاوض عن ثوابت بالنسبة لي عشان لقمة العيش!

• العاشق المهزأ

It's About Who Stays, Not Who Promised

بالي قعد، مش اللي وعد

أول ما بيجي في بالي العاشق المهزأ بيترسم في عقلبي صورة جردل! اللي هو
الجردل الأصفر بتاع الأطفال اللي بيلعبوا بييه على الشط، مش عارف هل عشان
هو ما لوش أي سلطة على حياته، يعني مجرد لعبة في إيد أي حد، تحت رحمة
مزاجيتهم أو رغباتهم، ولا عشان بيتدلق على طول، فالعاشق المهزأ هو شخص
منقاد بس بعواطفه، صادق ورقيق جداً في مشاعره، بس مع الأسف مش واعي أو
ناضج فيها، فعلى طول أول ما يحس بأي نسمة عاطفة يقع زي الجردل، مستنى
الآخر يعدله! ولا يمكن عشان بعد ما الأطفال بتخلص لعب بييه بترميه على الشط،
أصله خلص دوره بالنسبة لهم! وطبعاً عشان هو جردل ما كانتش من ضمن أولوياته
إنه يحدد في الأساس هم دورهم بالنسبة له إيه، فكان داخل في علاقة اللعب دي
عاوز يبسطهم ويفرحهم ونسي نفسه وحقها عليه، بس دا طبعاً شيء مش طبيعي
على البشر، إنما طبيعي على جردل.

• العقل المهزأ:


«لا يستطيع أحد ركوب ظهرك إلا إذا كنت منحنيناً».

مارتن لوثر كنج

في القرن الـ 14 طلع علينا الفيلسوف الفرنسي «جان بوريدان» بمعضلة (حمار
بوريدان)، المعضلة دي كانت بتحكي عن حمار جعان وعطشان، فجأة لقى نفسه
في نص الطريق ما بين جردل مية وشوية برسيم (في المعضلة الأصلية كان قايل
كومة قش) المهم الحمار جuan وعطشان! فعقله مش عارف يقرر يروح يشرب
الأول ولا يروح يأكل الأول! ففضل في حيرة عقال يفكر ويفكر، لغاية ما
مات في مكانه من الجوع والعطش!

المعضلة دي بتتكلم عن حرية الإرادة، وازاي ساعات العقل بيسجن صاحبه في
دوامة الاختيار، يحوله لكاين رخو متعدد مش قادر يحدد هو عاوز إيه! تايده مش
عارف بالضبط يرسم خطة واضحة لحياته، ضئيل في عيون نفسه وفريسة سهلة
لائي حد عاوز يستغل ضعفه واهتزازه دا، للأسف كل دا بسماح منه عشان ساب
نفسه لعقله المهزأ.

الفروقات



الطيبة vs اللطافة

فيه فرق كبير جداً بين الـ **niceness** (اللطافة) والـ **Kindness** (طيبة). آه، ممكن يتجمعوا الصفتين في شخص واحد، لكن مش بالضرورة خالص عشان الإنسان لطيف يبقى طيب، أو عشان الإنسان طيب يبقى لطيف! فمثلاً:

ماجد إنسان (**nice** - لطيف) أي حد يعرفه بيحبه، شاب قعدهه حلوة وخفيف الظل، كل اللي اتعامل معاه بيقول عليه جنتل وكيوت، لدرجة إن لما بيخرج مع أي بنت بيفتح لها باب العربية وبيراعي جداً إنه يخليلها مبسوتة في الخروجة، اجتماعي جداً في الشغل وبيعرف ما يزعليش أي حد منه، فالـ **main concern** عندة إنه يبقى محبوب من كل اللي حواليه.

أما..

كريم إنسان (**kind** - طيب) لكن بالرغم من طيبته دي مش كل الناس بتحبه، ساعات طيبته دي بتخليله يخبط في أقرب الناس ليه وخصوصاً لو حس إن سلوكهم مؤذني أو مضر لأي روح كانت، فهو ما كانش لطيف أبداً لما زعق للراجل اللي شافه بيضرب الكلب في الشارع! فهو للأسف مش من اهتماماته يقدم نفسه كشخصية محبوبة للمجتمع، مع إن قلبه أبيض فعلاً ومش بيتحمل يشوف حد في ضيقه أو تعبان.

ماجد مش غلط ولا كريم، إنما كل واحد بيحدد أولوياته وتفاصيل شخصيته اللي على أساسهم بيكون سلوكه وقناعاته، لكن الغلط لما يتم الخلط بين المصطلحين الـ **Kindness** والـ **niceness**.

المؤلف الأمريكي **David Levithan** بيقول:

«Kindness connects to who you are, while niceness connects to how you want to be seen».

الطيبة مرتبطة بحقيقة إنت مين، لكن اللطافة مرتبطة بأنت عاوز تتشاف إزاي.

مشكلة من مشاكل العالم السطحي المادي دا إنه مش بيهم بجوهر البشر أو معدنهم، قد مظهرهم اللي بيتصوروه للناس، عشان كدا فيه إعلاء مضخم لقيمة الـ **niceness** على حساب الـ **Kindness**، فبقي اللي أهم من أنك تبقي إنسان طيب هو أنك تبقي إنسان لطيف! إنسان كله بيحبه، إنسان لذيد مش بيعمل شوشرة أو قلق، إنسان **Mr Nice Guy**، لدرجة إن الطيبة الحقيقة ابتدت تتلاشى وتتشوه، وخصوصاً إن الطيبة مش مادة للإعلان أو الدعاية، إنما التباكي بالطيبة بيضعفها! فالطيبة بتلمع بعيد عن الأضواء والعيون، بتستمد قوتها في الخفاء والصمت.

الطيبة يعني تمرد على عالم المظاهر وثورة على سلطة المادة، الطيبة يعني الرحمة قبل المكانة، الآخر قبل الأنما!

فالأزمة اللي بتعشها حالياً، إنه كله عاوز يبقى لذوذ وحبوب، كله عاوز يبقى لطيف! بس مش كتير مستعد يعتنق الطيبة!

في النهاية، في كتابه (الإنسان المهدور) بيقول المبدع «مصطفى حجازي»: (كل إنسان ومنذ بداية حياته يرغب أن يكون موضوع رغبة، أي إن كيانه مشروط باعتراف الآخربه. ذلك هو شأن الطفل الذي يرغب أن يكون موضوع رغبة أمه وأبيه والأسرة من حوله، ومن بعدها العالم الأوسع، وذلك هو شأن كل علاقة عاطفية أو جنسية. إننا لسنا فقط بصدور إشباع حاجات بيولوجية، بل نحن فوق ذلك بصدور تحقيق الذات من خلال الاعتراف بنا، أن نحصل على الحب، وأن نكون محبوبين، أن نرضى رغبتنا من خلال كوننا مرغوبين).

ف حاجة الإنسان إنه يكون كائن لطيف، محبوب من الكل حاجة حيوية بالنسبة له ومرتبطة بشكل أساسى بشعوره بكيانه وأهميته، كلنا بلا استثناء عاززين نبقى محظ أنظار الناس ومطلوبهم الأول والوحيد، بس المشكلة إن كل دا معتمد بشكل أساسى على الناس، على الآخر! فالإنسان ساعتها بيكون مستنى يشوف في عيون اللي حواليه قيمته، اللي تعتبر نوع قاسي من أنواع القيود، مش قادر يحدد هو يستحق إنه يكون ذا قيمة ولا لا، دايماً مستنى اللي حواليه عشان يقيمه!

وعشان كدا أول طرق تحرر الإنسان هو تحرره من الشعور دا، أول طريقة لسلامه النفسي إنه يفك أسر نفسه في وهم الكائن المرغوب المحبوب من الكل، اللي بتتشكل بعدم اكتراثه أو اهتمامه إنه يكون في وضع رغبة أو تمني لأي طرف، بعدم مبالغة حقيقة برأي الناس فيه، فيذهبوا هم ورأيهم إلى أعمق أعمق الجحيم! اللي للأسف يعتبر صعب في عالم كله بيقيم كله، كله بيتسجدي من اللي حواليه نظرة تقدير أو مجرد التفات، كله مستنى يكتب تعليق أو يدوس like

فansonاخ الإنسان عن المنظومة دي بتحطم جواه رغبته في إنه يكون كائن مرغوب فيه، بس بتتجده من إنه يكون تحت رحمة انتقادات الناس وتحت طوع مزاجياتهم وتقلباتهم النفسية.

القانون vs الأخلاقيات

(عيب قوي لفأا اكلمك وما تردش على

- خلاص ما تكلمنيش).

الموضوع بي بدلي في القرن الرابع قبل الميلاد، لما الفيلسوف اليوناني Protagoras قال: «الإنسان قياس كل شيء» عشان يظهر لأول مرة المصطلح الفلسفي الا ethical relativism (الأخلاقية النسبية) وهي إن أخلاقيات السلوك البشري مش حاجة ثابتة مطلقة، إنما بتفرق من شخص لشخص على حسب قناعاته وتربيته.

خلينا الأول نفرق بين الا ethics (الأخلاقيات) وال law (القانون)، الا ethics هي مجموعة من القواعد الأخلاقية بيحطها الإنسان لنفسه عشان يقدر يتعامل بشكل فيه تحضر وذوقيات مع الآخرين، أما القانون دا مجموعة من القواعد بتحطها المجتمعات عشان يكون فيه نظام بين الناس، عشان ما حدش يعتدي على حدود او كيان حد! فخرق القانون بيعتبر جريمة! على عكس عدم وجود ethics واللي يعتبر مجرد قلة ذوق -في وجهة نظرنا- مجرد عيب.

فيه جملة بتقول:

Sometimes you need to know your place in someone's life because you might get hurt if you expect too much.

ساعات كتير بنكون محتاجين نعرف موقعنا الحقيقي في حياة الناس، عشان ممكن ننتهي بتوقعاتنا الكبيرة دي.

مشكلة كبيرة بتواجه بعض الناس اللي اتربيوا على قيمة وأهمية الا ethics، هي إنهم يخلوا من الا ethics بتاعتتهم حاجة زي قانون بشري عام! اللي هو لو ما حلتش توافق بين الواقع وال law ethics بتاعنا تبقي كارثة! حياتهم تتخل ويحسوا إن فيه خلل في نظرتهم للآخرين! والحقيقة، إن ما فيش قوة أو أي حاجة إلزامية تجبر الناس إنها تكون ذوق أو عندها أخلاقيات معينة في التعامل مع بعض، الحقيقة إن كلها ماشية بال ethical relativism (النسبية الأخلاقية).

ففيه جملة عظيمة بتقول:

«Stop expecting «you» from people»

«توقف عن توقع «نفسك» من الناس!».

فمن عدم النضوج، التعامل بتشنج وحساسية مفرطة تجاه الشخصيات المختلفة عن الا ethics بتاعتتنا، فمش معنى إن من الذوق والأخلاق -في وجهة نظرنا- إن

لما حد يتصل بینا او بیعثت لنا رسالة لازم نرد، إن الآخر لازم حي عمل كدا، أو إن من الذوق أو الأخلاق إن لها حد يطلب منها حاجة لازم نبذل أقصى ما في وسعنا عشان نعملها له، إن كل العالم مطالب إن يكون عنده نفس النظرية دي! فمش معنى إننا متربين على تقدير أي حب أو اهتمام حد يدهولنا، إن كل الناس حتتعامل مع حبنا أو اهتمامنا بيهم بنفس الشكل! فأبسط رد «هو حد طلب منكم تعلموا كدا؟!».

في النهاية المفكر «علي الوردي» بيقول:
«خطيئة الأنقياء، هي ظنهم بأن الجميع مثلهم!».

فالموضوع هنا مش في النقاء، قد ما قمة الغباء إن الإنسان يتعامل إن كل البشر نسخة واحدة! والأشد غباء، إن النسخة دي تبقى هو نفسه! فالشخصيات اللي زي دي مش بس بتعيش في حلقة مفرغة من الخيبات المتتالية، لا دي بتبقى كائنات سطحية بتعاني من قصور حاد في الإدراك، وفشل في التعايش مع الآخر والتطور.

القسوة VS الحدود

فيه جملة بتقول:

«If you're cold you hurt people, if you're sensitive they hurt you»

لو كنت بارد مع الناس حتجرحهم، بس لو كنت حساس هم اللي حيجرحوك.

خلينا نقول إن غصب عننا في الحياة دي لازم يكون فيه عملية «تجريح» طول ما فيه أهداف متضاربة وكل واحد عاوز حاجة معينة، أكيد فيه حد حيوصل لهدفه والثاني لا، أكيد فيه كسبان وفيه خسران، فمثلاً:

• لو فيه ولد معجب بيـك وانت للأسف مش حاسة ناحيته بقبول، حتى ولو حاولت توصلـي له المعلومـة بشـكل مـهذـب ومن غير إـحرـاج، بـرضـو مـمـكـن يـحسـ إنه اـتـجـرحـ أو عـلـى الأـقـلـ حـيـحـسـ بـأـحـبـاطـ عـشـانـ فـشـلـ إـنـهـ يـحـقـقـ الليـ كـانـ نـفـسـهـ فـيـهـ.

• لو حد من أهلك نفسه تاخد خطوة فلانية في حياتك سواء شغل أو جواز، وأنت للأسف مش شايـفـ الخطـوةـ ديـ منـاسـبـةـ ليـكـ، حتىـ ولوـ كانـ فيـهـ تـفـاهـمـ أوـ بـيـنـواـ لـكـ إـنـهـ رـاضـيـنـ عنـ قـرـارـكـ، بـرضـو مـمـكـنـ يـكـونـ جـواـهـمـ جـزـءـ ولوـ بـسيـطـ منـ الـحـزـنـ أوـ الـقـلـقـ عـشـانـ ماـ مـشـيـتـشـ حـسـبـ الخـطـةـ الليـ كـانـ بـالـنـسـبـةـ لـهـمـ أـفـضـلـ ليـكـ أوـ أـكـثـرـ أـمـانـ.

ساعات للأسف الإنسان بيتفاـفـلـ عنـ الحـقـيقـةـ ديـ وـيـتـخـيلـ إـنـهـ عـاـيـشـ فـيـ عـالـمـ مـثـالـيـ كلـ النـاسـ المـفـروـضـ تـبـقـيـ مـبـسوـطـةـ وـسـعـيـدـاـ! وـعـشـانـ ماـ يـجـرـحـشـ حدـ أوـ يـزـعـلهـ، بـيـقـبـلـ إـنـهـ يـتـنـازـلـ عنـ اـخـتـيـارـاتـهـ أوـ قـنـاعـاتـهـ، بـحـجـةـ «ـأـنـاـ سـخـصـ طـيـبـ مشـ عـاـوـزـ أـكـسـفـ أوـ أـضـاـيـقـ حدـ»ـ فـيـيـجيـ عـلـىـ نـفـسـهـ مـرـةـ وـالـثـانـيـةـ وـالـثـالـثـةـ، لـغـاـيـةـ مـاـ مـرـةـ وـاحـدةـ يـلـاقـيـ نـفـسـهـ حـرـفـيـاـ مـتـداـسـ عـلـيـهـ، أوـ زـيـ مـاـ حدـ قـالـهـاـ قـبـلـ كـداـ:

«You don't have a big heart, you just lack boundaries».

«إـنـتـ مـاـ عـنـدـكـشـ قـلـبـ كـبـيرـ، إـنـتـ مـجـرـدـ مشـ عـارـفـ تحـطـ الحـدـودـ».

فالإنسان مش شـرـيرـ أوـ قـلـيلـ الأـدـبـ لوـ حـطـ حدـودـ قـدـامـ الـآخرـ عـشـانـ يـحـترـمـ كـيـانـهـ وـشـخـصـيـتهـ، بـالـعـكـسـ دـاـ لـوـ ماـ حـطـشـ الحـدـودـ ديـ يـبـقـيـ فـعـلـاـ شـرـيرـ وـقـلـيلـ الأـدـبـ تـجـاهـ نـفـسـهـ وـذـاتـهـ! فـالـحدـودـ ديـ مشـ مـقـصـودـ بـيـهاـ عـدـاوـةـ أوـ حـالـةـ منـ التـعـالـيـ تـجـاهـ الـآـخـرـ، إـنـماـ الحـدـودـ ديـ مـمـلـكتـكـ، أـفـكـارـكـ، أـحـلـامـكـ، إـنـتـ! فـرـفـضـكـ لـتـعـدـيـ أـيـ حدـ مـهـمـاـ كـانـ:ـ أـبـوكـ،ـ أـمـكـ،ـ جـوـزـكـ،ـ مـرـاتـكـ..ـ إـلـخـ!ـ لـحـدـودـكـ،ـ دـاـ عـشـانـ أـنـتـ مـهـتـمـ مـاـ تـكـرـهـشـ نـفـسـكـ مـنـ خـلـالـ الشـخـصـ دـاـ!ـ مـشـ عـاـوـزـ يـبـيـجيـ عـلـيـكـ يـوـمـ مـنـ الـأـيـامـ وـتـبـقـيـ قـرـفـانـ أوـ مـخـنـوقـ عـشـانـ سـمـحـتـ إـنـ الدـنـيـاـ تـبـقـيـ سـايـحةـ عـلـىـ بـعـضـ،ـ سـمـحـتـ إـنـ حـقـيـقـتـكـ تـبـقـيـ ضـاـيـعـةـ وـسـطـ آـرـاءـ النـاسـ وـتـحـكـمـاتـهـمـ!ـ فـالـحدـودـ مـشـ عـشـانـ تـطـرـدـ النـاسـ مـنـ حـوـالـيـكـ،ـ

إنما عشان تنظم وجودهم في حياتك، أو زي ما بيقال:

«When you Say «No», you say to the request not the person».

فما فيش أي تعارض بين إنك إنسان طيب وودود للناس وبين إنك حازم وصارم تجاه حدودك وقواعدك اللي حطتها لنفسك واللي حواليك! وطبعي جدًا تبقى مش مبسوط وأنت بترفض طلب حد، بس برضو تبقى مقتنع مليون في المية إنك عملت كدا عشان دا الصح، دا اللي أنت فعلًا عاوزه!

في النهاية فيه جملة بتقول:

(في حدودك كن، حتى لا يدوشك الآخرون)

فاللجم مش بيؤذي حد وقاعد في حاله، بس في اللحظة اللي حد بيفكر يجي عليه، بينفجر في وشه! زي الأوطان القوية، ما فيش رحمة لدخل أو شفقة على متعدى الحدود.

الغلط الغير مقصود VS الغلط المتعمد

عمنا باولو كويلو بيقول:

A mistake repeated more than once is a decision.

الخطأ لما يتكرر أكثر من مرة يبقى قرار.

طرف ما في علاقة بيحاول يوصل للطرف الثاني إن الحاجة دي بتضايقه أو الحركة الفلانية دي ياريت ما يكررهاش، بس كل مرة يكررها ويقول له معلش غلطة ومش بتحصل تاني، والموضوع يعدي.

في الشغل كل مرة تقول للمدير بتاعك إنك مش بتحب الأسلوب دا في الحوار بس هو يكرره ويقول لك معلش كنت متغصب، تحت ضغط، غلطة ولحظة شيطان، والموضوع يعدي.

وحاجات ياما بتعدى وبنكون من جوانا متضايقين ليه الآخر مش قادر يبطل الحاجات اللي احنا بنفسنا بنقولها له بكل وضوح وصراحة إنها بتضايقنا؟! واللي يعتبر سبب رئيسي مهم في النقطة دي هي تعاملنا احنا نفسنا مع دافع الحاجة اللي بتضايقنا، وإننا دايماً بنشوفها مجرد غلطة!

فلو علي الغلط، كلنا بشر مقبول ما نركش مرة ونغلط، بس الحقيقة إن التعدي على حدودنا المستمر أو تكرار نفس الغلطة دي مش مجرد غلطة دي قرار! واللي مش دايماً قرار متعمد إنه يضايقنا أو يجرحنا قد ما هو قرار إن كدا حا عمل اللي حا عمله والموضوع بيهمي، بس ليه مش بترضى نعترف إنها قرار؟!

في جملة عظيمة بتقول:

We ignore truths for temporary happiness

إحنا بنتجاهل الحقيقة عشان سعاده مؤقتة.

فأنهي تفسير ممكن يقبله الإنسان؟!

• إنه في علاقة مع شخص مصمم إنه ما ياخدش بكلامه ولا يهتم بالحاجات اللي بتضايقه ولا إنه في علاقة مع شخص غصب عنه بيعمل؟! هو بيحبه قوي بس يعني ساعات بتحصل أخطاء طفيفة كدا مش مقصودة!

• إنه في الشغل مع مدير غير سوي بيتعمد يضايقه ولا إنه مع مدير بيحترم وجوده بس ساعات بيعمل وتطلع منه حاجات مش مطبوبة تحرجه أو تهيهه؟!

فالملطوب من أجل حياة نفسية سليمة هو عدم تجاهل الحقيقة، وتسمية المفاهيم بسمياتها من غير زيف أو خداع، فبادرك النقطة دي مهم جداً عشان الإنسان يقدر يسامح.

Forgiveness in no way requires that you trust the one you forgive

السامحة مش بتشترط أبدا إنك ترجع ترق في اللي انت سامحته.
من المفاهيم اللي بايظة عندنا، مفهوم (السامحة).

ففيه فرق شاسع بين إني أسامح حد، وإنني أتعامل معاه إنه ما غلطش في؟
فمفهوم المسامحة أصلًا معتمد على اعترافي بالغلط اللي حصل تجاهي، وإلا لو ما
حصلش حاجة؟! أمال أنا أبقى بسامحة على إيه؟!

فمن الاعتراف دا بييجي السلام النفسي للشخص، اللي هو خلاص! كفاية صراع
وتبريرات، stop للحرب اللي في دماغي! أنا كبرت ونزلت لأرض الواقع واعترفت
بالغلط بدل خيالات العيال الصغيرة والأوهام العاطفية اللي كانت مانعاني أعرف
بيه! يلا بقى إقفل الصفحة دي عشان نركز في حياتنا ونبص على اللي جاي.

ففي المسامحة أنا باقر إن نفسي أغلى على من إنها تفضل تتغلي في نار الندم
والذنب! نفسي تستحق تبقى في وضع تاني أروق وأصفى، فاللي غلط دا ربنا
يسهله، أنا فعلًا مش باكن له أي كراهية عشان تمامه برا دماغي! حقيقي مش عاوز
منه أي حاجة غير إنه يأخذ بعضه ويبعد عنني بهدوء.

بس ساعات اللي يحصل مش كدا لا دا فيه اعتقاد مشوه إني سامحتك يعني
أغي اللي أنت عملته! أنا سامحتك يعني رجعتك زي ما كنت قبل الغلطة! لا!
ومليون لا! دي مش مسامحة! دي هبل، عبط، ضعف! أي سلوك خانع بنضحك بيه
على نفسنا ونقول مسامحة! والسبب إننا مش قادرین نعترف بواقع مؤلم ومؤذن!
فيبيقى الحل البديل إننا نلغيه ولا إكانه حصل!

فالسامحة مش عشان تلغي حقيقة ضايفتك، إنما عشان تقول لنفسك أنت أكبر
وأهم من الحقيقة دي.

الإعجاب vs التقدير

فيه جملة بتقول:

There's a difference between being liked by someone & valued by someone

نظرئاً لو الشخص رقيق، اجتماعي، مظهره كويس، بيضحك وبيهزر.. شخص بمواصفات جذابة وجميلة.. أكيد أي حد طبيعي حيشوفه حيعجب بيها ويكون مبسوط إنه موجود في حياته، بس الموضوع ساعات كتير مش بيقي مجرد إعجاب.

مشاكل كتير بتحصل في العلاقات عشان الناس مش بتركز في الفرق بين المفهومين دول «حد يعجب بيها» أو «حد يقدر قيمتي».. فتبقى بتتلدق علي أي حد يعجب بيها أو يظهر مدى انبهاره وافتاته! من غير ما تركز إن عملية الإعجاب دي في حد ذاتها عملية سلبية تلقائية جدًا، زي واحد شاف وردة حلوة أكيد حيكون معجب بيها وعاوز يقطفها، بس مش دايماً لما حد بي Shawf وردة حلوة بيكون مقدراً وواعي لقيمتها، عشان دي وردة مش إنسان!

فمعنى إن الشخص بيقيم أو يقدر الحد اللي قصاده، فالمطلوب إنه يتخطي حاجز الإعجاب الخارجي لنوع أسمى من التواصل مع جوهر الإنسان دا، فهو مش مجرد كائن بيضحك وبيهزر وشكله حلو، لأن دا كيان كامل فيه عيوب ومشاكل ونواقص بشرية، مخزون عميق من الأفكار والرواسب النفسية، طموحاته، أحلامه، وحاجات أكثر وأكبر من مجرد إعجاب أو انبهار!

فالعبرة مش مين معجب أو مفتون أو واقع في غرام، إنما مين مقدر ومدرك قيمة وجوهر الإنسان اللي معاه، مين باصص لأعمق وأبعد.

«It is not your job to prove that you are lovable»

«مش وظيفتك إنك تثبت للناس إنك كائن محظوظ»

مشكلة كبيرة بتواجه شريحة كبيرة من البشر هي إنهم حاسين دايماً بعبع إنهم لازم يبقو شخصيات محبوبة! مع إن دي مش شغلتك! مش شغلتك تثبت لحد أي حاجة! فكرة أنت إنسان محظوظ أو لا، مش مقتصر على حقيقتك أو شخصك، إنما انطباع ورأي الناس عامل أساسي في تحديد النقطة دي، واللي طبعاً بيكون خاضع لقناعات ومزاجيات برا عنك.

فالإنسان وظيفته يبقي شخص محترم لحقوق وحدود الآخر، شخص أمين وعادل بين الناس، شخص رحيم بالبشر، صادق مع نفسه واللي حواليه، ويبقى كدة لذاته مش عشان رضا اجتماعي أو قبول خارجي، فهو مش عاوز يتثبت حاجة

لحد، ولا أصلاً فارق معاه الإثبات من عدمه! فزي ما بتقول دكتورة علم النفس
:Elisabeth Kübler-Ross

**The opinion which other people have of you is their problem,
not yours»**

رأي الناس عنك مشكلتهم هم، مش مشكلتك!

في النهاية، الموضوع بيطلب نوع مميز من الشجاعة والوضوح، فمش من السهل أبداً إن الإنسان يتغلب على إدمانه لإعجاب الناس واستحسانهم، مش العادي إنه يتعايش مع فكرة إن فيه حد مش عاجبه شخصيته أو طريقة تفكيره، فالإنسان من ساعة ما بيتولد وهو بيتحبس في سجن آراء الآخرين، مهووس بفكرة إنه لازم يعجب الكل، فينهاه ويومه بيظلو سمع رأي سلبي أو حس للحظة إنه مش عاجب حد، حتى ولو الحد دا مش يمثل له أي قيمة مهمة في حياته! مع إن الممثل الجميل Will Smith له جملة عظيمة بتقول:

**«Stop letting people who do so little for you control so much
of your mind, feelings & emotions»**

فالإنسان لازم يتحرر من حمل إن ممكن مجموعة من الناس فعلاً مش بيقدموا له حاجة! ومع كدا بيقدروا يأثروا بشكل مهيمن على مزاجه ومشاعره وأحساسه.

التواضع vs قلة القيمة

فيه فرق كبير بين التواضع وقلة القيمة.

فيه جملة مشهورة بتقول:

«Humility is not thinking less of yourself. Humility is thinking of yourself less»

«التواضع مش إنك تفكـر نفسك قـليل، إنما التواضع إنك تـفـكر في نفسك أقل»

الموضوع بيـتـدي والإنسان لـسـه صـغـير، بيـتـعلم إنـالـغـطـرـسـةـ والـغـرـورـ حاجـةـ مشـ مستـحـبـةـ، وإنـالـشـخـصـ المـتعـالـيـ ماـ حـدـشـ بـيـطـيقـهـ، فـيـتـقـالـ لـهـ: بلاـشـ تـتـكـبـرـ علىـ الناسـ، بلاـشـ تـرـسـمـ نـفـسـكـ قـدـامـ أـصـحـابـكـ، رـاعـيـ مشـاعـرـهـمـ وـضـعـفـهـمـ، كـلـ التـعـالـيمـ الحـلـوـةـ دـيـ الـلـيـ بـتـخـلـيـ الإـنـسـانـ سـخـصـ مـتـواـضـعـ وـقـرـيبـ منـ النـاسـ، بـسـ لـلـأـسـفـ فـيـ وـسـطـ التـعـالـيمـ دـيـ سـاعـاتـ بـيـضـيعـ مـفـهـومـ الـقـيـمـةـ الشـخـصـيـةـ!ـ فـيـعـتـقـدـ الشـخـصـ إنـالـتـواـضـعـ يـعـنـيـ ضـيـاعـ لـقـيمـتـهـ الشـخـصـيـةـ، معـ إـنـهـ هـوـ مـجـرـدـ اـحـتـرـامـ لـقـيمـةـ الـآـخـرـ!ـ فـاـنـتـ ماـ تـتـكـبـرـشـ عـلـىـ حدـ بـسـ اوـعـيـ تـسـمـحـ انـ حدـ يـتـكـبـرـ عـلـيـكـ، آـهـ ماـ تـرـسـمـشـ نـفـسـكـ قـدـامـ أـصـحـابـكـ بـسـ فـيـ نـفـسـ الـوقـتـ اـعـرـفـ كـوـيـسـ قـيـمـةـ وـمـقـدـارـ نـفـسـكـ!ـ رـاعـيـ مشـاعـرـهـمـ وـضـعـفـهـمـ بـسـ تـعـاـمـلـ دـايـمـاـ بـعـزـةـ وـاستـحـقـاقـ، ماـ تـسـاشـ فـيـ النـصـ مشـاعـرـكـ وـضـعـفـكـ..ـ فـاـحـتـرـامـ وـجـودـ الـآـخـرـ عمرـهـ ماـ يـتـحـقـقـ بـالـتـنـكـيلـ بـوـجـودـكـ!

العظيم «إحسان عبد القدوس» له جملة بتقول:


«عشـانـ توـافـقـ لـازـمـ يـكـونـ منـ حـقـكـ إـنـكـ مـاـ تـوـافـقـشـ»

فعـلىـ نـفـسـ النـسـقـ، عـشـانـ تـقـرـرـ إـنـكـ عـاـوـزـ مـاـ تـنـشـافـشـ لـازـمـ يـكـونـ منـ مـقـدـرـتـكـ إـنـكـ تـنـشـافـ!

فالـتـواـضـعـ هوـ إـثـابـتـ حـقـيـقـيـ لـقـيـمـةـ الـإـنـسـانـ، فـهـوـ مـتـواـضـعـ عـشـانـ عـارـفـ جـوـهـرـهـ كـوـيـسـ وـوـاثـقـ فـيـهـ، فـيـهـ ماـ عـنـدوـشـ عـقـدـنـقـصـ أوـ مـشـاـكـلـ معـ نـجـاحـاتـ الـلـيـ حـوـالـيـهـ،ـ فـبـكـلـ وـعـيـهـ وـحـرـيـتـهـ قـرـرـ يـحـبـ النـاسـ وـيـحـتـويـ عـبـوـبـهـمـ، بـكـامـلـ إـرـادـتـهـ قـرـرـ يـتـغلـبـ عـلـىـ الـأـنـاـ الـلـيـ جـواـهـ وـيـرـفـضـ يـبـقـيـ المـحـورـ الـوـحـيدـ لـلـحـدـثـ أوـ الـمـوـقـفـ!ـ فـالـإـنـسـانـ الـمـتـواـضـعـ إـنـسـانـ قـوـيـ وـصـاحـبـ كـرـامـةـ، إـنـماـ التـواـضـعـ النـابـعـ مـنـ عـجزـ أوـ قـصـورـ فـيـ الشـخـصـيـةـ دـاـ فـشـلـ وـقـلـةـ حـيـلـةـ، دـيـ إـهـانـةـ حـقـيـقـيـةـ لـجـوـهـرـ الـإـنـسـانـ.ـ فـالـشـخـصـ لـمـ يـسـمـحـ لـحدـ يـعـتـدـيـ عـلـىـ حـقـوقـهـ أوـ كـيـانـهـ تـحـتـ مـبـرـرـ إـنـهـ شـخـصـ مـتـواـضـعـ!ـ دـاـ إـنـسـانـ بـيـكـدـبـ عـلـىـ نـفـسـهـ وـأـجـبـنـ مـنـ إـنـهـ يـعـتـرـفـ بـخـزـيـهـ وـإـفـلاـسـهـ!

فالـتـواـضـعـ عمرـهـ مـاـ كـانـ، عـشـانـ مـشـ عـاـوـزـ تـبـقـىـ كـلـ الصـورـةـ، تـقـبـلـ إـنـكـ تـكـونـ بـرـاـهاـ.

قناعات غبية



قبل ما نتكلم عن القناعات الغبية اللي بتتززع في دماغنا من وإحنا صغيرين بتساهم في تكوين الإدراك والوعي المهزأ، محتاج أشير لنقطة معينة:

مش من حق أي حد في الكون -مهما كان- يحدد إذا كانت مشاكلك في الحياة تستحق الغضب أو الضيق أو لا! مش من حق أي حد في المجرة يحكم على سلوكك في موقف ما، أو يديك تقدير على انفعالاتك أو مشاعرك! مش من حق أي حد يعين نفسه مكانك في التعامل مع أفكارك أو قناعاتك! إنما اللي من حق أي حد وعادي جدًا إنه يحصل إن أي حد ما يحسش باللي أنت حاسه أو بتمر بيها، إنه يوقف من بعيد يتفرج عليك وهو مش مهم أو مش فارق معاه! إنه يقولها لك بشكل مباشر أو حتى غير مباشر إنه عايش لنفسه ومش ليك!

فالنقطة دي ممكن تعمل خلل مع بعض الناس، والسبب ببساطة إن قناعة الحدود وكيانات الأفراد وخصوصيتهم مش واضحة عندنا.

فمن الشخص لسه طفل صغير وهو بيتسقى أفكار ومفاهيم موجودة بين المجتمع تحت مظلة الدين، والعرف، الخ، واللي بتكبر جواه وتتحول لرواسخ صعب يجي ناحيتها من غير ما يفكر في أي لحظة من لحظات حياته يسأل نفسه أصل القناعات دي ؟!

فتدخل الآخرين في حياتنا -حتى ولو بموافقة مننا- حبفضل طول عمره اسمه تدخل! واللي عشان يتم لازم يكون بسماح منهم وترحيب منا، فالتفاعل بين الأفراد وبعضها هو تفاعل كيانات كبيرة له قواعده ومبادئه، له بروتوكولات محددة، حتى ولو الأفراد دول قريبين جداً لبعض زي واحد ومراته أو أم وابنها! فدرجة المودة

والقرابة من الشخص ما ينفيش نقطة مهمة زي إنه كائن له قوامه النفسي والفكري الخاص، اللي ما ينفعش يتسحب منه غصب عنده عشان رغبتنا عاوزة كدا! أو نقطح حدودنا تجاهه عشان أحننا شاييفين إن دا العشم والعادي!

فهو دا اللي بيخللي العلاقات بين الناس وبعضها علاقات محترمة وناضجة، دا اللي بيخللي علاقة الإنسان بنفسه فيها ثقة وكراهة، دا اللي بيخللي الوضع العام شكله راقي وإنساني، مش وضع عشوائي، غير متحضّر، مهزاً!

أصل مش قصدتهم!

فيه جملة عظيمة بتقول:

«stop making excuses for people who treat you like shit»

«توقف عن خلق أعذار للأشخاص الذين يعاملونك بطريقة سيئة»

قبل كدا واحد صاحبي سألني: هو لو أنا سبت خطيبتي عشان بتآذيني، كدا بيقي أنا ظلمتها؟! بغض النظر إني اعتذر له إني مش قادر أجابه وخصوصاً إني مش عارف تفاصيل العلاقة بينهم ولا عارف حقيقة سلوكيات خطيبته، فممكن يكون هو أصلاً بسلوكه وأفكاره عامل مهم في المشكلة دي، بس قعدت أفكر في سؤاله، وفكرة الإنسان اللي بيتعرض لأذى وخايف ليكسر دائرة الأذى دي ليظلم حد مهم في الدايرة دي!

فهو ليه الإنسان مش بيأخذ باله وهو عاوز يطبق العدل والأخلاق الحميدة في أي علاقة في حياته! إن هو نفسه عنصر مهم في المعادلة! يعني نفسك اللي بيتم استغلالها أو أذيتها وأنت مكمل وما عندكش مشاكل، هو مش دا ظلم؟! مش دا إساءة غير أخلاقية لنفسك! ليه الإنسان بيصعب عليه مشاعر الناس قوي وحيقولوا عليه إيه، ومش بيفرق معاه كم الضغط والقرف اللي بيتحمله في المقابل؟! فالشخص اللي يوصل مع نفسه إنه يتقبل المعاملة السيئة عشان خايف في رفضه أو اعتراضه يكون بيضايق أو بيجرح حد، دا شخص مشوه! مش طبيعي، مش بيقدر نفسه ولا بيديها قيمتها! طب ليه همًّ مفكروش في لحظة أنهم بيظلموك أو بيؤذوك؟! ليه مدخلوش حالة الذنب العميق اللي أنت محبوس فيها دي لما كانوا بيخلقوكم المشاعر السلبية دي جواك؟!

وفي كل مرة الإنسان يوقع في الدايرة المفرغة دي لازم يفتكر الجملة دي:

you did nothing wrong by asking to be treated right

أنت مش بتعمل أي حاجة غلط لما تطالب (أو حتى تثور) عشان تحصل على حقك في التعامل بشكل سليم ومحترم، شكل يليق بكيانك وقيمتك، شكل يخليك عايش في سلام ورضا بعيد عن أفكار الندم واحتقار الذات.

عز نفسك

نركز في الجملة دي كويس قوي:

«you can't make someone love you by giving them more of what they already don't appreciate».

إنت ما ينفعش تخلி حد يحبك من خلال أنك تدي له زيادة، من حاجة هو أساساً مش مقدرها!

مشكلة كارثية في بعض البشر وسبب مهم في بؤس وشعور الإنسان باحتقار عميق تجاه ذاته هي «عدم تقدير قيمة النفس» إن الإنسان مش حاسس قد إيه هو غالى ومهم عند نفسه!

الموضوع مش في العلاقات العاطفية بس، إنما حتى في علاقات العمل أو حتى على مستوى العلاقات الاجتماعية البسيطة، لازم الإنسان يكون مدرك كويس أن أي مشاعر اهتمام أو مسؤولية أو التزام بيطلعلها لأي حاجة أو شخص، لازم تكون طالعة وهي معروفة قيمتها ومحسوب قدرها! لازم يكون واعي جدًا هو بيصرف من طاقته ونفسيته لإيه ولمين، وإلا يبقى هو أول واحد بيرخص منها ويرميها على الأرض، يبقى هو أول واحد مسؤول عن إهدارها.

فالصدمة بتحصل في اللحظة دي، لما بعد وقت كبير من الغفلة يلاقى نفسه صارف مجهد واهتمام وما فيش مردود للكلام دا! فيتأثر وينهار ويعيش في الدايرة المفرغة بتاعة «أنا اتلعب بي ليه؟!»، «هو ليه الناس عملت فيي كدا؟!»، «هو ازاي الناس شاييفاني قليل كدة؟!»... إلخ.

فيه جملة عظيمة بتقول: «في النهاية ستدرك أنك لم تكن تطلب الكثير، لكنك كنت تسأل الشخص الخطأ».

فالقصة كلها، الإنسان واقف فين من حياة الأشخاص وال حاجات اللي حواليه! فيما الناس جريت وتعبت وسهرت وفي الآخر طلع كل دا عشان وهم، وتكون المشكلة كانت عندهم في الأساس، إنهم اتعموا بمشاعرهم وهرموناتهم عشان كانوا عاوزين يحسوا بحاجة مش حقيقة! ويتقابل لهم في الآخر هو حد طلب منكم تجرعوا أو تتعبوا أو تسهروا؟! والحقيقة إن فعلًا ما حدش طلب.

فالإنسان ما يقدرش يخفي الاستغلال من العالم، بس على الأقل يقدر يمنع إنه يكون في حلقة استغلال، بأنه يكون صادق وأمين مع نفسه، يكون مسؤول فعلًا عن مشاعره ومعنوياته، يعزم كل حاجة فيه ويعيش بقناعة أكيدة إن ما حدش حيقدره ويعرف قيمته قبل ما هو يقدر نفسه ويعرف قيمتها.

أخلاق السادة

الإفراط في التواضع يجلب لك المذلة.

فرانسيس بيكون

ليه مش بنعرف نحرج / نرد / نوقف الناس المؤذية لينا؟!

حاكي لكم قصة حصلت بالفعل مع حد قريب جداً لي.

هي بنت مؤدبة جداً لسه متخرجة من كلية طب وكان نفسها تتخصص جلدية فكانت بتنزل في مستشفى الجامعة تتعلم، فجأة لقت معيد الجلدية بيقول لها إيه رأيك تشتغلي معاي برا في عيادتي الخاصة؟! طبعاً البنت انبسطت جداً وخصوصاً أنه كان شاطر وبيعلمها كثير، راحت فعلأً أول يوم شغل ليها، اتفاجئت إن المعيد في عيادته بيبيص لها بصات مش مناسبة، فيه تحرشات لفظية ضايفتها، كانت مش مستريحة طول اليوم ومع كدا كملت العيادة لآخرها! بعدها بكم يوم قابلتها كانت بائسة جداً وحزينة وبعد ما حكت لي ع الموقف قالت لي: (أنا كنت متضايقية جداً إني ما عرفتش أخرجه) ولما قلت لها: (إنت إيه اللي خلاك تكملي أصلاً لآخر اليوم، كنت مشييت من الأول) ردت (حسينت إني حابقى قليلة الذوق لو مشييت مرة واحدة كدا).

بعض النظر عن الموقف، وفكرة تصدق مين ولا ما نصدقش مين -مع إني مع روایة البنت- بس خلينا ما نحكمش في حاجة مش عارفين تفاصيلها.

كان ياماً كان، كان فيه زمان فيلسوف عظيم اسمه «نيتشه»، نি�تشه دا كان بيصدم الفكر الفلسفـي بأفكار غريبـة ومن الأفكار دي، إن الأخـلاق الجميلـة الحلوـة الكـيوـت بتـاعة الناس الغـلبـانـة اللي بتـقول نـعم وـحاضرـديـ شـرـ عـظـيمـ آـهـ وـالـلهـ زـيـ ما باقولـ لكـ كـدـاـ بيـقـولـ لكـ إنـ الـاخـلـاقـ دـيـ فـكـرـةـ مـطـاطـةـ جـدـاـ!ـ الإـنـسـانـ الـضـعـيفـ العـاجـزـ بـيـضـحـكـ بـيـهاـ عـلـىـ نـفـسـهـ عـشـانـ يـدـارـيـ عـدـمـ قـدـرـتـهـ عـلـىـ مـوـاجـهـةـ الـحـيـاـةـ!ـ وـطـلـعـ مـصـطـلـحـ منـ أـهـمـ المـصـطـلـحـاتـ الـفـلـسـفـيـةـ الـلـيـ بـتـتـكـلـمـ عـنـ الـاخـلـاقـ وـهـوـ (ـاخـلـقـ العـبـدـ vsـ اـخـلـقـ السـادـةـ).

فعلى حسب فلسفة نيتـشهـ، ساعات مش بنقدر نحرج أو نوقف الناس المؤذـيةـ، المستـغـلةـ، الليـ بـتـتـلـاعـبـ بـأـحـلـامـنـاـ وـمـبـادـئـنـاـ عـنـدـ حـدـهـاـ عـشـانـ عـنـدـنـاـ قـنـاعـاتـ غـلـطـ بـخـصـوصـ الـاخـلـاقـ، قالـ إـيهـ عـشـانـ أـخـلـاقـنـاـ ماـ تـخـلـيـنـاـشـ نـكـسـفـ الليـ بـيـسـتـغـلـونـاـ أوـ بـيـعـتـدـواـ عـلـىـ مـسـاحـتـنـاـ الشـخـصـيـةـ!ـ يـعـنـيـ يـعـمـلـوـهـ فـيـنـاـ بـسـ أـخـلـاقـنـاـ مشـ جـايـبـانـاـ حتـىـ نـعـتـرـضـ!ـ أـخـلـاقـ إـيهـ يـاـ جـمـاعـةـ؟ـ!

أنـهـيـ أـخـلـقـ تـقـولـ حاجـةـ بـتـنـذـيـنـاـ أوـ بـتـقـلـ مـنـنـاـ!ـ أـخـلـقـ إـيهـ الليـ توـهـمـ الوـاـحـدـ إـنهـ حـيـبـقـيـ قـلـيلـ الذـوقـ لـوـ قـاـومـ أوـ اـعـتـرـضـ عـلـىـ حدـ بـيـسـتـغـلـهـ أوـ بـيـظـلـمـهـ!ـ أـخـلـقـ إـيهـ

اللي تقنع الشخص أنه يفضل ساكت ومكمل في القهر عشان ما يعملش قلق على الفاضي! أقول لكم، دي أخلاق العبيد! اللي بتتولد في مجتمعات الجهل والقمع! مجتمعات صناعة الطفاة والمستبددين، فأول خطوة في بداية إنقاذ فن التعامل مع الشخصيات المؤذية هو التحرر من عباء الأخلاق المظهرية! الأخلاق اللي قايمة على شكلنا قدام الناس! واستبدلها بالأخلاق اللي مبنية على شكلنا قدام نفسنا! فالأخلاق عمرها ما كانت ضعف أو خنوع! عمرها ما كانت البنت المحترمة هي اللي تبص في الأرض أو الواد المتربى هو ما يردهش على اللي أكبر منه! لا دا، البنت المحترمة تبص في أي حته ما دام مش بتعمل حاجة غلط، والواد المتربى يرد بكل أدب ومنطق على أي حد! فالأخلاق هي القوة! وأقوى الأخلاق اللي بتتحمي صاحبها بوضوحه وصرامتها! بتتضمن له حقوقه، حدوده، كرامته، كيانه خط ما ينفعش أي مخلوق مهمًا كان يتعدى عليها! وكله بالأخلاق!

المهذا اللي يفكر في غيره قبل نفسه

«I want to feel my life. I want to stop agreeing to things I don't really want...».

«أنا عاوزة أحس بحياتي، عاوزة أبطل أوافق على حاجات مش عاوزها». من فيلم **Living Out Loud** سنة ١٩٩٨.

إيه اللي يصل إنسان إنه يوافق على حاجة مش عاوزها؟! وخصوصا إنه مش مجب أو متهدد إنه لازم يعملها؟! يعني مثلاً، يوافق إنه ينزل يخرج مع أصحابه وهو من جواه كان عاوز يقعد في البيت، توافق إنها تكون في نقاش مع صاحبتها وهي من جواها مش عاوزه تتكلم في الموضوع دا، إيه اللي يصل الإنسان إنه يختار بمزاجه وإرادته حاجة هو رافضها أو مش عاوز يعملها من الأساس؟!

في جملة بتقول:

Agreeing to things just to keep the peace is actually a trauma response. When you do this you're disrespecting your boundaries..

الموافقة على القرارات لمجرد إنك تحصل على سلام هو عبارة عن توابع لصمة! فلما الإنسان بيعمل كدا هو ببساطة مش بيعترم حدودها!

للأسف فيه بعض الأشخاص نظراً لمشاكل تربوية مرروا بيها أو ما كانوا عندهموعي سلوكي كافي، اتغرست في عقولهم فكرة غير سوية عن إرضاء الآخرين، واللي بيتفق عليهم الـ **people-pleasing** فالأشخاص دي سالمها النفسي ورضاهما عن ذاتها مربوط بانطباع ورأي الآخر، فلما أصحابه يتصلوا بيها عشان يقترحوا إنهم يخرجوا، مش بيفكر يعتذر لهم إزاى إنه مش عاوز، قد ما بيفكر إنه لو رفض حيزعلوا ويقولوا عليه ما بقاش أصحابهم! لما صاحبتها تفتح موضوع هي مش عاوزة تتكلم فيه، مش بتتعلن على طول إن دا مضايقها إنما بتتعقد تحسبها إنها لو قالت لها لا، صاحبتها حتزعل وتحتبقى كسفتها.

وياما موافق كتير في حياتنا أكبر من خروجة أو نقاش بنوافق عليها عشان ما نزعش حد مننا، معشش نضغط على نفسها المرة دي، نكون ناس لذيدة وحبوبة عشان ما نبوظش الصورة اللي عاجبة كل الناس، حتى ولو الصورة دي مش هي تطلعاتنا أو اللي احنا عاوزينه!

فالكارثة لما الإنسان يتوهم إنه المسؤول الأول عن سعادة الآخرين! يعيش في

سجن إنه مش عاوز يزعل حد منه! مع إن دي مش من مسؤولياته، فهو مسؤول ما
يئديش حد، ما يستغلش حد، ما يتعداش على حدود أو كيان حد! إنما إنه يتحمل
عبء تنفيذ متطلبات وأحلام الغير، دا هيل! فحلوا إن الواحد يبسط اللي حواليه
ويخليلهم فرحانين، بس أول حد لازم يبقى سعيد ومرتاح هو الشخص نفسه، أول
واحد لازم يكون راضي عن أي قرار في حياته هو نفسه! مش أنانية أو غرور أن
الإنسان يشوف مصلحته فيه ويعملها! واللي يحاول يشوه أو ينكر عليه الحق دا
تحت مبرر (إنت اتغيرت، إنت ما بقتش طيب زي زمان... إلخ)، يبقى إنسان مستبد،
وظالم، ومستنفع من كائن منقاد بيقول نعم وحاضر على أي حاجة!

اللي أوله شرط

في مؤتمر علمي ما وفي إحدى الـ sessions، المتكلم أستاذ جامعي كبير له مدة محددة في الـ talk بتابعه، المشكلة إن المدة خلصت وهو ما زال مستمراً طب القائمين على تنظيم المؤتمر يعملوا عليه؟! هل يروحوا ينبهوه إن خلاص المدة خلصت عشان المؤتمر يمشي زي ما متنظم له ولا يسيبوه عشان دا راجل كبير وقامة علمية عظيمة ما يصحش يتقال له كدا؟! يسيبوه عشان عيب! عيب يتقال لحد كبير زي كدا كفاية!

اللي حصل إنهم فعلًا ما قدروش يروحوا يكلموه وبدل ما مدة الـ talk كانت ١٥ دقيقة بقت ٤٣ دقيقة! والجدول كله اتلغبط وأغلب الـ sessions كانت مختصرة وسريعة جدًا؟ طب هل هم غلطانيين؟! أكيد غلطانيين! بس دا كان بيقول كلام رائع! كانت كل القاعة مركزة معاه! دا راجل عالمي كلامه من دهب، للأسف برضو غلطانيين! زي ما كلنا بنغلط لما مش بنعرف نوقف أو نقول كفاية، والمبرر يبقى عيب أو ما يصحش! وبالمناسبة الراجل دا مغلطش في أي حاجة! هو لقى مجال فاضي قدامه فاستغله!

اللي بيفرق بين أي إنسان ناجح وأي إنسان فاشل هو مدى احترامه لقواعده أو مبادئه الخاصة، فيه خطوط واضحة كل شخص منها بيرسمها لحياته لو ما كانش بالقوة الكافية والحزم إنه يقدر يحافظ على وجودها هيكون مجرد كائن بلا هوية، كائن بيتم تحريكه حسب الظروف أو المواقف، عندك مبدأ معين إن ما حدش يتعامل معك بشكل معين بيقى خلاص! ما فيش حاجة اسمها تلاقي أعدار أو مبررات إن اللي حواليك يتعاملوا معك بشكل يضايقك وتكون أجبن من أنك تعلن عن اعتراضك عشان عيب أو ما يصحش! وطبعاً عشان تعرف تضحك على نفسك عشان في الرايحة والجایة ما تفضلش تقول لك يا ضعيف، تقدر تقنعها إن دا غصب عنهم، إنهم حيركزوا بعدين، إنهم بيحبوني بس دا أسلوبهم! وهرتلة كتير الإنسان بيزييف فيها الواقع عشان يتماشى مع اللي بيحصل غصب عنه عشان مش قادر ياخد موقف، أو يقول كفاية! فالعيوب الحقيقي هو إنسان مش عارف يسيطر على موقف هو المسؤول الأول فيه!

كل مرة تحس أن قواعده أو مبادئك بيتم انتهاكها افتكر أن مؤتمر علمي مكلف قد كدا باظ وناس كتير طلعت مش راضية عشان اللي منظمها كان أضعف من إنه يقول جملة في غاية الأدب والشياكة: «بعد إذنك يا فندم الوقت خلص عشان فيه sessions تاني بعد حضرتك، ممكن ننوه إن المهتم يتواصل مع حضرتك يقدر يتواصل بالطريقة اللي حضرتك تختارها».

علاقات عيال صغيرة

باحس إن الشخص اللي مستعد يرفض إنسان بيحبه بجد من كل قلبه في ظروف الحياة الصعبة دي، شخص غبي ما يتزعلش عليه أبداً!
(كلام شايفه منطقي، صح؟ يؤسفني أقول لك إنه كلام شديد النرجسية وانعدام النضوج)

* كريم اتعرف على مريهان في الجامعة، أعجب بشخصيتها وفكرها، قربوا من بعض قوي بحكم التعامل اليومي، اتعلق بيها أكثر وحس ناحيتها بمشاعر حب وهيا، كريم بقى حلم حياته يشوف مريهان أفضل وأحسن، هو بجد بيحبها من كل قلبه ومخلص لحبه دا وعاوز يكمل حياته معها، بس للأسف مريهان مش قادرة تحس بنفس مشاعر كريم، فيه حاجات في شخصية كريم مش متناسبة مع اختياراتها لشريك حياتها.

بس دا بيعشقها؟! دا عاوز يجيب لها العالم كله تحت رجلها، دا مستعد يموت عشان خاطرها! يعني إيه ترفض كمية الحب والتضحية دي! دي أكيد متختلفة! لأن مريهان مش متختلفة، ولا مغروبة، ولا بتترفض كريم كشريك حياة عشان هو مدلوق عليها وهي معقدة وعاوزة اللي يديها على دماغها! مريهان إنسانة طبيعية جدًا عندها كيان حر وطموح شخصي لازم يتم احترامهم.

فالحقيقة إنه ما ينفعش نلوبي دراع الناس بمشاعرنا الجميلة ناحيتهم ولو رفضوها يبقو عالم غبية وتستاهل تموت! دا مش حب إنما ابتزاها اللي هو انتو لازم تبادر علينا مشاعرنا المثلثة ناحيتكم وإلا هنكرهوكوا ونهينكوا! دا أبعد ما يكون عن الحب الناضج إنما أقرب لشهوة التملك بتاعة العيال الصغيرة! فما حدش قلل من مشاعر كريم أو قال عليها إنها مش حقيقة، بس للأسف كانت في الاتجاه الغلط، كريم كان عمال يصرف في مشاعر وأحلام قبل ما يركز هو بيشتري إيه؟!

فال فكرة كلها إن مهما كانت مشاعرنا صادقة وعظيمة تجاه أي إنسان ما ينفعش تكون إجبار أو قهر تجاه الإنسان دا إنه لازم يردها لنا بالمثل! فإذا بنا نحب بشر عندهم حاجة اسمها حرية! لو خلينا حبنا ليهم يسلبهم حريةتهم وكيانهم يبقى بنئذيهم وبنعذبهم! والأهم بنئذى نفينا ومشاعرنا.

في النهاية الطبيب النفسي الأمريكي «ديفيد هاوكلينز» بيقول:
(إن الأساس النفسي لكل الأحزان واحد وهو التعلق، ويحدث كلا من التعلق والتبغية بسبب شعورنا بأننا غير مكتملين بذواتنا، ولهذا نبتغي الأشياء والناس والأماكن وال العلاقات والمفاهيم لإشباع حاجاتنا الداخلية).

المهذا العاطفي

«ملعون أي حد مش واضح وسايبك تتسلل مع دماغك بسبب تصرفاته»

عجبتك الجملة؟ حسيت إن فيها قدر عالي من المنطق والعقلانية؟ آه طبعاً ما هي فعلًا غلطة الشخص اللي مش واضح وصريح.

تعالوا نفتكر مع بعض كدا إمتنى حصل وعي عاطفي؟ في مدرستك اللي كانوا المدرسين نفسهم بيهزؤوا البنت لو اتكلمت على أي مشاعر جواها أو الشارع اللي كان بيترق على الواد اللي يقدر مشاعر أي بنت وبيشجعه إنه يتحرش بيها عشان هي شمال؟! ولا البيت اللي لو طفل أو طفلة اتكلم في أي حاجة جواه يتسلّك بانه أكيد بعيد عن ربنا أو إنه لسه صغير على الحاجات دي؟! فاحنا حرفياً شوية مسوخ ماشين نبهدل في بعض عاطفينا ونفسينا!

نرجع معلش للجملة الأولى: (تسلل مع دماغك بسبب تصرفاته) هو مين اللي سحلك؟ مين سجنك في أوهامك وتحليلاتك العبرية؟ مين اللي خلاك تايه ومتش فاهم اللي بيحصل؟ تصرفاته؟! لا، دا عقلك! أو زي ما اتفاق في فيلم *la belle et la bête* noiseuse.

You get stuck inside of what you're searching for.

إنت بتتحبس في اللي بتدور عليه.

فال موضوع في الأساس، غياب المفهوم دا عند شريحة كبيرة في المجتمع، أن الإنسان هو المسؤول الأول عن سحله نفسه! عشان كدا بنلاقي الرجال الطويلة أم شنبات بتخرب بيولتها عشان فاكرة إن ستاتها بتخونها عشان فسروا كدا من «تصرفاتهم» أو سبات كبيرة المفروض عاقلة بتخرب بيولتها عشان برضو تفسرهم لـ«تصرفات» رجالاتها! وعيال مراهقة مسحولة حرفياً في حب وهمي، وبينات مراهقة في علاقة مع شباب *abusive* عشان هي متخيّلة إن هو بيعبها!

فالوضوح حاجة ثمن، أنا مهم بالشخص دا، حاكون واضح معاه، مش مهم فخلاص بقى! مش حيكون فارق معاي بقى واصل له إيه ولا مش واصل له إيه! هو فسر أو عاش في قصة فيلم من نسيج خياله، ربنا معاه بقى في نهاية الفيلم، محدش مطالب يشاركه في أحداته! فمن الآخر الوضوح دا عامل زي اللغة بين أي اتنين، رسائل أمان بيكلموا بيها بعض، لو مش موجودة في الأساس عمرها ما حتكون موجودة ولو بعد سنين.

دا مش أدب يا حبيبي،

دا قلة حيلة

being nice doesn't mean making yourself small for other people comfort

إنك تبقي إنسان لطيف مش معناه أبداً إنك تقلل من نفسك عشان تريح اللي حوليك

في اعتقاد غبي عند شريحة مش قليلة من البشر إن الإنسان المؤدب، الجميل، الطيوب هو اللي بيسمع الكلام دايماً، مش بيعمل شوشرة أو قلق، بيعدي كل حاجة عشان ما يهزم الشكل النمطي العام! وللأسف الاعتقاد الغبي دا هو المسؤول الأكبر في انتشار ظواهر القهر والخنوع في المجتمعات المتخلفة زي التحرش مثلاً، واللي ساعات بيكون عشان ما يتقلش على البنت مش متربية أو بتاعة مشاكل، المسؤول الأهم في استمرار العلاقات المؤذية سواء صداقات أو جوازات وإن الطرف اللي بيحب بجد لازم يسامح وما يوقفش علة الواحدة! مسؤول رئيسي في إن رجاله! ساعات بتكمel في وظائف أو علاقات مع ناس معهاها في الشغل بيستغلوهم أو بيهدنوهem عشان عيب يخون العيش والملح أو عشان ما يكترش الموضوع أصل الطيب أحسن! بس هو إيه الطيب في وجهة نظر المجتمع الخانع الظالم دا؟!

فأهم حد لازم تبقي طيب ولطيف وكوييس معاه هو «نفسك».. أو زي ما بيقال:

putting yourself first isn't selfish. It's necessary.

إنك تخلி نفسك رقم واحد دي مش أناانية، إنما ضرورة!

فالعبط إن يتم الخلط بين المفاهيم عشان نخلق كائنات سهلة الانقياد بحجة الأخلاق الحميدة والعفو عند المقدرة! الخبث هو اللعب بورقة الصعبنيات لما يكون الإنسان تعban أو مستنفذ فما فيش قوة في الكون تخلí الإنسان يصغر من نفسه أو من آلامه إلا وكانت قوة طاغية غير منصفة، قوة بتتغذى على استغلالك وابتزاز كل طاقتوك ونفسك! فالناس اللي يستحقوا فعلاً طيبتك وأخلاقك العالية هم اللي عمرهم ما حبيجوا عليك أو يقللوا منك، وأي محاولة من الإنسان للحد من وضع مش عاجبه أو الاعتراض على وسط مش مناسبه دي مش بجاحة أو جليطة، أو قلة طيبة وقسوة! إنما اسمها حق واحترام للذات.

فَكَ مِنْهُمْ

فيه جملة بتقول:

**Your Value Doesn't Decrease Based On Someone's Inability
To See Your Worth.**

قیمتک مش بتقل لمجرد إن شخص ما مش قادر يدرکها.

سبب مهم إن بعض البشر بيحسوا دايماً بصغر نفس، إنهم مش مصدقين من جواهم قد ايه هم غالبيين! فيبعوضوا الشعور دا، إنهم دايماً بيدوا أكثر بكثير من المطلوب! متخيلىين إنهم بكدا حيقدروا يستمدوا قيمتهم المسروبة في عيون اللي حواليهم.. ودا اللي بيخليلهم يصرفوا بذخ من تفكيرهم، عواطفهم، اهتمامهم.. بصورة تحسس اللي قدامهم إن اللي بيقدموه دا ما فيهوش عزة، بيقدموه عن رخص! بيتنازلوا عن أجزاء ولو بسيطة من كيانهم بشكل عفوياً أهطل من غير ما ياخدوا بالهم قد ايه الحاجات دي غالية عليهم! مش مدركيين إن وقتهم غالى ما ينفعش يضيع على ناس مش مقدراً، كلامهم وأفكارهم غالية ما ينفعش تتعرض قدام ناس ما يستحقوهاش، مشاعرهم غالية ما ينفعش تبقي زي الحنفية البايظة مفتوحة علي الفاضي والمليان! لدرجة إن حتى انفعالات زي الغضب أو الحزن ما ينفعش تكون على أي حاجة تافهه أو سطحية، فيه جملة بتقول:

IN ORDER TO INSULT ME I MUST FIRST VALUE YOUR OPINION.

عشان تهيننى، لازم الأول ادي قيمة لرأيك!


الكارثة إن الإنسان اللي مش بيتعلم الدرس دا من الأول، بيبقى زي متسلول
لقيمه، بيدور عليها في صفايح الزبالة! عاجز تحت رحمة أصحاب عقد النقص
والنفسيات المشوهة.. مباح ليهم! زي خزنة مفتوحة قصادهم بدون مقاومة..
مال سايب، بيمدوا اديهم يخطفوا منه اللي عاوزينه.. بيسرقوا من عمره وروحه
ومشاعره.. والسبب إنه مش مدرك قيمة غلاوة اللي بيتسرق منه!

في النهاية فيه جملة عظيمة بتقول:

When you realize your self worth you'll stop giving people discounts!

لما تدرك قيمتك الحقيقية حتبطل تدي الناس خصومات!

ناس مؤذية



(ليسوا أشرازاً بل إنهم أغبياء، الفرق مختلف جداً. فالشَّر يُستلزم وجود عمق أخلاقي، وقوه إرادة وذكاء. أما الغبي فلا يستعمل عقله للحظة، بل يذعن لغرائزه كأي حيوان في الحطيرة، مقتنعاً بأنه يتفاعل باسم الخير، وبأنه دوماً على صواب. إنه يفتخر بنفسه لقدرته على إزعاج جميع أولئك الذين يراهم مختلفين عنه بانتماماتهم وألوان جلدهم، وأرائهم ولغاتهم، أو لمجرد أهوائهم. هذا العالم بحاجة إلى مزيد من الأشراز، وإلى أقل عدد ممكن من الأغبياء).

الروائي الإسباني «كارلوس زافون».

للأسف مش كل الناس شخصيات سوية، بالعكس فيه اضطرابات تربوية وسلوكية كبير حوالينا أدت لأنحرافات مهولة بين البشر.. أدت لا personality disorder (اضطرابات الشخصية) والتي منها الشخصية النرجسية، السيكوباتية، هستيرية.. وغيرهم من أنواع مختلفة من الشخصيات بتميز بالتلعب بالبشر وعدم وجود مشكلة في الأذية للآخرين! واللي آسف ممكن يكونوا من أقرب الناس لينا، زي أب، أخ، زوجة.. ناس بنحبها ولينا معاهم ذكريات كويسة! وعشان كدا بيطلب التعامل معاهم نوع خاص من الفن، واللي آسف بيتفتقده صديقنا الإنسان المهزأ!

لكن قبل ما نخوض في الكلام عن الناس دي، محتاجين نأكد إن من أهم أساس فن التعامل مع الكائنات المؤذية دي، هي إدراك حقيقة إنهم مش شياطين ماشية على الأرض، أو إن طول الوقت بيستغلوا ويئذوا الناس.. إنما دول بشر عادية جداً، فيه في حياتهم برضه لحظات كويسة! وفيه ناس شايواهم ملايكة مش بيعلطوا!!

فمدير الشركة اللي بيتحرش بالموظفة اللي عنده، كل يوم بالليل بيحكى لأولاده قصص ويحضنهم قبل ما يناموا.. صاحب المشروع اللي سرق فكرة الشاب اللي لسا متخرج، مشترك مع مجموعة خيرية بتخدم كبار السن.. الصديقة اللي بتخون صاحبتها مع خطيب صاحبتها، واحدة بارة جداً بأهلها.

فالكائنات السامة دي قديسين ومثل أعلى في عالم تاني! وهي دي اللقطة، إدراك الإنسان إمكانية وجود لحظات خير وإحسان في حياة الناس الظالمة الدينية! لحظات جميلة بيعرفوا يداروا فيها جوهرهم الفاسد، ويمروا فيها عقدتهم الدفينة. فالحقيقة دي مهمة جداً عشان هي دي مفتاح استيعاب الفرد لأصل الطبيعة الإنسانية وإدراك أساس التعامل معها، إن عادي جداً الشخص يقضي يوم كله تقوى وخير، لكنه سبب أذى وهلع لإنسان ما!

روحوا اتعالجوا

وتعالوا عاملونا

Avoid people who use their pain as an excuse to hurt you.

تجنب هؤلاء من يستخدمون آلامهم كعذر لأذيتك.

فيه إقتناع ما -غريب- موجود عند شريحة كبيرة من البشر إن:

(فلان دا كلامه دبش بس طيب)

(فلانة لسانها مؤذن بس غلبة)

اللي هو طبيعي إن الإنسان يكون جوهره طيب بس غصب عنه -يا حرام- مش بيقدر يتحكم في أعصابه فبيئذى اللي حواليه! لا، دا كمان ساعات بنلاقي أفكار من نوع (الناس اللي ساعات بتضايقك دي بتكون أحسن ناس عليك)، (الراجل اللي بيترفز على مراته دا عشان بيحبها!), وحاجات كدا فيها مقدار بشع من المازوخية وقلة قيمة للإنسان.. والحقيقة أنا مش عارف هل الأفكار دي نابعة من جهل حقيقي، ولا عشان الإنسان يواكب كم السادية اللي حواليه؟

فمن أهم صفات الإنسان السوي إنه مهما عمل أو انفعل ما يتعداش على مشاعر الآخر! لدرجة إن أهم علامة في الشخص الـ *Psychopath* (الشخصية السيكوباتية) هي عدم وجود أي مشكلة عنده في تجريح أو أذية مشاعر الآخر! فالمشاعر الـ *empathy* (الشفقة) تقاد تكون منعدمة في الشخصيات دي.. وللي طبعاً بيلاقى لها مبرر لأذاه دا زي: (أصل أنا عاوز الآخر أفضل - عشان يتعلم - أصل هو اللي غلط في الأول - معلش أنا تحت ضغط! إلخ).

بالمناسبة في جملة بتقول *Hurt people hurt people*, اللي معناها إن الناس اللي أتآذت بتئذى اللي حواليها، فآه ممكن يكون الشخص الدبش اللي لسانه مؤذن ومش بيراعي مشاعر حد دا نتيجة أذى ما ا تعرض له.. كان في وقت ما ضحية مسكينة، بس هو حالياً بيشارك في دائرة الأذية، حتى ولو كان مجني عليه قبل كدا.. لكن مشاركته دي بتتصنع منه جاني! ما يختلفش كثير عن اللي كان السبب في أذاه.. ففكرة إنك تؤذن حد بكلمة أو ب فعل دي ما فيهاش هزار أو جدال! مشاعر البشر خط أحمر، فما بالك بالناس اللي بتحبنا ومأمنين لينا؟ وعلى الناحية الثانية ما ينفعش يتم خلط المفاهيم بالشكل البائس دا! الإنسان المؤذن مؤذن! لا بقى أصل هو من جواه كان عاوز إيه ومن براه كان يقصد إيه! والكلام اللي بيعكس شخصيات ضعيفة لا حول لها ولا قوة!

في النهاية ممكن يكون تبرير السلوكات المؤذنة دي على أنها طبيعية أو

مقبولة، نایع ان في بعض البشر عايشة في البالونة الوردي بتاعة الحياة المتألية، أو يمكن عاوزة توهם نفسها إنها عايشة فيها، عشان الواقع بيذكرهم دايماً باختياراتهم السيئة أو ضعفهم على تغييره! بس دي مش مجرد غلطة بسيطة، إنما دي جريمة بشعة.. هييجي وقت ومش هيلاقوا حد بيدفع تمنها غير هم نفسهم من نفسيتهم المستهلكة وأحلامهم المسرقة.

قلب الترابيزة

الـ turning tables - قلب الترابيزة، في مقالة على موقع psychcentral بعنوان 6 Ways The Narcissist Turns the Tables on You (ست طرق الشخص النرجسي بيقلب بيهم الترابيزة)، سيتم شرح استراتيجية الإنسان النرجسي في السيطرة على ضحيته من خلال أسلوب (قلب الترابيزة)..

• بيمارس سيطرة خفية:

النرجسي ذكي، مش بيظهر إنه كائن بيحب يسيطر على اختيارات أو قرارات اللي معاه، بالرغم من إنه بطريقة غير مباشرة مش بيقبل بأي حاجة مش متوافقة مع قناعاته أو رغباته.. من أصغر تفصيلة زي (حناكل إيه النهاردا؟!) لأكبر خطوة زي (هنتشري الشقة دي ولا لا؟!).. فبالشكل دا هو بينجح إنه يخلي اللي معاه زي اللعبة في إيده.. هو اللي بيأخذ قراراتهم ويرسم لهم خطة واللي طبعاً لو اعترضوا أو رفضوا الأسلوب دا، يبقي (ما بقوش يثقوا فيه زي الأول؟!), (ليه مصممين يعandوا فيه؟) والكلام الانفعالي الساذج دا! اللي بيتعمد من خلاله يشوش على فكرة سيطرته الكاملة باللعب على وتر التغيير المفاجئ في شخصية شريكه!

• لازم يخليك تفقد توازنك / بيتلاعب بأفضل صفاتك:

دايماً الشخص النرجسي عشان يعرف يقلب الترابيزة صح بيتدى يعمل سلوكيات عكس بعض عشان يركب الغلط، فمثلاً تلaciه بيتصل بيك كل يوم ويتوافق معك لكن فجأة يقطع ويختفي! دايماً يتعمد يخليك مش فاهم هو بيعمل إيه أو عاوز إيه؟! هو دايماً مش واضح.. فعدم وضوحته دا مبرر قوي إن سلوكك تجاهه برضه يبقى مش واضح، فعلى طول بيتدى يعاتبك إنت على عدم وضوحك! وخصوصاً لو إنت شخصية طيبة أو حنونة أو ما لكش في حوارات التلاعيب المرهقة دي! فيكون الكلام على: (إنت ازاي ما اهتميتش بيّ كدا؟!).. (إنت ليه بتعاملني بتتكبر وإهمال؟!).

• دايماً بيستخدم فكرة تخويفك / وترهيك من الندم في المستقبل:

النرجسي عشان يوصل اللي عاوزه، لازم يعيش اللي معاه تحت خوف دائم، دايماً اللي جاي فيه قلق وتوتر.. وإنه هو الأمل الوحيد قصاد المستقبل المجهول، مع إن الواحد لو هدي شوية وخرج برا تسلط النرجسي، هيلaci إن كل المشاعر السلبية دي! من إنتاج الشخص النرجسي نفسه! فعشان يخليك تعمل اللي هو عاوزه، بيخلق لك جو من الخوف الوهمي.. عشان لما تحصل كارثة بسببه يفضل يقول لك: (أنا قلت لك!), (أنا حذرتك!).. بدل ما يكون مصدر أمان وثقة ليك ويساعدك على التغلب على مخاوفك، لا دا حبه المريض لنفسه بيخليله ساجنك جنبه!

• بيعزلك عن أي حد:

لازم يشوه لك أصحابك، قرایبک، أي حد ممکن يكون مصدر تهدید له.. لازم يخلي نفسه هو الوحيد في حياتك! ويبقى بيحطك دايماً تحت ضغط! يا أنا يا هم؟ فالنرجسي أضعف بكثير من إنه يتعايش مع حد مختلف عنه وعن أفكاره.. ودا اللي بيخليله يمارس أسلوب قلب الترابيزة بسهولة.. إنك دايماً حاسس إنك لوحده قادر.. فحتى ولو ساعات مش مقتنع لازم تعدي عشان ما لكش غيره!

في النهاية، إتقان الشخص النرجسي لأسلوب قلب الترابيزة مبني على نظرته المهيأة للأخر في العموم، فشريكه سواء عاطفي أو مهني أو اجتماعي، ما هو إلا امتداد لأفكاره وطموحاته! مجرد تابع لنزواته! فهو ما عندوش حاجة اسمها آخر له كيان وشخصية ممکن يتناقش أو يعارض! فالناس حواليه عرايس لعبه بتحقق خططته ومتطلباته.. فالنرجسي ما يقدرش يكون في علاقة غير وفيها قلب مستمر للترابيزة.. للأسف هو ما يقدرش يتواجد غير لو سيطر بالكامل على كل اتجاهات الترابيزة..

بَطْلَنَا الَّيْ يَعْظِلُنَا

«لك الحرية الكاملة في أن تتحدث معي أو لا، ولكن لا تشبع فضولك وترحل».

أو زي ما بيتفقال:

Never be someone's sometimes.

من أبغض الجرائم النفسية في حق الآخر، هو استغلال الآخر كوسيلة للوصول
لحالة ما حتى ولو الحالة دي إيجابية، حتى ولو الحالة دي حب أو مودة!

ف ساعات المشكلة مش بتكون إن الإنسان كداب أو مخادع، إنما بتكون عشان
مراهق وأناني، مش مركز غير على نفسه! فهو صادق في شعوره بس مش ناضج
كافية إنه يدرك تأثير شعوره دا على الآخرين.. هو حقيقي في كل حاجة حاسسها،
وكل كلمة بيقولها، بس ما عندهوش المروءة والشهامة الكافية إنه ياخد باله من
توازع أحاسيسه دي على اللي حواليه.. دا ساعات الكارثة بتبقى إن هو نفسه مش
عارف توازع أحاسيسه دي على نفسه إيه؟!

ففيه جملة بتقول:

**Don't waste somebody's time just because you don't know
what to do with yours.**

ما تضعيش وقت شخص ما لمجرد إنك مش عارف تعمل إيه بوقتك!

فصلابة العلاقات الإنسانية بتتقاس بناءً على احترام متطلبات الآخر مش إشباع
نزوالت النفس.. مش الشخص عاوز إيه دلوقت، إنما هيقدم بعد كدا إيه للي معاه؟!
مش منساق ورا سد احتياجاته الشخصي، إنما واعي بمسؤوليته وواجبه تجاه
الطرف الثاني!

فما تضييعوش وقتكم وطاقتكم مع أشخاص مش عارفة تعمل في وقتها إيه!
في النهاية، نظرة الإنسان المتدينة لذاته، بتخليةه يتعلق بأي حد يدي له شوية
تقدير أو حبة اهتمام.. يرمي نفسه على أي حد يقول له كلمة حلوة.. يثق ثقة
عمياء في أي حد يوهمه بوعود رنانة فارغة! نظرة الإنسان المتدينة لنفسه هي
المؤول الأساسي إنه يبقى زي الـ«جردل» بيتدلى قصاد أي حد يعوضه شعوره
الناقص من التقدير أو الاحترام! زي الجعان اللي ماشي يدور على أي حاجة تسد
جوشه في صفايح الزبالة!

فلما الإنسان بيدرك إنه فعلًا مش بالسوء اللي شايف بيده نفسه، إنه مليان حاجات
كثير حلوة في عيون نفسه وعيون اللي بيحبوه! لما ينفصل عن نفسه كل التشوهات
اللي اتلزقت جواه بسبب تربية مختلفة أو تجربة فاشلة.. ساعتها هيصدق إنه أكبر

من إنه يستجدي أي تقدير أو اهتمام.. إنه ما يصحش يبقى جردل من أول انطباع يفقد توازنه ويوقع لأي حد! هيبقى شبعان بنفسه، في غنى إنه يتعب أو يصارع أو يدوس على راحته وقناعاته عشان بوافي أكل معفن في صفائح الزيارة.

فالطبيبة النفسية «سوزان فوروارد» بتقول:

(إن الطفل الذي أساء له أبواه لا يتوقف عن حبهما، بل يتوقف عن حب نفسه)

ففكرة حب النفس فكرة تربوية في المقام الأول، إن الإنسان يتعلم ويدرك ويؤمن بعمق إن لنفسه حق حب واهتمام عليه! ومن هنا بتتولد فكرة إن (أنا كائن أستحق أتحب).. ففياب المفهوم دا هو اللي بيخلق كائنات مسكينة حوالينا عايشة بتقلل من نفسها ومن قدراتها عشان مش شايفة نفسها تستحق الحب! دايما شايفة نفسها أقل من حقيقتها، الكائنات دي بتبقى ضحايا لمرضى عقد النقص والنرجسيين والشخصيات السيكوباتية! والسبب إن من وهو صغير ما اتغرسش جواه إن قد إيه هو مميز ويستحق الحب...

ما يصعبش عليك غالى

«ينتهي الإنسان عندما يشفق الإنسان على نفسه».

إلياس خوري

من أهم مهارات فن التعامل مع البشر.. إدراك الإنسان، إنه مش مطالب بالبحث أو التفسير لسلوك وتصرفات كل الناس اللي حواليه.. فيه جملة بتقول:

Stop overthinking why people did You bad. They did it, they Meant It! Move On.

ف ساعات اللي بيكون أسوأ من استغلال أو أذى الأشكال المؤذية، هو غباء وجمود تفكير الإنسان نفسه.. فكرة إنه عاوز يفهم قناعات وطريقة تفكير الناس اللي حواليه! فيسحل دماغه ويضيع طاقته في دوامة مالهاش أي لازمة من الا(ليه): «لية عملوا فيا كدا؟»، «لية خانوا العيش والملح؟»، «لية حصل كدا في الوقت دا بالذات؟!»، ليه وليه... إلخ! وكل التشتيت والمتأهنة دي عشان هو مش عاوز يعترف بواقع حصل! مش عاوز يتقبل قدام نفسه إنه ا تعرض لخسارة أو معاناة! مش عاوز يهدم الواقع المثالي الحلو اللي عايش فيه بحقيقة وجود أشكال مؤذية ما عندهاش أي مشكلة في استغلاله وأذيته بدون أي منطق أو حكمة! فيبقى ا تعرض للضرر في الأول من الفعل نفسه، وضر هو نفسه مرة تانية بحالة الرثاء البائس على وضعه.. حالة مخزية من الشلل النفسي والعطلان!

فما فيش حد بيكتب حرب يانه يفضل مسجون في ماضي خسارة معركة قديمة.. إنما الحياة بتتمشي عشان لازم تمشي! تفكير المحارب في مدى حقاره العدو ووحشيته مش هتضمن له البقاء، إنما بتركيزه وشغلة على أرض الواقع.. واللي بيحتاج نوع مميز من الشجاعة.. شجاعة الاعتراف بالسقوط والقدرة على الاستكمال..

في النهاية عملية فهم الآخر، عملية غالبة قوي ما ينفعش الإنسان يهدرها على أي حد.. فاحنا بنفهم الآخر لما نكون عاوزين نقرب منه، لما نكون مهتمين ببقى جزء من حياتنا! يمكن الإنسان لو صدق فعلًا في قيمة نفسه، هيستوعب إنه مش كل الناس تستحق إننا نتعب في فهمها، مش كل الناس تستحق تستحوذ ولو على حيز بسيط من وعيينا وإدراكتنا.

Traumaوعي الـ

من حوالي سنتين، كان فيه صديقة لي بتحكي لي عن موقف حصلها، وهي عندها ١٤ سنة.. كانت راجعة من المدرسة في يوم عادي جداً لقيت واحد راكب على موتوكيل في الشارع اتحرش بيها جسدياً (لمسها من مكان في جسمها) وطلع يجري.. البنت دي رجعت البيت في حالة صدمة وفضلت تعيط لدرجة إن أهلها ما كانواش فاهمين هي بتعطيه ليه؟! وهي ما حكتش لحد عشان كانت مش عارفة تقول إيه! الموضوع فضل مأثر فيها لفترة طويلة، كانت عايشة في حالة من القرف الشديد من نفسها وجسمها لغاية من فترة قريبة قدرت تتجاوز الموضوع، بس بعد ما الموضوع ساب جواها ندبة نفسية عنيفة!

في مقالة بعنوان It's Not Your Fault: Overcoming Trauma بتقول Lisa Firestone إن كتير كتير من البشر حياتهم بتنهار عشان مش قادرین بوصلو للقناعة دي: «It's Not Your Fault».. «إنها مش غلطتك».

فيبيقوا كانوا مثلاً مع أهل عندهم مشاكل نفسية وبيؤذوهم بالمشاكل دي، بس يعيشوا في لعنة إن هم كانوا السبب في وجود المشاكل دي في أهاليهم!

يدخلوا علاقات مع شخصيات غير سوية وتنهار العلاقات دي، فينهاروا معاها ويتسجنوا في وهم إن الغلط اللي حصل في العلاقة والمصير المأسوي اللي وصلوا له دا من مسؤوليتهم!

ومواقف كتير ياما بيمر فيها شريحة مش قليلة من البشر بيعيشوا ذنب مش بتاعهم أو زي ما Darius Cikanavicius قال عليه الـ False responsibility أو الـ Toxic Guilt، اللي سبب أساسي فيه إن الإنسان بيكون مفتقد لوعي وثقافة إدراك حدوده ومسؤولياته.. فأي كارثة تحصل له يفسرها إنها عشان هو مقصراً أو ما عملش اللي عليه!

فالكاتب Brian Tracy بيقول:

You cannot control what happens to you, but you can control your attitude toward what happens to you

إنت ما تقدرش تتحكم في كل حاجة بتحصل لك، بس تقدر تتحكم في سلوكك تجاهها..

فهي دي الحكاية كلها: الإنسان آخره إيه؟!

هل البنت صديقتي ليها ذنب في الكائن السافل اللي أذاها؟ هل الإنسان له يد في أهله اللي ما اختارهمش؟ هل لو حد دخل علاقة واكتشف مع الوقت إنه اخدع، هل مسؤوليته إنه المفروض كان يشم على ضهر إيده؟ وهكذا.

فالإنسان لازم يتقبل حقيقة إن مش كل حاجة مؤذية حصلت له في حياته هو مسؤول عنها! وإن الشخصيات اللي بتحاول تقنعه بكدا هي كائنات سامة بتشارك بشكل أصيل في أذى وتدمير الإنسان دا!

ففي النهاية فيه مقولة منسوبة لـ Theo Fleury بتقول:

Trauma Is Not Your Fault, But Healing Is Your Responsibility.

الصدمة النفسية مش غلطتك، بس التعافي منها دا مسؤوليتك.

فالإنسان الناجح هو اللي ما يسحلش نفسه في دائرة مفرغة من جلد الذات المرضي، إنما يكون مركز قوي هو يقدر يعمل إيه ومايقدرش يعمل إيه؟! مايحقلش نفسه البشرية المسكينة عباء مش بتاعها، ويفضل نازل فيها توبيخ واستحقار، متخيّل إنه بكدا هيقدر يتجاوز الشعور القاسي بتاع الإخفاق أو ظلم الحياة! إنما بالعكس، دا بكل مرة بينفصل عن ذاته بيعمق شعوره الداخلي بالخجل والعوار، كل مرة يحمل نفسه مسؤوليات ما لوشن يد فيها كل ما يتدفع تحت قاع من التشوه والعقد النفسية.

قبول وجودنا في حياة غير عادلة، مع شخصيات غير سوية بلا مشاركة معاً أو مسؤولية في دا.. هو شرط إلزامي للقدرة على التجاوز والتواصل مع خوازيق الحياة.

ما فيش حد مش محتاج حضن!

في جملة بتقول:

Acting like you don't have needs is a trauma response.

ادعاءك إنك بلا أي احتياجات، ممكن يكون نابع من مرورك بصدمة ما...

في مقالة مهمة جداً بعنوان 21 Common Reactions to Trauma يقول Seth J. Gillihan إن البشر بتعامل مع الصدمات بردود أفعال مختلفة، والتي من أهم ردود الأفعال دي هو (فقدان الثقة في الآخرين)، والتي طبعاً عشان الإنسان يعرف يثبت القناعة الجديدة عليه دي في إدراكه، بيبيتدي يقنع نفسه إنه مش محتاج حاجة من حد، إنه قوي لوحده! فاحتياجه لأي شخص بيعكس مدى ضعفه وبيخل فيه يقع في مشاكل وصدمات.. ومن هنا بيبدأ يقمع ويكتب أي احتياج جواه سواء بقى *emotional* (عاطفية) أو *psychological* (نفسية).. والتي طبعاً بيخلق كائن مشوهة قادر يخلق أي تواصل طبيعي مع البشر أو حتى مع نفسه.

الموضوع عامل زي واحد كان جعان راح يجرب أكل من مطعم معين، لحظه السيئ أو لعدم تركيزه في اختياره دا -بحكم طبيعته الإنسانية- طلع الأكل مش كويـس.. فبدل ما ياخـد الموضوع بشكل سلس ويتعلم من الغلطة دي، لا دا اتأثر جامد جداً.. إزاـي وهو الـ perfectionist اللي مـايـغـلـطـشـ في أي حاجة، يمر بتجربة فشـلـ زيـ كـداـ؟! إزاـيـ وقتـهـ وـمـجهـودـهـ وـفـلوـسـهـ يـضـيـعـواـ فيـ الـهـواـ كـداـ؟! لاـ، دـاـ لاـ يمكنـ يتـكرـرـ المـوـضـوـعـ دـاـ تـانـيـ! شـوفـ ليـ ياـ اـبـنـيـ إـيـهـ الـلـيـ خـلـانـيـ منـ الـأـوـلـ أـرـوـحـ المـطـعـمـ السـيـئـ دـاـ؟! جـوعـيـ؟! حاجـتـيـ لـلـأـكـلـ؟! تـامـ.. طـبـ ماـ فيـشـ حاجـةـ لـلـأـكـلـ تـانـيـ!

فكرة إنسان بلا احتياجات نفسية أو عاطفية دي مش قوة! إنما دي حاجة غير سوية.. فمش من الطبيعي أو الحكمة إن الإنسان يكون غير محتاج لمشاعر أو بشر، إنما الحكمة الحقيقة هو التعامل الناضج مع الاحتياجات دي.. فمش معنى إن الحاجة خانته مره إنه ينكر وجودها، إنما يروضها بعقله ويتعايش مع حتمية وجودها بعزة واتزان.

(عاز على البشرية أن ينتحر أحدهم وقد كان في حاجة إلى عناق طويل).

أبـيرـ كـامـوـ

فادعاء الإنسان إنه مش محتاج أي حد في حياته أو أي مشاعر إنسانية بيعكس

جواه احتجاج عنيف ودفين تجاه الحاجة دي، ممکن بشكل غير مباشر يائز على سلوكه ونفسیته، فهو من برا صامد بيقاوم طبیعته بقسوته وعناده، بس من جوا هو بيتأکل.. الجوع بینهش في روحه وكیانه.. بیزعق وبيرفض بشراسة أي احتجاج..
بس في أعماقه فيه طفل صغیر بیستجدي أي شفقة أو احتواء!

عشاق ضيق التنفس

فريدرick نيتشه بيقول:

What Doesn't Kill You Makes You stronger.

اللي مش بيقتلk، بيخليك أقوى..

طب يحصل إيه لو جه ما لقاش نفسه بقى
What Doesn't Kill You والإنسان ما لقاش نفسه بقى
!stronger

في قناعة -غريبة- عند كثيـر من البـشر، إن قـوة وكـفاءـة الإـنسـان لـازـم تكون مـربـوـطة بـتـعرـضـه لـ traumـا أو أحـدـات عـنيـفة.. لـدرجـة إن سـاعـات فيـهـ أـهـاليـ بيـعـاـيرـوا ولـادـهـم وـبـنـاتـهـم إنـ شـخـصـيـتـهـم ضـعـيفـة عـشـانـ ماـ شـافـوشـ قـهـرـ أوـ ذـلـ فيـ حـيـاتـهـمـ!

فالـحـقـيقـة إنـ فـيـهـ نـاسـ خـرـجـتـ بـعـدـ الصـدـمـاتـ قـوـيـةـ، بـسـ فـيـهـ نـاسـ تـانـيـةـ خـرـجـتـ أـصـعـفـ وأـشـدـ تـشـوـهـ! وـدـاـ يـمـكـنـ عـشـانـ الـفـكـرـةـ مشـ بـتـكـونـ فـيـ الـصـدـمـةـ عـلـىـ ماـ بـتـكـونـ فـيـ جـوـهـ الرـإـنـسـانـ نـفـسـهـ، هـوـ شـخـصـ قـوـيـ أـصـلـاـ فـعـرـفـ يـتـمـاسـكـ أوـ يـوـاجـهـ.. شـخـصـ قـوـيـ مـنـ قـبـلـ الصـدـمـةـ.. مشـ بـفـعـلـ الـصـدـمـةـ!

كانـ فـيـ جـمـلةـ قـرـبـتهاـ قـبـلـ كـدـاـ بـتـقـولـ:

What Doesn't Kill You Gives You Unhealthy Coping Mechanisms and A Dark Sense of Humor.

الـلـيـ مشـ بـيـقـتـلـكـ، هـيـخـلـيـ عـنـدـكـ آـلـيـاتـ تـأـقـلـمـ مـعـ الـحـيـاةـ غـيرـ الصـحـيـةـ وـذـوقـ أـسـودـ مـنـ الفـكـاهـةـ!

فـفـكـرـةـ اـسـتـحـسـانـ الـ traumـاـ تـحـتـ مـبـرـرـ إنـهـ عـامـلـ مـهـمـ فـيـ نـضـوجـ شـخـصـيـةـ الإـنـسـانـ.. فـكـرـةـ فـيـ غـايـةـ الـفـظـاعـةـ وـالـسـطـحـيـةـ! فـكـرـةـ مـؤـذـيـةـ لـأـيـ حدـ بـيـمـرـ بـأـوـقـاتـ صـعـبـةـ، وـحـاسـسـ بـضـعـفـ أوـ أـلمـ.. حـاسـسـ إـنـهـ مشـ !strongerـ فـمـجـرـدـ شـعـورـ الإـنـسـانـ إـنـهـ مـنـ الـمـفـتـرـضـ يـخـرـجـ بـعـدـ أـيـ traumـاـ وـحـشـ كـاسـرـ أـقـوىـ مـنـ أـيـ حدـ!ـ وـإـذـاـ بـيـهـ يـتـصـدمـ بـوـاقـعـ عـكـسـ كـدـاـ.. وـاقـعـ فـيـهـ مـشـاعـرـهـ الإـنـسـانـيـةـ الـمـتـضـارـيـةـ وـأـفـكـارـهـ الـمـتـصـارـعـةـ الـهـشـةـ!ـ كـلـ دـاـ كـفـيلـ إـنـهـ يـهـزـ ثـقـتهـ فـيـ نـفـسـهـ وـيـخـلـيـ أـيـ فـرـصـةـ لـلـنـجـاهـ مـنـ الـ traumـاـ دـيـ تـنـهـارـ قـدـامـ شـعـورـهـ الدـفـينـ باـحـتـقـارـهـ لـذـاتهـ.. وـاستـصـغـارـ قـدـراتـهـ عـلـىـ التـجاـوزـ وـالـتـعـاـفيـ.

فـ فـيـ traumـاـ What Doesn't Kill You مشـ شـرـطـ يـخـلـيـكـ strongerـ وـلـاـ حـتـىـ شـرـطـ يـخـلـيـكـ weakerـ.. مشـ شـرـطـ يـخـلـيـكـ أـيـ حاجـةـ!.. عـشـانـ المـوـضـوعـ عمرـهـ مـاـ كـانـ مـتـوقـفـ عـلـيـهـ.. إـنـمـاـ طـوـلـ الـوقـتـ مـتـوقـفـ عـلـيـكـ.

علاقات سامة

في جملة بتقول:

(الشخص الذي يحبك، سيجعلك تقع في حب نفسك أولاً).

ما ينفعش نخلص فصل الناس المؤذية قبل ما نشير للنقطة دي.

زميل في الشغل ليك بي Shirley شغله وبيغيب وبيطلب منك تغطي على غيابه وتකدبو حد سالك، وانت رفضت تعمل كدا، دي مش قلة أصل أو قلة جدعنة أو ندالة! دي حقوقك! واللي أبغضها إنك ترفض تعمل حاجة مضايقاك!

خطيبك بيخليلك تعمل حاجة انتي مش بتحببها ولما تعلني عن استياءك يفضل يقول لك هو انت ما بتحببنيش؟! أو هو انت ليه بطلت تحببني؟! دا مش حب، ولا انت قليلة ذوق ولا عديمة الوفاء.. إنما دا برضه حقك.. إنك تكوني في علاقة مش حاسة بضغط فيها، وخصوصا إنه ضغط قائم على نزعة أنانية لطرف واحد، مش ضغط بتمردوا بيهم الآتين سوا عشان مستقبل أفضل أو خطوة أكبر قدام!

خلط مفاهيم زي الإخلاص أو الجدعنة مع سلوكيات زي الابتزاز أو الاستغلال بيخلق جوا الشخص تشويس عنيف تجاه نفسه وتجاه اللي حواليه! فهو لسا متمسك بانصياعه للسلوك المستغل دا تحت مسمى إنه مش من الأصول إنه يقل مع صاحبه أو حبيبه.. وفي نفس الوقت عمال يدي مبرارات لعقله اللي في كل مرة يفضل يهزأ فيه ويوبخه إنه مستمر في الوضع المهزأ عديم الإرادة دا! واللي بيكون رده على عقله: «يعني انت عاوزني أبقى شخص وحش مع ناس كويستة معاي؟!».

لأنه مش ناس كويسته معاك أبداً.. ما فيش حد ممكن يكون كويست معاك يوصل لك للصراع الصعب دا! واللي في الحقيقة هي في الأساس غلطتك! إنك كاتم في نفسك ومستمر، فأبسط دفاع عندهم: «إحنا كنا فاكربيه عادي» أو «إحنا ماكناش متتصورين إن الموضوع بيضايقه كدا!».. فزي ما بيتفاق:

(العلاقة السيئة ليست التي لا يعجبك فيها الطرف الآخر، بل التي لا تعجبك فيها نفسك!).

فانت عمرك ما هتبقي وحش لما تكون حازم وواضح في تحديدك لطريقة تعامل الآخرين معاك.. إنما لو فضلت سايب الدنيا عايمة تحت أي مسمى أنت بتقنعن بيها نفسك، فانت كدا فعلًا وحش بس مع نفسك! فأول خطوة تعاملها لما تحس إنك مجرور لأفعال أو سلوكيات مضايقاك أو مش متناسبة مع طبيعتك هي إنك توقفها! وتنعزل بفكك بعيد عن الدوشه عشان تقدر تعمل حدود وقواعد للأفعال والسلوكيات دي.. و ساعتها هتوصل إنك بكل شياكة تعذر لاي حد بشكل ناضج وعقلاني عن استكمالك في أي دور مش عاجبك! واللي وقتها لو حاول يبتزك أو

يتلاعب بيك إنك اتفيرت وما بقيتش الشخص الطيب الكيوت بتاع زمان، اعرف إن الشخصية دي هتفضل طول عمرها مش راضية عنك غير لو رجعت لصورتك القديمة المطيبة الراضاخة.. واللي ساعتها يبقى البعد عن الناس دي هو السبيل الوحيد للراحة والسلام النفسي.

في النهاية، أول خطوة لقدرة الإنسان للتعامل مع الناس المؤذية هي إدراك إن أي شعور سلبي هو بيمر بيه كان سببه شخص تاني، فهو مشارك في الشعور من خلل سماحه للشخص دا من الأساس.

أهالى ربنا يسامحهم

شوية سلوكيات مؤذية بيمارسها الأهالي مع أولادهم:

٠ «أنا أبقي أستاهم ضرب الجزم، لو قلت لكم حاجة تاني».

• «هو بيحبني.. بس دا مش وقته»

فكرة إن الابن أو الابنة يحس إنه يخاف يتكلم عشان بابا ما يشوش فيه أو ماما تتنرفز عليه واللي بتبتدي من وهو صغير إنه بيكون بيجرى على حد من أهله عشان يوري له حاجة هو فرحان بيها فيتزعق له عشان مش وقته! والسبب ببساطة عشان الأهالى مش عارفة تتحكم في نفسها أو عاوزة تنفس غضبها في كائن أضعف! بس طبعاً بيبرروا سلوكهم غير الناضج دا بـ «إحنا بنربيه إن الدنيا مش كلها لعب» أو بـ «عاوزين نخلية يعرف الواقع الحقيقى بتاع الكبار».. والمدهش بقى إن الولد أو البنت خلاص بقى لا وعيهم يقول لهم بابا أو ماما مش هيركزوا معакم أو ما لوش فايدة الكلام أو مشاركة تفاصيل الحياة معاهם.. فيرجع الأهل يشتكونوا إن أولادهم مش بيتكلموا معاهم!

• «كان نفسي أبسط لهم، بس مش عارف».

فكرة مقايضة شعور رضا الأب والأم عن أطفالهم بفعل معين، يعني هنحبك لو طلعت الأول في الفصل، لو كسبت المسابقة، لو بقيتي أشطر من بنت صاحبتي في الشغل، لو نفذتي خطتي في الحياة اللي أنا راسمها لمستقبلك! وموافق كتيرة جداً الأهل بيوضلوا لأولادهم شعور الحب المشروط، اللي هو لو ماعملتش اللي احنا عاوزينه منك فانت ما تستحقش حبنا! اللي ساعات بتبقى حاجات نابعة من (أنا) الأب أو الأم.. فهو عاوز يحس بزهو أو فخر معين فيلزقه في ابنه أو بنته! ويبقى الطفل حاسس بعبء المسؤولية إنه لازم ينفذ لهم اللي هم عاوزينه.. والكارثة إنه لما يكبر ويكتشف تعارض الطلبات دي مع طموحه الشخصي.. فبابا عاوزني أقدر

معاه بس أنا عاوز أساافرا! ماما عاوزاني أتجوز فلان بس أنا مش حاسة ناحيته
بحاجة! فيتلخلق عندنا رجاله كبار وستات عندهم عقد نقص وخلل كبير في تقوتهم
بنفسهم وقراراتهم!

• «هم إزاي شاييفيني وحش كدا؟!»

«هي اللي زيك بتخس يا عجلة؟!»، «أنت فاكر نفسك مجدي يعقوب يا اللي مش
عارف تجيب الدرجة النهائية في امتحان علوم؟..» ولحظات كثيرة ساعات الأهالي
غير المهيأة ل التربية أطفالهم بيتخيلوا إنهم لما يستخدمو أسلوب (تكسير) أطفالهم،
إنهم كدا بيحفزوهم! مع إنهم فعلًا بيذمروهم! تخيل كدا أكثر حد في العالم
المفروض يديك ثقة ودعم كل ما يشوفك يقول لك: «يا فاشل» أو «يا أم كرش»..
أكيد هتبقى حاسس إن إزاي كان دول شاييفيني كدا، أمال اللي برا شاييفيني إزاي؟!
وسلوكيات تانية كثيرة ممكن تكون سبب في انهيار طفل، وتكوين رجالة
وستات كبار عندهم مشاكل حقيقية في التعامل.

في النهاية حرفياً ما حدش بيختار أهله، وممكن فعلًا يكون حظ الإنسان سيئ
إنه موجود وسط أهالي عندها مشاكل سلوكية، أو ما عندهو مش الوعي الكافي في
التربية.. بس خلاص حصل اللي حصل! الإنسان ما يقدرش يغير الماضي، بس يقدر
يوقف تأثيره عليه، أو زي ما الكاتب (سي اس لويس) بيقول:


You can't go back and change the beginning, but you can start where you are and change the ending.

إنت ما تقدرش ترجع لورا وتغيير البداية، بس تقدر تبتدئ من مكانك دلوقت
وتغيير النهاية!

ففيه وعي وثقافة نفسية ممكن تساعدك تجتاز الصدمات دي.. فما توافقش عند
شعور ضايقك أو ذكري سيئة وتحبس حياتك فيها.. انتصر لنفسك وحاول تكون
نموذج مختلف تماماً عن اللي حصل فيك... حاول ما تكرر الشوكلي شوهك
بحجة إن هي دي التربية الصح.. بحجة إن كلنا اتربينا كدا.

المهذا الغاضب

وفن الـ لا



«إذا اعتدث أن تغضب من كل ما لا يرضيك، فلن تهدأ أبداً».

مصطففي السباعي

فيه اعتقاد غير مبرر إن الشخص المهزأ لازم يكون شخص منكسر، صوته دايماً واطي.. ودا حقيقي اعتقاد مش صح، فالمهذا ممكن يبقى شخص عنيف جداً! عصبي، صوته عالي ودماغه ناشفة.. فاللي بيخلify الشخص مهزأ مش سلوكه الخارجي قد أفكاره المهزأة! فالعيب دايماً من جوا، فكرة إن الإنسان مش قادر يتحكم في سلوكه، أضعف من إنه يحدد قوام واضح لحدوده وخصوصيته.. أتفه من إنه يطالب بحقوقه بشكل حازم وعقلاني!

فمن الحاجات اللي بيفتقدها بشدة الإنسان المهزأ هي فن الـ لا، فـ لا بتكون تقيلة قوي على لسانه، آه ممكن تكون مش راضية تطلع بانكسار وخضوع، وممكن تكون طالعة بهمجية ودوشة.. ففي قاعدة مهليبة بتقول:

(ما تسييش المكان قبل ما تكون قايل كل اللي نفسك تقوله!).

واللي للأسف ساعات العصبية والسلوك المتشنج أكبر دليل على فشل الإنسان إنه يعلن بالظبط عن اللي هو عاوزه.

وللتوضيح أكثر:

الموضوع عامل زي موظف شغال في شركة، والمدير قال له كلمة ضايقته جداً، جرحته! هنا الموظف قدامه ٣ حلول:

• السلوك العدوانى (المهزا):

«إيه يا مدير يا ابن #####؟!»، «إنت فاكر نفسك مين يا #####؟!» يتترفز ويتعصب! وشه مقلوب طول اليوم، أول ما يرجع بيته يكمم وصلة السلوك العدوانى على مراته، عياله، أي حد.. لغاية ما ينفس كل الغضب اللي جواه في شكل عنف وتجريح! واللي بيحاول بالسلوك العدوانى دا يعوض شوية من الأذى اللي اتعرض له من السلوك العدوانى اللي اتمارس عليه.

• السلوك السلبي (المهزا):

«الله على حكمتك يا افندم»، «أنا فعلاً أستاهل ضرب الجزم يا أفنديم».. يعدي يومه عادي جداً ولا كان فيه أي حاجة تاعبه أو مسببة له ألم.. يروح بيته بيضحك في وش أي حد يقابلها، بس هو من جواه بيقطع! تعبان فعلاً! بس عمال يكتم أكثر في أي صوت جواه يفكره بغضبه! متخييل إنه بيعمل كدا عشان يعرف يعدي الموقف اللي تاعبه بشكل سلس وبسيط، مايعرفش إنه بيتحول تدريجياً لكاين مشوه!

• السلوك الإيجابي (غير المهزأ):

«بعد إذنك يا افندم الطريقة دي مضائقاني»، «لو سمحت حتى لو فيه غلط مني أنا ما باحبش الأسلوب دا»... هو هنا غضبان ومتضايق! بس مركز قوي إنه يعلن عن غضبه بكل حزم ووعي! بشكل ناضج من غير غلط أو تجريح.. هيروح البيت باين إنه متضايق، فعادي يعلن عن مشاعره مع الناس اللي بيحبوه ويحبهم.. متضايق آه، بس عارف يتحكم في ضيقه وما يصييش به أي حد.

في النهاية الكاتب الأمريكي Mitch Albom له جملة بتقول:

Nothing haunts us like the things we don't say.

ما فيش حاجة بتطاردنا قد الحاجات اللي مش بنقولها.

فالغضب يحتاج إنه يبقى معلن بقوة، ظاهر بعزة، واضح بحزم.. طالع على السطح وواحد مساحته الحقيقية من إدراك وسلوك الفرد.. مقدر قيمته وحتميته في تحقيق التوازن والسلام النفسي للإنسان.. وإلا هيبقى نار بناكل في روح وكيان الشخص، أو زي ما المبدع محمد حسن علوان قال:

(تراكم هذا الغضب حتى شعرت بأني أري في صدري وحشاً صغيراً).

كلها على الله حكايتها

الدكتورة Jennifer P. Schneider بتحكي قصة تحت عنوان «The Art of No» (فن الـNo) بتقول:

واحدة كانت قاعدة في أمان الله في حفلة، جه واحد عزم عليها بكونها عصير.. هي قالت له بكل ذوق: «شكراً مش عاوزة».. ابتسما لها ومشي.. بعد شوية رجع تاني نفس الشخص وعزم عليها برضه بكونها عصير.. هي ابتسمت له وقالت «بجد شكرًا لذوقك، بس أنا فعلًا مش عاوزة».. ابتسما لها ومشي.. لكن بعد شوية تاني رجع نفس الشخص عشان يعزم عليها بكونها عصير! فهي اتعصبت ونبرة صوتها ابتدت تعلي: «يا محترم، قلت لك قبل كدا أنا مش عاوزة أشرب حاجة!».. فجأة كل الناس بصت لها، ابتدوا يتكلموا في سرهم عن قلة ذوق البنت اللي بتكشف ولد بالشياكة والأخلاق دي! بقى دا جزاء الشاب المحترم اللي بيعزم عليها بعصير؟!

قصة Jennifer بتنتهي نهاية مفتوحة جوا دماغ البنت.. فهل تفضل مصممة على رأيها ورغبتها الأولى عشان دا فعلًا اللي هي عاوزاه؟! عشان هي شايقة إن الشاب دا معندي على حدودها ومساحتها الشخصية؟! ولا تقبل العصير وخلاص عشان تكسب قبول الناس اللي في الحفلة؟.. الناس اللي ما يعرفوش أي تفاصيل حقيقة عن الحدث نفسه، إنما قرروا بإدراكهم الجمعي إن فيه بنت قليلة ذوق بتحرج شاب عاوز يقدم لها عصير!

فيه عالم نفس اسمه Dan P. McAdams (دان بي ماكادمز) بيقول:
(إن أردت أن تعرفني، فعليك أن تعرف قصتي، فإن قصتي هي التي تحدد من أكون).

فال فكرة كلها، إن إحنا عباره عن قصص ماشية في الدنيا بتختبط في بعض.. قصص معقدة بشكل مرعب! وبالرغم من إن العالم بيحاول يصور لك إنه شغوف إنه يعرف قصتك، بس الحقيقة إن ما حدش مهمتم بصدق يعرف قصة الثاني! ما حدش مستعد يركن قناعاته الشخصية وإدراكاته الضيقة عشان يستقبل تفاصيل مختلفة عنه ودوافع جديدة عليه، ما حدش فاضي لك! سيبيك من شهوة الفضول أو الرغبة الطفولية في حب الاستطلاع، بس على أرض الواقع كله عنده صور مسبقة ماشي يلزقها على خلق الله.. ويبقى الإنسان رهينة الصورة دي.. يا إما يريح دماغه ويرحم نفسه من وجع الأحكام والانتسابات المؤذية ويتماشى مع الصورة.. يا إما يتندذ بسبب حكاوي تافهة، ويفضل يصارع طواحين الهوا عشان يثبت حقيقة ما حدش مستعد يصدقها.

في النهاية عمنا الكبير «أرتر شوبنهاور» بيقول:
(من بين كل مائة شخص يوجد بالكاد شخص واحد يستحق أن نجادله، أما
بالنسبة للآخرين.. فلنتركهم يقولون ما يريدون.. فمن حق الناس أن يهذوا).

أسد يالا! فيه إيه؟!

عالم النفس Jordan Peterson له جملة غريبة بتقول:

If you're not capable of cruelty, then you're absolutely a victim to anyone who is.

لو انت مش بتقدر تبقى إنسان قاسي، فانت بالتأكيد ه تكون ضحية لأي حد يقدرا!

فيه فرق كبير جداً بين القدرة على ممارسة الشر وممارسة الشر نفسها، فمش معنی إن شخص يقدر يكون شرير، إنه كدا فعلاً شريراً!

فالإنسان الطيب لازم يكون عنده القدرة على الشر! فهو عنده الإمكانيات إنه يبقى كائن رحم وقليل الذوق، كائن مخادع وخبيث، كائن ندل و مجرم! لدرجة إنه ممكن يكون في فترة ما في حياته اختبر الشر وأشمتّ من السلوك دا ورفضه! فالطيبة هي إنه بالرغم من قدرته على كل السلوك المؤذن للأخر دا، إلا إنه قرر بارادته إنه يبقى طيب!

(إنني طيبة على الدوام، وذلك عببي الوحيد، لأنّ على الإنسان ألا يكون طيبنا على الدوام!).

دوسٌتُويٌفِسْكِي.

فأي كلام عن إنسان طيب لمجرد إنه مش قادر يبقى شرير، في وجهة نظرى دي مش طيبة إنما سذاجة وعجز! الطيبة ما ينفعش تبقى الاختيار الوحيد للإنسان، أو بمعنى أصح ما ينفعش تبقى هي الاختيار المجبور عليه، والا يبقى في الواقع هو اندفع للطيبة عشان ما قُدّاموش حل تاني.. طيبة ماسخة! وكأنه اتّقهر على الطيبة.. اتّقهر إنه يبقى حثوب ولذوذ.. واللي في الحقيقة وجود كائن زي دا هو الشر في أصوله، لأن مع أول فرصة يقدر يكسر القهر دا هيمارس الشر بكل أشكاله! أو زي ما يقول Jordan Peterson:

A harmless man is not a good man. A good man is a very dangerous man who has that under voluntary control.

الإنسان غير الضار مش بالضرورة يكون إنسان طيب! إنما الإنسان الطيب هو شخص خطير جداً ولكنه يقدر يتحكم في نفسه بشكل قوي.

فالطيبة هي قوة سيطرة الإنسان على ذاته، بتطويعها على فكر و فعل معاكس لغراائزها وشهواتها.. واللي طبعاً مش بيناسب عبید وعجزة كتير! فبيشتغلوا على تشويه مفهوم الطيبة وتقدمها، على أساس إنها قلة حيلة وخنوع! فانت طيب مش

عشان انت مش شرير.. لا، أنت طيب عشان تقدر تبقى شرير بس اخترت ماتبقاش!
فقبل ما تصنف نفسك طيب أو شرير، اسأل نفسك هل تقدر أصلًا تبقى أي حاجة
غير طيب؟!

رفقاً بنفسك!

في الشغل، بتتكلم انت وزمايلك عن أخبار حياتكم وإيه الجديد فيها، فجأة «مصطفى» زميلك بيهرز وقال جملة ضايقتك بخصوص صور كانت حاطاها والدتك على الفيس بوك، كله بيضحك، أنت بتتمثل إنك بتضحك! هاهاها.. الموضوع خلص!

رجعت البيت، سلمت على والدتك اللي قامت تسخن لك الأكل أول ما شافتكم، أكلت في صمت، دخلت أوپتنك، بتفكر في اللي حصل في الشغل، متضايق من الموقف، بتناول وانت متضايق!

تاني يوم بتصحي، بتروح الشغل، بتقابل «مصطفى»، قلبك بيدق أسرع، بتفكر الجملة اللي ضايقتك، بيسلم عليك، تسلم عليه، تدردوا، كل واحد يرجع لشغله، ولا كان فيه أي حاجة!

ممکن نرکز في الد ٣ جمل دول بتوع عمنا الكبير قوي (سيغموند فرويد):

• (المشاعر المكتومة لا تموت أبداً، إنها مدفونة، ولكن على قيد الحياة! وستظهر لاحقاً بطريق بشعة).

• (لا يؤذي الإنسان أكثر من كبت المشاعر السلبية طويلاً).

• (تنبت العقد من صدمة عاطفية، ثم ينسى الإنسان سبب الصدمة، ولكن العقدة تظل حية في نفسه!).

المشكلة في اللي حصل فوق مش إن انت ما عرفتش تستحضر الرد بسرعة على كلام مصطفى أو إنك ما لحقتش تعبر عن استيائك في لحظتها! فال المشكلة مش إنك زي ما بيتفاهم بالعامي (اتخطفت) لكن المشكلة إنك غرفت في (الخطفة).

فعادي ممکن تكون تربية الواحده أو خبراته الحياتية مش بالكافاء الشديدة اللي تخليه من أصحاب الردود السريعة.. عادي إنه يكون شخصية مش اجتماعية، ويبذل مجهد أكبر من الناس الثانية عشان يقدر يحافظ على توازنه في مجموعات.. عادي جداً إنك تتخطف! لكن اللي مش عادي إنك تفضل مخطوط كبير.. وعشان تكمل حياتك طبيعي بتحاول تداري اللي جواك، عاوز تقول أنا كويس أهو مفيش حاجة حصلت! أنا باضحك وأهزز وأروح شغلي وأنزل stories، باخرج فيها مع مصطفى شخصياً! أنا شاطر قوي إني باكتب أي حاجة جواي!

الـ Repression (الكبت) من أسوأ وسائل الدفاع النفسي غير الناضجة، حاجة كدا في منتهى القسوة تجاه الذات.. زي واحدة دولابها مركب، فبتداري على فشلها في توضيبه، إنها تفضل تحشى في هدوم محتاجة غسيل وريحتها مقرفة جوا الدولاب! عمالة تحشر وتتضغط عشان تقفله! واللي هييجي في لحظة

ما وينفجر فيها وفي كل الأوضة!
(لا تحب أحداً لدرجة أن تقبل أذاه!).

فتغور أي قوة على الأرض تخلي الإنسان مجبور إنه يكتب أي حاجة جواه! لا باسم علاقة صداقة أو علاقة حب! ولا عشان ماكنش يقصد، أو عشان أي مبرر أهبل بيقنع به الإنسان نفسه! ليه قلة الحيلة والقرف اللي بيعمله الإنسان لما يخاف يواجه الحقيقة؟ وييجي على مشاعره وأفكاره وينزل فيها تأنيب ضمير وجلد ذات! إنما الموضوع زي النار في مكان مقفل والإنسان عمال يقفل عليها ويكتمها أكثر وأكتر!

فالحل مش في إيد أي حد في العالم غير الإنسان! لا بقى دكتور نفسي مشهور، ولا life coach بيطلع ليزر من عينه! ولا أي حد معاه السر اللي يخلي أي حد تاني يفك تعويذة كبت هو عاملها بايده! فاتكلم حتى ولو مش في ساعتها! قول اللي جواك حتى ولو عقلك بيوجهك إن اللي هتقوله مش هيفرق! وأهم حاجة اوعى اووعى اتنسى لحد حاجة، إنت نفسك مش قادر تنساها!

لَا مَا تتشظرش على البردعة!

فيه جملة بتقول:

Just because you're angry doesn't mean you have the right to be cruel.

مش معنى إنك غضبان، إن دا يديك الحق إنك تبقى قاسي!

في مقالة بعنوان 7 Myths About Anger في الغضب Amy Morin تقول إن الغضب كانفعال مفهوم بطريقة مغلوطة بين الناس، فالغضب ال angry feelings تماماً عن العنف ال aggressive behavior! وغياب المفهوم دا سبب إن الناس المتربيه اللي بتخاف تؤذى حد بالعنف أو السلوك الفظ، لو انعرضت لموقف ضايقها خلق جواها مشاعر غضب، بتكتبتها وتذكر وجودها.. أصلها مش قادرة تميز الفرق، فتئذى نفسها! لأن ببساطة الغضب كانفعال ضروري جداً! وفكرة إن الإنسان يسلب من نفسه حقه في الغضب، فكرة في غاية الجهل والإساءة للذات.. ما لهاش علاقة بالطيبة أو الأخلاق العالية!

فالمشكلة مش إن الإنسان يغضب، إنما إنه يغلط! إنه يمارس القسوة أو الأذى في غضبه.. ياخد مشاعر الغضب كذرعه ومبرر للتبرير في الآخرين.. اللي هو «أنا غضبان فيلاً أما رس شوية قهر وسادية على اللي حواليي! أصل أنا غضبان!».. فمن سمات الشخصية السوية هي السيطرة على الانفعال حتى ولو غضب! يبقى الإنسان هو اللي بيقود شعوره مش العكس، مش خايف من غضبه ولا واحده كستارة لإشباع عقد مغروسة فيه! أما الشخصية المكسورة الضعيفة فبتفشل دائمًا في التحكم في شعورها، فتكون النتيجة كبح وقمع لشعور إنساني مهم زي الغضب! ودا يخلق شخصية مشوهه مدفونة تحت تراكمات من الضيق والألم، عاملة زي القنبلة الموقوتة مستننية تنفجر في وش أي حد.. اللي غالباً بيكون أكثر شخص ما لوش ذنب في مشاعر الغضب من الأساس!

اللحم المفْرَّ

«إذا أردت السيطرة على أي شخص، كل ما عليك فعله أن تجعله خائف».»

باولو كويلو

في مصطلح نفسي اسمه الـ *Intimidation* (الترهيب).. وهي حالة الخوف اللي بيزرعها بعض الأشخاص في البيئة والناس اللي حواليهم لدفعهم تحقيق رغباتهم، بس هل الخوف حاجة وحشة؟ يعني الموظف لو مش خايف إنه ينطرد من الشغل مش هيستغل كويس؟ الطالب لو مش خايف من الشغل مش هيذاكر بضمير؟!

الفكرة إن الترهيب مش مجرد حالة تخويف عام أو خوف إيجابي من إخفاق أو فشل، إنما عشان تتحقق بشكلها الكامل، لازم تكون مصحوبة بأهم ركن فيها، وهو الخوف من الأذى!

فيه قناعة عند بعض البشر إن احترام الآخرين ليهم لازم يكون مبني على خوفهم منهم! وخصوصاً خوف الآخرين من أذياتهم ليهم! أو زي ما بيتفق لازم لحمك يبقى مرا اللي يفكر يقرب منك على طول ييجي في دماغه حالة الضرر والأذى اللي ممكن يتعرض لها.

«أصغر الكلاب أشدّها نباحاً».

مثل أمريكي

في قاعدة مهمة في علم النفس التربوي بتقول: (التخويف وسيلة ردع مؤقتة، تترك آثاراً نفسية دائمة).. فالإنسان ممكن ينجح إنه يبني احترامه على الخوف منه، يرسخ في عقول نسبة مش قليلة من اللي حواليه إنه قادر على أذياتهم لو ما نفذوش اللي في دماغه.. بس للأسف أي احترام أو تقدير مبني على الخوف، بيكون احترام مزيف، زائل مع أول فرصة عدم خوف، بيتحول على طول لكراهية وعدوان!

فالإنسان لو عاوز يبني احترام حقيقي يعيش مهما مز من وقت أو مواقف، ما قداموش غير الـ *Assertiveness* (الحزم).. فالحزم مختلف تماماً عن التخويف.. فالحازم مش بيستمد قوته من تخويف الآخر، إنما بالصرامة والتوكيد على توضيح قواعده وحدوده وحدود الآخرين! فهو مش عاوز البشر مرعوبين من أذيته، إنما عاوزهم مستوعبين إنه مش هيقبل أي تعدي، أو يتغاضى عن أي تجاوز بشكل هين أو بسيط! لكن المشكلة بتحصل لما الإنسان بيفشل إنه يكون حازم، فيعرض الفشل دا بالترهيب والرعب.. لما الإنسان بيفشل إنه يحط مبادئ قوية في أي علاقة هو فيها، بيلجأ للخوف عشان يكون هو المبدأ الوحيد! واللي طبعاً بيقلب

نتائج مش كويسة.. نتائج كلها قائمة على القهر والمعاناة.

فن الـ لا

الكاتب الأمريكي Ryan Holiday يقول:

Don't say maybe if you want to say no!


معنى: ما تقولش «ممك» لما تكون عاوز تقول «لا»!

مش عارف هو الموضوع له علاقة بتربية غلط، ولا مفاهيم مجتمعية غبية، ولا ايه السبب بالظبط؟! بس فيه سلوك شائع بين شريحة كبيرة من الناس على مستوى العالم مش مصر ولا الوطن العربي! إن الإنسان يكون (خجلان) إنه يقول اللي جواه! يحس إنه عادي، بيجي على نفسه وقناعاته عشان ما يصرح باللي فعلاً بيذكر فيه! أصله خايف بيان وحش! لما يكشف اللي قدامه لو رفض حاجة هو فعلاً مش متقبلها! ودا بيخليله طبعاً حاسس دايماً إنه مش حقيقي! إنه مش مسؤول قدام نفسه، إنما هادر حقها وكيانها!

فانت لما ترفض تروح مكان مش مناسب ليك أو تعمل سلوك مش متواافق مع طبيعتك، إنت مش إنسان رحم أو مغورو، إنت إنسان محترم لذاتك وشخصك.. لما تقول «لا» بكل وضوح لحاجة ما تنفعكش، إنت مش إنسان متعالي أو ما عندكش قلب! إنما إنسان عارف مصلحتك وبتمارس حقوقك الطبيعية.. لما تقطع علاقة مسببة لك أذى وتأخر في حياتك، إنت مش إنسان بيعا أو خاين! إنما إنسان بتحب نفسك ومش متقبل تقل منها أكثر من كدا! لما تختار حقيقتك واستقرارك النفسي على حساب أي حاجة بتاخذ من عمرك ومزاجك، أنت إنسان لا يمكن لا يمكن لا يمكن تبقى وحش! إنما إنسان ناضج قادر يعبر بصدق ووعي عن ذاته.. ويبقى زي ما الكاتبة نيرة وحيد بتقول:

«قد تغضبهم «لا»، لكنها ستجعلك حزاً. إذا لم يخبرك أحد من قبل، حررتك أهم من غضبهم».

التحول



خلينا نتفق إن نص علاج المشكلة هو تحديد أصلًا إن فيه مشكلة! فلو اعتبرنا إن سلوكيات وأفكار الإنسان المهزأ هي عبء بالنسبة لصاحبها، فأول خطوة للتخلص منها إدراك وجودها وفهم تكوينها من تربية غلط ومفاهيم عقيمة.. بس زي ما الإنسان قعد وقت كتير عشان يتم تشويهه، برضه بيأخذ وقت كتير عشان يتخلص من التشوّه دا.. بيأخذ وقت كتير عشان يتتحول!

فأسوأ حاجة ممكن يعملها الإنسان تجاه نفسه إنه يقسوا عليها لمجرد إنه عاوز إجراء فوري وسريع! عاوز ينسى حاًلا الحاجة اللي مضايقاًه! عاوز يبطل حاًلا السلوك اللي تاعبه في شخصيته! عاوز يغمض عين ويفتحها يلاقي نفسه الحاجة اللي على مزاجه! اللي طبعاً دا جهل بطبيعة النفس البشرية واستيعاب ساذج لفكرة تطور الإدراك الإنساني..

فدوامة جلد الذات اللي الإنسان عايش فيها، عمرها ما بتقف مرة واحدة، خلاط الأفكار اللي شغال ليل نهار زي السكاكيـن في دماغه بيقول له: «إنت شخصية مهزأة» أو «تستاهل إن يحصل معاك كدا، عشان انت خايب وعييـط» برضه مش هيبطل.. حالة الشلل المعنوي اللي هو عايشها ومعيش أقرب الناس له فيها مش هتتغير.. كل الحاجات اللي ساحبة من عمره وطاقته مش هتهدـا لمجرد إنه عاوزها تهـدا وخلاص!

ففي جملة رايقة بتقول:

Forgive yourself for not knowing what you didn't know before you learned it.

فالحل إن الإنسان يسامح نفسه على كل الحاجات اللي عملها وما كانش فاهمها بشكل واضح زي دلوقت، على كل القرارات اللي أخذها بعد تفكير في وقتها، وبرضه ما طلعتش صح، كل العلاقات اللي داخلها بكل قلبه وكيانه لكن ما كملتش زي ما هو عاوز.. فالإنسان لازم يسامح نفسه على أي حاجة عملها قبل ما يعرف عنها كل اللي اتعلمه، فهو أخد أحسن اختيار في نطاق الخبرة والمعرفة اللي كانت عنده وقتها! واللي بالمناسبة عمره ما كان هيعرف أو يتعلم من غير ما ينفذها.

فهو خلاص مش هيعرف يرجع الزمن لؤرا ولا يمنع موقف خلاص اتاخد، بس على الأقل يقدر يغير نظرته للماضي.. ما يفضلش يقاوم حقيقته وينكر على نفسه حتمية تقبلها.. يبص لنفسه دلوقت، هو مش زي قبل كدا، بقى عنده مخزون محترم من الخبرة، دفع تمنه غالى قوى من مشاعره وأحلامه، بس التمن دا هو اشتري به مناعة لأى سوم تانية جاية قدام.. اشتري به إدراك واعي قادر يميز له كل الحاجات التافهة اللي كانت ممكن تضيع من وقتك وتستهلك من روحك قبل كدا.

اشتري به النضوج.. وما أدرك دا غالى قد إيه!

النسخة الأكثر تطوراً

الفنان Leonardo DiCaprio يقول:

Every next level of your life will demand a different you

كل مرحلة من حياتك تحتاج نسخة مختلفة «منك».

ومليون خط تحت «منك».

الجملة دي عبقرية! تعالى أقول لك إيه سر عبقريتها؟!

للأسف في ناس بتعامل مع تغيير الشخص كنوع من أنواع خيانة العهد! اللي هو انت ازاي اتغيرت كدا؟! إيه الكارثة اللي انت عملتها دي؟! وكان شرط إن الفرد يبقى طول عمره هو نفس النسخة القديمة بتاعتته! ويتعاتب على التغير دا! وهي دي المشكلة!

فالتغيير المقود أو المراد في جملة DiCaprio دا حاجة حتمية، فهو تطور، تحديث، update جديد بينزل على شخصية الفرد.. مع الحفاظ على كلمة «منك».. فزي ما برامج الموبايل مثلاً بتطور بس محافظه على مبادئ أساسياتها.. الإنسان مطلوب منه يعمل كدا وإلا هيبقى برنامج قديم، خلاص مش قادر يتعايش مع الظروف الجديدة.. ممل، متهالك غير متأقم للحالة الجديدة اللي اتنقل فيها!

فلسفه التغيير هي تجديد للأفكار والرؤيه.. استحداث مناهج أوسع للإدراك.. سلوكيات أكثر نضوجاً وثباتاً. التغيير هو دراسة خاصة للعيوب ومحاولة تفاديهما بشكل واعي وصادق مع النفس.. التغيير بس حافظ على جوهرك وكيانك الحقيقي، فالطفل بتاع اميارح اللي آخر العالم بتاعه كان أصحابه في مدرسة، دلوقت كبر وبقى عنده دواير شغل وأصدقاء وشريكة حياة.. يحتاج يعرف إزاي يـ handle الحياة الجديدة بوعي الرجال الكبير.

فالفيصل في تغيير الإنسان ما ينفعش بأي شكل بيقى حكم الخارج عليه! إنما حكمه هو الذاتي على نفسه.. أنا اتغيرت عشان إيه؟ وبقيت إيه؟ فالتغيير عملية صعبة ولازم بتضحي بنسختك القديمة في مقابل اكتساب التحديثات الجديدة.. ممكن ناس كتير تشفف التحديثات دي رخمة في التعامل معها زي ما أغلبنا بنشوف مثلاً تحديث الـ facebook أول ما ينزل رخم وتنك! بس طول ما الإنسان فاهم أبعاد شخصيته وطول ما اللي حواليه بيساعدوه عشان يتطور ويبقى أفضل، هيكتشف إن التغيير دا أساسى لمواكبة الحياة.

ال الحقيقيون

«ال حقيقيون لا يحتملهم أحد».

الشاعر الفرنسي / إيف بونفوا فيه مقالة بعنوان Habits of Truly v The Genuine People يقول د. Winch إن اللي بيفرق بين إنسان حقيقي (Genuine) ومزيف (fake)، هو عدم اهتمامه برأي أو انطباع الآخرين، إنه مش مهووس بعيب إنه لازم يبقى شخص مذهل أو محبوب من الكل.. عايش وفق فكره الخاص وشخصيته المميزة، مش مضغوط تحت رحمة صورة ما فرضتها عليه البيئة اللي هو عايش فيها.. ودا اللي يخلி من الإنسان الحقيقي (Genuine)، شخص ناضج ومربي في التعامل.. فهو مش يحتاج يتلوون بحاجة غير حقيقته عشان مستني تصقيف أو مدح.. ما عندوش ego issues أو مشاكل إن حد يظهر له عدم إعجاب أو حتى يعترض معاه بشكل صريح.. إنسان مرن وصادق مع نفسه، ومتعايش طبيعي جدًا مع فكرة إنه ممكن يبقى مش كامل.

أمال فين المشكلة؟!

فيه جملة بتقول:

«صديق المدخن لا يفرح حين تقلع عن التدخين. عشيق السري لا يبتهرج إن شفيت من حبه المستحيل. البشر مجبولون على أنانية الغرق معاً، عوضاً عن تمني التجاة لرفيق».

فالمشكلة كلها في (أنانية الغرق معاً!). بالرغم من عظمة الشخصية الحقيقية، إلا إنها تعتبر شوكة مؤلمة في صدر مجتمع المزيفين! فهو دا اللي بيفكرون بحقيقة سطحيتهم وتفاوتهم! كلامه الصادم بيكشف هشاشة جوهرهم، سلوكه الحر بيعكس مدى وضاعتهم وانعدام ثقتهم في نفسمهم! كل دا بيخلق منه كائن ميفوض، كربيه، محور نميمة واستهزاء.. كائن مش أي حد يقدر يتقبل اختلافه أو يتتحمل وجوده!

وعشان كدا كل ما نضج الإنسان، تعامل مع عقله وأفكاره، بقى بشكل انتقائي أكثر. كل ما زادت عنده قدرته على تحديد إيه الآراء اللي يسمع لها، وإيه الآراء اللي يعيدها من غير ما يقف عندها حتى.. أتقن فن التجاهل! فالإنسان عايش وسط عالم واسع من الأفكار والمعطيات المعنوية، مش من المنطقي أبداً إنه ينصاع لها أو يتعامل معها كأنها حقيقة.. مش منطقي أي خبر يقرأه بقى صح أو أي رأي يسمعه منمق بقام رقم وكام لفظ بلغة أجنبية بقى على طول بحث علمي واجب تصديقه! وعشان كدا قوة عقل الإنسان بتتقاس بمدى احترامه لعقله وتقديره لمفهوم خصوصيته.. عقلك زي أوضة نومك، مش سراح مداح لأي حاجة معدية

تدخل فيه، مهما كان شكلها تقيل وعميق أو مصدرها حد أنت بتتلق فيه أو حتى
بتحبه! لازم تتعرض للمساءلة والفحص.. فالطبيعي عمره ما كان التصديق إنما
الشك!

في النهاية، المبدع هرمان هيسم يقول:

«من يطلب الموسيقى بدل الضجيج، والفرح بدل اللذة، والروح بدل الذهب،
والعمل الخلاق بدل العمل التجاري، والشغف بدل الحماقة، لا يجد مأوى له في
عالمنا التافه هذا».

نمبر وان

فيه جملة بتقول:

That's the problem; while putting others first, you've taught them that you come second.

المشكلة إنك لما تحط أي حد رقم واحد في حياتك، هي إنك بتنقل له إنك ما عندكش مشكلة تبقى رقم اتنين!

مش حاجة منطقية خالص إن الواحد يقرأ الجملة دي ويتعامل مع الحقيقة اللي متقدمة فيها إنها شر أو فساد! اللي هو ما ينفعش نخلي أي حد في حياتنا رقم واحد؟! أو إن من الغباء إن الإنسان يخلி أي حد تاني رقم واحد في حياته إلا نفسه! أبداً! فالجملة المقصود بيها تنقل حقيقة مجردة، حقيقة عادية جداً.. وهي لو عاوز تخلி أي حد رقم واحد في حياتك استحمل بقى إن هو يتعامل معاك كرقم اتنين.. بكل بساطة ووضوح!

(أجب جارك لكن لا تخض السور بينكم).

حكمة بابلية

مشكلة الإنسان مش مع التضحية أو الحب غير المشروط كمفاهيم، إنما مشكلته مع توابعهم.. فالإنسان عاوز ياخذ المقابل النفسي والأخلاقي الجميل بناء على التضحية من غير ما يتتحمل عبء ومشقة فناء ذاته في عملية التضحية دي!

فعاوز تخلி أبوك، مراتك، بنتك.. عاوزة تخلி جوزك، أهلك، عيالك.. عاوزين تخلوا أي حد رقم واحد وأهم حد في حياتكم، استحملوا نتيجة القرار الملائكي دا! عيشوا بقى بالاختيار اللي فوق مستوى السلوك البشري! مش عاوز تحط نفسك في المخاطرة دي وتبعد عن أي مجازفات ممكن تتكبد مشاعر ندم أو ضيق؟ سهلة! ما تخليش أي حد رقم واحد في حياتك غير نفسك! خلينك إنسان طبيعي بيفكر في أول حاجة هي مصلحته، دي مش حاجة دنيئة أو كدا انت إنسان سيئ، إنما دا اختيار شخصي، فالإنسان ممكن يحب اللي حواليه ويراعي احتياجاتهم وهو واعي جداً لمصلحته ومهتم إنه يحققها.

فمن أكثر الحاجات المرهقة لنفس الإنسان هي التظاهر بغير الحقيقة.. فكرة إنه يتصنع مشاعر وسلوكيات غير اللي جواه.. بيان جامد وهو من جوا مسكين، بيستجدي شفقة حد يحضرنه.. بيان صامد وهو في الحقيقة مستنفذ مستندي اللحظة اللي يستريح فيها.. بيان مؤمن وواثق وهو تايده مش لاقى الطريق! بيان مبسot باللي بيعمله وهو من جواه مغلوب على أمره وممش قادر يغير الواقع! فقسورة الأوقات دي على الإنسان إنه بيحس بفجاعة التناقض بين اللي جواه وبين

اللي بيصدره للناس! قد إيه المجهود ضخم اللي مطلوب منه عشان يخفي حقيقته
اللي ما حدش عنده استعداد يتقبلها؟! قد إيه حقيقته غير مرحب بها بين حتى
أقرب الناس له!

فالالم الأصعب بيحصل لما في وسط الادعاء دا يواجه نفسه بسؤال: ليه؟! ليه
أنا باعمل كدا؟! ليه باخفي وأكبت؟! ليه بازيف وأكتم؟! ليه باعئف نفسي وأضغط
عليها وهي ما تستاهلش كل دا مني؟! بابيع إيه عشان أشتري مين؟! باضخي
بجوهري مقابل رضا كاذب هش؟! والكارثة مش إنه مش بيلاقني الإجابة، ولكن لأنه
مش بيقدر يصدقها.. وهي إن أول واحد رفض حقيقته ما كانش اللي حواليه.. إنما
هو نفسه!

ففي النهاية ما فيش حاجة ممكن تكون أكثر إهانة لذات الإنسان أكثر من شخص
مش قادر يكون اللي هو مؤمن به! خايف يكون اللي هو عاوزه عشان مرعوب من
نظرة الناس وكلامهم عليه! فمهما كانت قناعة الشخص، مطلوب منه يبقى مسؤول
كافية إنه يكون قدّها.. من غير ابتزاز نفسي أو ضغط من شعارات رومانسية رنانة!
في النهاية المدؤنة Meggan Roxanne ليها نصيحة جميلة جدًا في
الموضوع بتقول:

(تعامل مع الآخرين، كمثل إدارتك للوقت! ليس عليك إنهاء العلاقة مع كل
شخص صعب المراس في حياتك.. ببساطة قلل الوقت الذي تستثمره في ذلك
الشخص، وتحكم في المحادثات وافرض حدودًا جديدة. ذكر الأشخاص بأنهم
محبوبون.. ولكن لا تسمح أبدًا لسلوك الآخرين بالتدخل في راحة بالك. فأنت
أولويتك الرئيسية).

السيئ اللي في رواية أحدهم

الظابط اللي قتل راجل مجرم خطير في مطاردات، أكيد مرات الراجل المجرم دا
شايفة الظابط إنسان شرير عشان حرمها من زوجها!

الطالب اللي بيرفض يغشش زميله، أكيد زميله شايشه إنسان رخم ووحش عشان
سبب إن هو ما يكتبس حاجة في ورقة الإجابة ويسقط في الامتحان!

الموظفة اللي مصممة تمشي الناس بالدور ومش راضية تسمع منك إنك
مستعجل ولازم تخلص الورقة دي بسرعة، أكيد انت شاييفها إنسانة باردة وما
عندهاش دم!

فيه جملة بتقول WE ARE ALL BAD IN SOMEONE'S STORY.. كلنا
ناس مش كويسة في قصة شخص ما.. واللي للأسف دي حقيقة ما فيهاش جدال،
غصب عنك انت شخص مكروه، أو على الأقل شخص سمج بالنسبة لشخص واحد
على الأقل في حياتك.. فمش من الذكاء إنك تتوتر أو ت Overthink كتير حواليين
شكلك بالنسبة للي حواليك، أو تعطل حياتك إنك تفضل تدافع عن نفسك كل يوم
بالليل على السرير إنك مش BAD IN SOMEONE'S STORY! إنما تعايش مع
نظارات أو آراء الناس فيك ما دام انت بتعمل اللي مقتنع به ومؤمن انه صح.. فمش
من الطبيعي إن الإنسان يتسلح في دوامة انه لازم يبقى كل الناس حاباه أو راضية
عن وجوده في حياتها، مش طبيعي أصلًا إن دا يتحقق! فحتى لو الإنسان نفسه
ساندوتش شاورما فيه واحدة عمالة بتتخزن كل ما تأكله وتتضايق، وبالنسبة لها
ساندوتش الشاورما دا BAD IN HER STORY! فأكيد مش هتكون أكثر خيرًا
وتفضلًا على البشرية من ساندوتش شاورما!

فالإنسان يحتاج يكون ما عندوش أي مشكلة انه يتنسى أو يترفض أو حتى
يتكره! وخصوصاً لو هو مش بيئذى حد أو بيتعمد يكون سيئ عن قصد! فعبء
صورة الإنسان المحبوب من الكل، كفيلة أنها تصنع من الفرد كائن هش سجين جوا
أوهامه، كائن مضغوط بنظرات الناس، مربوط برضأ المجتمع عليه.

ما تحاولش مع اللي ما بيحاولش.

(إنه أمر مفزع.. أن تبقى أسيّراً للذين فزوا).

محمد المنسي قنديل

من السذاجة إن الإنسان يربط تجاوزه ل موقف أو فترة ما بفكرة، إن في يوم من الأيام فيه شخص معين هبيجي يعتذر له على كل الآلام اللي سببها له، هبيجي راكع تحت رجليه، ندمان بيترجاه يسامحه! فيفضل محبوس في وهم إعادة الحق لاصحابه! مستني الشخص دا يرجع عشان يصلح غلطته اللي عملها في حقه من غير قصد، اللي ساعتها هو هيعرفو عشان ابن أصول وقلبه كبيراً وتراجع الأوضاع مثالية زي ما كانت!

فيالرغم من شاعرية الفكرة ورومانسيتها إلا إنها فكرة مؤذية وبائسة! كل اللي بتعمله إنها بتدفع صاحبها أكثر في ذكريات مشوهة وإدراكات مغلوطة.. فالتجاوز الحقيقي يبدأ لما الإنسان يستوعب بكل ما فيه من وعي ونضج إن قرار استمرار حياته مش بآيد أي حد غيره هو نفسه! فاللي عايز يرجع يرجع، اللي عايز ما يرجعش ما يرجعش، لكن هو مكمل في طريقه مش مستنى حد! ماشي ناحية حلمه ومش شايف غير مستقبله، إنما هيفضل كل شوية يبص وراه بيدور على حد أصلاً مش موجود، زي عيل تايه بيدور على أي حد يستنجد به.. فهو دا قمة الغباء والفشل!

فالنضوج الحقيقي، هو لما الإنسان بيدرك إن الناس كلها مش ضد، أو إن العالم مش كله بيكرهه، إنما الناس عايشة لنفسها ومصلحتها والعالم مش فاضي له من الأساس.

روح انت بقى اتعالج

فيه جملة عظيمة بتقول:

If You Don't Heal What Hurt You, You'll Bleed on People Who Didn't Cut You.

لو ما عالجتsh الجرح اللي فيك، هتلaciك بتنزف على ناس ما كانتش سبب في
الجرح أصلًا!

• الأب اتهزاً من مديره في الشغل، رجع بيته حاسس بقهر وغضب، بنته بتستأذنه
لو ممكن تروح فرح صاحبتها، راح مزعق فيها ومعيطة!

• بنت أصحابها في الشغل بيعاملوها وحش ومضايقينها، خطيبها عذى عليها
عشان يعزمها على عشا برا، لسا قاعدين وبيتناقشوا في أي موضوع راحت
اترفرزت واتعصبت عليه وقالت له كلام قاسي ما لوش لازمة!

وأمثلة ياااااما عن ال Displacement (الإزاحة).

الموضوع بيبتدي لما الإنسان يحس انه تحت ضغط! (كرامته متبعترة، عليه
النزمات مش قادر يوفيها: فهر، ظلم، عجز.. الخ) .. ويبقى زي أي حاجة لازم يكون
لها رد فعل، برضو نفسنا ليها ردود أفعال عشان تصد الضغوطات والهجمات
دي.. واللي منها رد فعل غير ناضج اسمه Displacement (الإزاحة).. ونظراً
إننا عايشين في مجتمع كله قهر وكمان غير ناضج، فما فيش أكثر من الـ
Displacement .. كله ماشي ينتف على كله! دائرة من الأذى مش قادرin
نوقفها، والكارثة لما تبقى من أقرب الناسلينا! اللي هو مش قادرin نفك الحلقة
المؤلمة دي!

والحقيقة إن فيه طريقتين يمكن يساعدوا في كسر الحلقة، أول طريقة إننا
نلغي الضغط! ودا حل غير عملي عشان كل حاجة في حياتنا ضغط! وخصوصاً
في مجتمعات العالم الثالث اللي ما فيهاش احترام حقيقي لقدر الإنسان! الطريقة
الثانية اللي -في وجهة نظرى- ممكن تبقى عملية أكثر، هي إننا نلعب على نضج
الإنسان ووعيه.

ليه ملش البنت اللي ابوها زعق فيها، ما تجريش تمتض غضبه وتقعد معاه
بهدوء وتفهم بكل حب انه عمل كدا عشان هو مضغوط وهي حاسة به جدًا
وبضغطته، بس لو هو بيحبها بجد يا ربيت ما يزيحش غضبه فيها ولا في حد ما
لوش ذنب! إنما يلاقي آلية دفاع نفسية ناضجة أكثر عشان يقدر يقاوم الضغط
والقهر دا!

ليه شريك الحياة ما يقدعش مع شريكه اللي بيستخدم أسلوب الإزاحة ويفهمه

انه عارف قد إيه هو طالع عينه وإنه مقدر كل القرف وعدم الأدبية اللي هو بيمر
بيها! بس الا Displacement دي مش طريقة كويسة في التنفس عن غضبه
وتعبه! إنما ممكن تخسره ناس فعلاً بتحبه وعاوزه تساعده!

ففي النهاية كلنا متعورين! كلنا ملانيين جروح وبلاوي سودا! بس دا مش مبرر
أبداً إننا نمشي نخر خر دم على أقرب الناس لينا! نمشي نعور أو نجرح أكثر ناس
ب تستحملنا و بتتتعب جامد لما تشوفنا في حالة سيئة! وتبقى الحجة (المفروض
يتحملونا عشان احنا تحت ضغط!)، لا خالص! إنما نضوج الإنسان ووعيه مش
يمنعه انه يعيش ألمه وتعبه كامل، لكن يعيشه زي الناس الكبيرة المسئولة! يعيشه
بقدر عالي من الحكمه والمحبة.. من غير أذى للآخر أو إزاحة على حد.

غول كتمان

في جملة بتقول:

(يعيش الإنسان وهو كاتم بقلبه ثلاثة أرباع خيباته وحزنه وبؤسه ويأسه وأمساته، وينفجر إذا وقعت قهوته من يده).

زي ما في حاجة اسمها explosion (انفجار) فيه حاجة اسمها Implosion (انهيار)، ودا اللي حاولت Gerri Luce LCSW تشرحه في مقالتها The Two Styles of Coping: Explosion and Implosion موضوع الضغوط النفسية أشبه بقواعد الفيزياء، كل ما الضغط يزيد لازم يحصل رد فعل يليق بالضغط دا، وال فكرة بقى في الاتجاه.. لو انفجار هيبيقى الاتجاه لبزا زي الغضب والشتمة والأذى الخارجي.. لو انهيار هيبيقى الاتجاه لجوا زي الندم والاكتئاب والأذى الذاتي.. والحقيقة، الاثنين أسوأ من بعض بس الأسوأ هو نظرية المجتمع عن الاثنين...

مشكلة من مشاكل المجتمع غير الناضج نفسياً انه بيتعامل مع الـ explosion بشكل ما من الاشمئاز والنفور على عكس الـ Implosion اللي ساعات بنلاقي شرائح كثيرة في المجتمع بتشجعها وبتنتهجها! وخصوصاً في الجماعات الأقل ثقة في نفسهم زي الإناث مثلًا! فنلاقي الأم اللي بتشجع بنتها على إنها تكتم جواها عشان ما تزغلش جوزها أو حتى ابوها! والأكثر لعنة إن بيتم دعم الأفكار المتختلفة دي بنصوص دينية أو أعراف اجتماعية.. لغاية ما بقى عندنا قبول مجتمعي بمفهوم مؤذني جداً بشكل غير مباشر زي الـ Implosion.. في بيان إننا ضد انهيار الإنسان واحدنا أول ناس بنزرعه فيه.. لما بنحرمه من حقه في الحزن أو نسلبه حقه في الاعتراض.. لما نصور له أي فرصة للغضب أو حتى التعبير عن الضيق إنها قلة أدب وسوء تربية! لما نخوفه بفزعه الدين أو الأخلاق.. إحنا ببساطة بنصنع قنابل موقوتة بتفجر نفسها داخلياً وتفرغ روحها من أي معلم للحياة.

ففي النهاية، كونك ما انهارتش في وقت كان لازم تنهار فيه.. ما حدش هيستشف لك أو يشيلها لك كجميلة أو خدمة.. اللي هو بقى لك عندنا فرصة انهيار في أي وقت تاخدها براحتك! لا خالص! العالم أساساً مكان غير مؤهل لتقبل صراعاتك الداخلية أو انهياراتك النفسية.. العالم عاوزك تخلصها مع نفسك في الخبائث وتطلع له بنسختك الحلوة اللي بتضحك عشان ما حدش فاضي يسمع أو يتفهم!

المشكلة في التنفيذ

(معرفة القرار الصحيح لا تعني القدرة على اتخاذة).

غازي عبد الرحمن القصبي

فيه مقالة بعنوان The Stress of Making the Right Choice يقول Nick Hobson: ان في فرق كبير بين ان واحد يوصل للقرار الصح وبين انه يقدر ينفذه، دا ساعات بتكون المشكلة مش إننا مش عارفين القرار الصح، لا دا احنا عارفيته ومتاكدin تماماً ان ما فيش قرار غيره ينفع! ومع كدا مش قادرin ننفذه.. والسبب ان في معظم الوقت القرارات الصح بتكون مصحوبة بحالة من التوتر والقلق.. القرارات الصح رخمة ومش مستحبة! فمش معنى ان هو دا القرار الصح انه لازم يبقى مريح وسعيد، او انه يخلي الإنسان حاسس بمفعوله الإيجابي بعد القرار على طول! فيمكن لو الإنسان وصل للقناعة دي واستوعبها، هيقدر يتعامل مع حالة التعب والألم المصحوبة للقرار الصح وما يهرب منها أو يتتجنبها.

في جملة بتقول:

it's ok to be sad after making the right decision.

من الطبيعي انك تبقى حزين بعد اتخاذك القرار المناسب.

فعادي جداً جداً إن الإنسان بعد أي قرار مناسب يحس بمشاعر لخبطة أو إن عواطفه توهّمه إنه اتسرع وهيندم بعدين!، عادي جداً إن الإنسان بعد أي قرار مناسب يحس إن لا مش هو دا القرار الصح وكان فيه حل تاني أبسط وأسلم من كذا! عادي جداً إن الإنسان يحزن أو يتآلم بعد القرار اللي واخده ضد غريزته وتعلقه! دا بالعكس في الأغلب لو ما حسّش بصدمة الفرملة اللي توقفه على الطريق الغلط اللي كان ماشي فيه بقى له كتير، يبقى هو لسا مكمّل في الطريق بس بيخدع نفسه إنه مش واخد باله!

كله بيغلط، بس مش كله بيتعلم من غلطه

«ما فيش حد ما بيغلطش».. من أهم المفاهيم اللي لازم توصل لكل واحد فينا وتكون عنصر أساسى في حواره مع ذاته.. طبعاً مش عشان تبقى مبرر لتكرار الغلط، إنما عشان تكون ضامن لخروج الإنسان من دائرة جلد الذات وتأنيبها بشكل قهري أو انتقامي!

فمأساة الإنسان الضعيف اللي بيتحصر في غلطاته القديمة! يفضل يعید في تفاصيلها ويوبخ نفسه إنه إزاى ما عملش كذا مكان كذا؟! يألف مبررات وتفسيرات مزيفة عشان يمحى الغلط دا عن نفسه... يكرر المشهد في دماغه فوق المليار مرة، متخيّل إن يمكن في مرة يلاقي سيناريو يطلع فيه صح! والحقيقة إن مش مطلوب منه إنه يبقى صح.. إنما المطلوب منه الأكتر من مجرد الاعتراف بالغلطات.. وهو الامتنان لها!

فأهم خطوة في التصالح مع الذات هي إن الإنسان يكون ممتن لإخفاقاته وأخطائه.. آه أنا غلطت، بس شاكر للغلطة دي! أصل الغلطة دي أنا.. الغلطة دي حقيقتي.. حقيقتي اللي طلت للنور وكشفت لي نفسها تحت الاختبار.. نقلتني لمستوىوعي أعلى.. خلتنى أعرف عيب موجود فيها هاشتغل عليه.. ساعدتنى أني أطمح أبقى حد أفضل ما يعيده الحاجة اللي ضايقته دي تاني.. بدل ما كانت تفضل في الضلعة بتكبر جواي وتطلع في ظرف أصعب أو شكل أعنف.

فتعامل الإنسان مع أخطائه أو ماضيه عموماً مؤشر مهم في نضوجه النفسي.. يا إما يتحبس في دائرة الإنكار المفرغة في مقابل وهم التعالي والأندا.. أو يعدي ويتجاوز بالاعتراف وتقدير ضعفاته الإنسانية في مقابل إدراك صورة ذاتية أشمل وواقع أعمق.


fix the relationship you have with yourself first.

فعلى قد ما هو صعب جداً، هو أساسى لاستكمال الحياة.. (التصالح مع الماضي).. ما حدش فيينا ما خدش قرارات غبية، أو كان له غلطات في حياته قبل كدا.. اللي فوت فرصة عمره.. اللي غلط في حق حد عزيز عليه وخسره.. اللي كان عنيد وراكب دماغه لغاية ما اكتشف متأخر انه خسر كثير.. كلنا بلا استثناء وقعنا في فترات حياتنا.. وكلنا بتيجي علينا لحظات نرجع نفكّر إزاى غلطنا وليه حصل كدا؟! ويمكن دي طبيعة عقل الإنسان، عشان يستفيد من أخطائه وما يكررهاش.. بس اللي بيحصل إن الإنسان بيدخل في دوامة لا نهاية من التفكير والتحليل ويتحبس في الدوامة دي «إزاى كنت غبي قوي وقتها؟»، «يا ترى لو كنت عملت

كذا كان هيبقى أحسن؟؟، وإلخ. فيبقى المخرج الوحيد هو التصالح معها.

فأخذتني الماضي دي هي اللي بتعملنا.. هي خبرتنا اللي بتشكل حياتنا الحالية..
آه خسرنا جولة ممكن ما ترجعش، بس يمكن الخسارة دي هتكسبنا جولات تانية
كثيرة.. فالحل بيكون احترام الإنسان لذاته بكل مراحلها وتقديره للإخفاقات دي..
فاللي حصل حصل، ويبقى الشافع له إنه اتعلم الدرس اللي اتحفر في شخصيته
وإداركه.. كان مؤلم، بس زي أي عملية تطور في الحياة لازم يتداخل فيها عنصر
ال الألم!

النهاية



من أعظم الـ quotes في التاريخ:

Don't ever let a person to tell you twice that he doesn't want you

ما تسمحش أبداً لأي حد في الدنيا انه يقول لك مش عاوزك مرتين!

من أصعب مشاكل الشخص المهزأ هي انه مش بيتعلم من الغلطات القديمة! زي ما يكون مصمم يعيid نفس السلوك غير الناضج مرة تانية، ومتصور انه هبيجي بتتايج مختلفة، ودا ببساطة عشان هو ما عندهوش الوعي الحقيقي بحدود نفسه.

فما فيش حاجة اسمها نتحكم في تصرفات غيرنا عشان تتماشى مع توقعاتنا! دي سذاجة! ما فيش حاجة اسمها «همّ ازاي عملوا كدا؟!» إنما اسمها «إحنا ليه انكرنا عليهم الاحتمالية دي من الأساس؟!».. فكرة التعامل مع الآخر إنه امتداد لطموحاتنا أو محقق لرغباتنا، فكرة في غاية الجهل والإجحاف! آه بتدي للإنسان شعور زائف بالاستقرار وإن كله ماشي زي ما هو عاوز، بس في الآخر هي مجرد حالة هشة من السيطرة الوهمية!

فوعي الإنسان بحدوده هو قمة درجات النضج! فالإنسان آخره الحاجات اللي يقدر يتتحكم فيها.. تصرفاته، إدراكه، توقعاته! إنما محاولته للتحكم في أي حاجة براه، بيدفع تمثيلها إحباط وخيبة أمل.

البجح والمكسوف

الأسطورة بتقول: (يعيش البجح على قفا المكسوف!).

في مقالة بعنوان:

Are You a People-Pleaser at Your Own Expense?

يعني (هل انت شخص بتبسيط الناس على حساب نفسك?).

تحكي الكاتبة Nancy Colier عن قصة بنت اسمها Petra نزلت تقابل واحدة صاحبتها عشان تتكلم معها.. لما قابلتها في الكافيه كانت صاحبتها لابسة ماسك، بس أول ما قعدوا على الترابيزة قلعته! Petra كانت مش مستريحة من الحركة دي، وفضلت طول القعدة فيه صوت جواها يقول لها: «قولي لصاحبتك تلبس الماسك! هييجي لنا كورونا!» بس Petra ما عملتش كدا، وكملت النقاشه وهي في قمة التوتر، لغاية ما روحـت البيت وفضلت تأبـن نفسها انها كانت جبانة وما عندهاش الشجاعة انها تقول اللي جواها! بحجة انها ما رضتش تجرح صاحبتها!

- أيوه، إنت يا اللي بتتكلـف تطالب بالجنيه الباقي ليك في الميكروباـص..
- إنت يا اللي بتدفعـي تمن حاجة مرتبـين! عشـان محرـجة تطـليـبي تفسـير مفصـل عن السـعر..
- إنت يا اللي بتـكبر دماغـك لما حد يضايقـك في الشـغل عـشـان ما تـبانـش رـخم وبـتقـفـش..
- إنت يا اللي بتـكمـلي في ظـروف مش منـاسـبة لك أو مش مـريـحاـك عـشـان بـس ما تـزـغـليـش حد!
- انتـم يا جـمـاعـة الـPeople-Pleaser، الأـسـتـاذـة Nancy Colier بتـقول لكم إنـ اللي بـتعـملـوه دـا ما اسمـهـوش شـيـاكـة أو أدـب أو اـحـترـام للـعـيش والـملـح أو أيـ حاجة منـ الحاجـات اللي بتـكـدبـوا بـيـها عـشـان تـسـكـنـوا، الأـصـوـات اللي بتـنـزـلـ فـيـكم غـسيـل ومـكـوـة قبلـ النـوم بالـلـيل! إنـما دـي اسمـها قـلة قـيمـة!
(إنـ أـظـلـمـ النـاسـ لـنـفـسـهـ هـنـ زـغـبـ فيـ مـؤـذـةـ هـنـ لـأـدـاعـيـ حـقـةـ).

الإمام الشافعي

فـما فيـش قـوـةـ عـلـى الـأـرـضـ تـخـلـيـ الإـنـسـانـ يـيـجيـ عـلـى نـفـسـهـ وـيـعـيـشـ فـيـ نـدـمـ وـتـوـتـرـ عـشـانـ يـرـضـيـ صـورـةـ خـيـالـيـةـ خـرـافـيـةـ فـيـ دـمـاغـهـ! ما فيـشـ إـنـسـانـ فـيـ الكـونـ -مهـماـ كانـ- لـهـ الـحـقـ إنـهـ يـسـلـبـ سـلـامـكـ وـثـقـتكـ فـيـ ذـاتـكـ! إنـماـ أـولـ وأـهـمـ حدـ لـازـمـ تـفـكـرـ فـيـ اـحـتـياـجـاتـهـ هـوـ نـفـسـكـ! ليـهـ Petra تـرـجـعـ بـيـتهاـ قـرـفـانـةـ منـ نـفـسـهاـ عـشـانـ ماـ دـافـعـتـشـ عـنـ حـقـهاـ إـنـهاـ تـبـقـيـ فـيـ أـمـانـ؟! ليـهـ إـنـسـانـ عـمـومـاـ يـعـيـشـ فـيـ

صراع و خجل لمجرد انه فكر يحمي حدوده و كيانه؟!
فالعالم مليء بالانطاع والسناتيج.. فلا تكن أرض خصبة لنطاعتكم أو سنتحتمهم..
إنما قاوم، وبعنف!

جلد الذات

في ناس بيجدوا ذاتهم على حاجات عبيطة! زي مثلاً: ينزلوا صورة على السوشيال ميديا وتجي لهم تعليقات مش على هواهم، يقعدوا وقت طويل في صراع إن ازاي عملوا حاجة زي كدا! أو مثلاً يكون في مشاكل بينهم وبين حد معين، فيقرروا انهم يتصلوا بالحد دا عشان يحلوا المشكلة، فلما ما يردهش يعملوا مناحة كبيرة! انهم إزاي بالسذاجة اللي تخليلهم يعملوا كدا؟ أو مثلاً يكونوا بيتناقشو مع حد، فيقولوا حاجة على سبيل الهزار ما توصلش للشخص دا بالشكل اللي في دماغهم، فيفضلوا طول الليل يتسللوا إنهم إزاي يقولوا الكلام دا، وكان فين عقلهم لما عملوا كدا؟ وأفلام كتيرة صعبة!

ففي ناس بتعاقب نفسها بشدة وعنف على حاجات ما تستاهلش كل دا! حياتهم بتتشل عشان موقف عابر أو كلمة ما كانتش في محلها.. فالطبيعي إن حتى ولو اقتنعوا إن حصل غلط أو تسرع أو قلة حكمة في التصرف، يقرّوا بغلطهم ويعتذروا.. بس الحياة بتسافر إنما الكارثة إن إدراكم المغلوط بيصور لهم إن عدم جلدتهم القاسي لذاتهم بيخلّي منهم شخصيات شريرة أو حلاليف مش بتحس! مع إن الشخصيات الشريرة والحاليف فعلًا مش هيوصلوا أصلًا لخطوة إنهم يعترفوا انهم غلطوا!

في النهاية الكاتبة Marya Hornbacher ليها جملة بتقول:

you like the pain because you think you deserve it.

(أنت تحب الألم لأنك تعتقد أنك تستحقه!).

في بداية كسر لعنة جلد الذات المرضي، هي إن الإنسان يستوعب فعلًا إنه ما يستحق كل اللي بيعمله في نفسه دا! عشان إيه يفضل عايش في قرف تعذيب نفسه بأفكار احتقار الذات والتقليل من قيمته؟! هيستفيد إيه لما يدمر كل حاجة فيه بحجة انه مش عاجبه نفسه وعاوزها تبقى أحسن؟! ضغط وتوتر وشعور عميق بالعار! كل دا بيقلل من ثقة الإنسان في نفسه ويخلّيه شخصية عاجزة ومتخاذلة! إنما احتواوه لنقطات ضعفه الإنسانية والشغل بوعي على تصليح عيوبه.. إيمانه بإنه كان ناضج يستحق معاملة أفضل وأجدر بالاحترام... إدراكه الحكيم السوي إن مش كل جريمة عقوبتها الموت! هو دا اللي هيتطور من شخصيته وأفكاره.. هو دا اللي هيخلّيه يعز نفسه.. وينقذه من شيطان جلد الذات!

نقاوۃ النہایات

«كيف تعود غريبًا مع من رأى روحك؟».

زياد الحوراني

من الثقافات اللي للأسف ما اتربيناش عليها: ثقافة النهايات.

فامتنى نقر إن خلاص هي دي النهاية؟.. إزاي نتعامل وقت النهايات؟! سلوكنا، شخصيتنا، قراراتنا، كل اللي يخص الإنسان الجديد في ما بعد النهايات؟! كل دا ضمن ثقافة النهايات، والنهايات مش بس العلاقات العاطفية، إنما كل مراحل حياتك هي نهايات بتسلم بعض.. سواء في شغلك وتقديرك الوظيفي.. أو حتى بين أصحاب عمرك اللي بيروحوا ويبيجوا عليك في مسيرتك على الأرض.. ويبقى أول خطوة لاستيعاب ثقافة النهايات هو اعتراف الإنسان بحتميتها وضرورتها.. أو زي ما قال العظيم J.R.R. Tolkien:

:J.R.R. Tolkien قال العظيم ما

You move on when your heart finally understands that there is no turning back.

الإنسان بيتجاوز لما قلبه يدرك أخيراً إن ما فيش طريق تاني للرجوع!

فأي نهاية في الحياة بتبدأ بوقفة! وقفه صادقة من الإنسان يعترف فيها إن خلاص الموضوع وصل لآخره.. إن خلاص لازم نقول الباب دا عشان نشوف باب غيره! إن ما فيش مجال لمسميات وهمية يصبر فيها نفسه، أو إمكانية لفرص وهمية يكذب فيها على حاله! إن احترامه لنفسه ووقته ومزاجه أغلى بكثير من إنه يبددهم على حلقات فارغة من الضياع والفشل.. إنه ما ينفعش يضحي بيكره ببنائه عشان يتحبس في امبارح بتاع غيره! أو زى ما بيتفاقل:

End things before they end you

إنهي الأشياء قبل ما تنهيك!

فانت هتعود غريب مع من رأى روحك عشان انت بتنقذ روحك! فال فكرة مش شخص رأى روحك، إنما شخص مستعد يحافظ عليها! شخص شاف خطوة كشف لروحك خطوة كبيرة جداً انت قمت بيها عشان واثق ومصدق فيه! مش شخص رابطك ومستغلك بطوق انه شاف روحك؟! فلو كان في خطأ بسيط إن الإنسان ما اختارش الشخص صح اللي يكشف له روحه، ففي خطأ أفظع وأشنع لو استمر مع شخص مش بيقدر روحه دي! كارثة لو ما أدركتش إن دي عالمة واضحة بالنهاية!

فالأسف، غياب تقافة النهايات بتخلّي الإنسان ما يستوعب عظمتها، بتخلّيه حاسس بذنب كبير تجاه الإقرار بيها.. بتخلّيه يتغافل عن مدى عبقيتها في منحه

فرصة تانية ممكن تبقى أفضل وأجمل! فرصة للتحرر من استنتاجات عقيمة أو
قناعات متخلفة!

فالعالم بيحاول يصور للإنسان إن الشجاعة دايماً في الاستمرارية والإصرار، وانه
لازم يكمل لآخر الطريق!

مع إن ساعات الشجاعة بتبقى إن الإنسان يقدر يوقف عكس التيار عشان يعيده
ترتيب أفكاره.. يقدر يعتزل دوشة البشر عشان يواجه نفسه بالحقيقة اللي مش
متعود يسمعها.. يقدر يتراجع عن قرارات غلط بناها على عاطفة انفعالية أو إدراك
متسرع!

ساعات بتبقى الشجاعة الحقيقية في خروج الإنسان عن طريق عاش عمره كله
مش شايف غيره ومش قادر يتخيل نفسه بزاه، مع إنه كان في كل لحظة بيأخذ من
طاقته ويسحب من كيانه!

ساعات الشجاعة بتبقى في اليأس من طرق مش بتاعتنا! أو الخيانة لظروف
بتدينا أقل مما نستحق!

فياما كتير محبوسين في خرافية شرف الاستمرارية ووهم الصمود، مكمليين
وبيعandوا في طرق بتاكل في روحهم وأحلامهم.. عشان مفتقدين للشجاعة..
شجاعة الانسحاب!

أو زي ما بيقال:

(لا تُقاتل في كل مرّة من أجل إنقاذ شعور، تعلم الوداع).

كن بغيضاً

أصحابك بيقولوا لك عاوزين يخرجوا بس انت ما عندكش طاقة ولا مزاج للخروج، فبتعتذر لهم بأدب، فواحد منهم بيقول لك «إنت ليه معقد كدا يا عم؟!».

في فرح صاحبكم بعد أول ساعة حسيت انك مش قادرة تكملي من الدوشة والزحمة فبتستأذني، فواحدة من صاحباتك بتقول لك: «ما تكملي الفرح للأخر، هو انت ليه رخمة كدا؟».

إميل سيوران في (المياه كلها بلون الغرق) بيقول:
(لا يستطيع أحد أن يحرس عزلته إذا لم يعرف كيف يكون بغيضاً).

آه بغيض، معقد، عندك مشاكل وكل الصفات السلبية اللي ممكن تسمعها في حياتك.. دي الضريبة اللي بتدفعها نتيجة انك بتقرر تبقى نفسك.. فالمجتمع غير مؤهل لتقبل الذاتية.. بيختلف منها وبيتوتر من وجودها.. يعني إيه تكسر نسق القطيع باختيار يناهضه أو يتبني على رفضه؟! إنت فاكر نفسك مين؟! إنت أكيد مش طبيعي وتستحق إنك تتزيل.. إنك تتوصم وتتهاجم! ولو ما عرفتش تصد الهجوم دا بتأكيدك على وجهة نظرهم انك معقد وبغيض فعلاً، ونجحوا انهم يسللوك دوامة التبريرات والدفاع عن قناعاتك واختيارك! هتلافقك مع الوقت بتفقد نفسك تدريجياً، بتتجزئ ناحية سلوكيات مش انت خالص، واختيارات مش نابعة منك أساساً.. فالحل عمره ما كان تحسين صورتك بالأنسياق لهم.. إنما بالتأكيد على اختياراتك الشخصية وعدم الخجل منها.

في مقالة بعنوان The Neuroscience of Rejection بتقول الدكتورة Susan Krauss إن البشر عموماً متبرمجين على الشعور بالخطر والتوتر في حالة إحساسهم بمشاعر الرفض أو عدم القبول الاجتماعي.. فالإنسان مش بيحب يبقى مرفوض، سواء مرفوض عاطفياً، مهنياً أو حتى مرفوض افتراضياً على موقع السوشيال ميديا! فهو كائن بيستمد سلامه وأمانه من فكرة قبول وجوده وسط الناس.. وعشان كدا ساعات كثيرة بيختار يضحى ب حاجات جوهيرية في أحلامه وقناعاته مقابل إنه ما يخسرش القبول الاجتماعي دا، بس للأسف ساعات نضوج الإنسان وتطوره بيحتم عليه تعلم الخسارة دي.

فيه جملة بتقول:

learn to be ok with not being invited, included or considered

(تعلم تمام مع فكرة انك مش مدعو أو محظوظ في الاعتبار).

فالإنسان عشان ما يبقاش تحت رحمة الآخرين في إنقاذه من فكرة الرفض، لازم

يبقى من أعمق نفسه مش مرغوب من فكرة إنه يبقى لوحده أو إنه يتقال عليه أي حاجة سلبية لمجرد انه قرر يعمل اللي مقتنع به! لازم لا ego بتاعه ما يبقاش جعان لكلام المدح والتملق الاجتماعي! لازم يبقى مصدق إنه كائن صاحب كيان محترم مش مستني حاجة من برا تزوده أو تقلله.. فعشان ما يبقاش خايف من رفض الناس له، هو من الأساس لازم يبقى مش رافض نفسه أو حاسس تجاهها بالخجل أو الانتقاد!

في النهاية فيه جملة عقريبة بتقول:

forget what you feel, remember what you deserve

(انسى أي مشاعر انت بتحسها، سواء بقى وحدة أو عزلة أو حتى نفور! وافتكر دايماً انت تستحق ايه؟! غالباً هتللاقي نفسك تستحق أكثر بكثير من اللي انت حاطط نفسك فيه!).

فن التجاهل

«فن المعرفة: هو أن تعرف ما يجب عليك تجاهله».

جلال الدين الرومي

فيه مذهب فلسي اسمه الـ Minimalism (التقليلية) واللي اتبنت عليه توجهات كثيرة، زي توجه فني بنفس الاسم برضو واللي بيهدف إن قوة العمل الفني نابعة انه يكون بسيط وما فيهوش حشو كبير، وفيه توجه سلوكي اسمه الـ minimalist lifestyle بيقول إن سعادة الإنسان وسلامه النفسي بيكون راجع لبساطة أسلوب حياته، دا اللي بيخليله حر أكثر وعقله صافي.

في دراسة تبع جامعة Cornell بعنوان 200 Daily Food Decisions We Overlook في دراسة تبع جامعة Cornell بعنوان 200 Daily Food Decisions We Overlook قرار يومياً بخصوص الأكل بس! يعني «يا ترى ناكل دلوقت ولا نستنى؟»، «ناكل كذا ولا كذا؟»، «طب ناكل كذا محمر ولا مسلوق؟» إلخ... واللي طبعاً لو فكرنا نحسب كم قرار ممكن ياخده الإنسان يومياً هنلاقي الرقم بالألاف!

فيه كلام بس مش لاقى له مصدر محترم بيقول إن الإنسان بيأخذ حوالي ٣٥ ألف قرار في اليوم! ودا الحقيقة كلام مش منطقى، يعني بمعدل قرار كل ثانيتين لو الشخص هيئنام ٦ ساعات في اليوم!

المهم الإنسان بيفكر كثير وبيأخذ قرارات كثيرة جداً في اليوم من غير ما يركز، ومن كثر ما هي قرارات بسيطة ومش محورية، بيتعامل معها أنها حاجة عادية ومش مهمة زي:

«المنبه بيبرن أقوم دلوقت ولا أستنى ٥ دقائق؟»، «أغسل أسنانى الأول ولا ألبس؟»، «طب هالبس إيه؟»، «أكلم أصحابي دلوقت ولا لما انزل الشارع؟»، «أروح الشغل بالعربية ولا اركب أوبر»، «طب لما اروح الشغل هاركن فين؟»، «طب هاطلب معاهم دليفري ولا آخذ أكل من البيت»... إلخ! (ممكن بس يكون الكم قرار دول في أول نص ساعة في يومك! تخيل على مدار طول اليوم!).

كل دا بيوصل لظاهرة اسمها decision fatigue (إرهاق القرارات) حاجة كدا زي الشد العضلي بتاع عضلات جسمك، بس في عقلك.. بتوصل لمرحلة إنك خلاص! مش قادر تفكري ثاني! توصل لمرحلة الـ (أي حاجة)! تخرج معاناً؟ أي حاجة.. عاوز تأكل؟ أي حاجة.. حتى على مستوى مشاعرك ونفسیتك، مش قادر تقرر حتى حالتك إيه؟! مبسوط ولا متضايق؟! مش قادر أحد.. أي حاجة!

فالـ decision fatigue بيخليل الشخص حرفياً زي متسابق في بطولة جري جه في آخر السباق ووقع في الأرض من التعب وعمال ينهج، بس المختلف إن على

مستوى القرارات الذهنية والنفسية انت مش جسمك اللي في سباق، إنما عقلك!
في بيان من برا إن يومك كان هادي جداً وروتيني، بس انت واقع من كتر التفكير،
مش قادر تكفل، بتنهج! فالحل إنك ما ترهقش نفسك في قرارات كثيرة ما لهاش
لازمة.

يقال مثلاً إن (مارك زوكربيرج) مؤسس الفيس البوك و(ستيف جوبز) مؤسس
شركة آبل وغيرهم من مشاهير التكنولوجيا والسياسة بيلبسوا نفس الطقم هو هو
عشان يقللوا على عقلهم عباء التدوير على لبس جديد، فعقلهم عنده قرارات تانية
أهم من انهم يقعدوا يفكروا ويتسحلوا في «الطقم دا اتصورنا بيها قبل كدا، فنلبس
إيه النهار دا؟!».

طبعاً في وجود كم المعطيات على عقلنا من خلال السوشيال ميديا والأخبار
العالمية وحكايات أصحابنا، زاد موضوع الـ *decision fatigue*.. «يا ترى ندوس
لایك ولا بلاش؟»، «نقول رأينا ولا نسكت؟»، «طب رأينا يبقى إيه؟! نشتتم مع اللي
بيشتموا ولا نسفف مع اللي بيسفدوا؟». مع سرعة العالم وتتوحش سلوك الإنسان
الاستهلاكي، بقى الإنسان ضحية كمية قرارات تافهة ممكّن بسهولة يتتجنبها! ويريح
دماغه، بس العالم بيصور له إنه لازم يبقى له قرار ورأي في كل حاجة!

في النهاية، حقيقي البقاء للأذكي.. والذكي هو اللي بيعرف يحدد طاقته وعقله
رايحين فين.. مش بيسحل نفسه في فرعيات كثيرة ما لهاش لازمة وبيجي
في نهاية اليوم تعبان وفاضي نفسياً لا! إنما حتى ولو الحياة مليانة تعقيدات
وتفاصيل، مش لازم الإنسان يبقى جزء من التعقيدات دي! مش لازم يبقى شريك
مؤثر برأيه أو حتى اهتمامه في كل تفصيلة تعيدي تحت إيمده.. ساعات الحكم
بتبقى في التجاهل.. في التغاضي.. في الـ *Minimalism*.

التكرار بيستنزف الشطار

فيه جملة عظيمة بتقول:

We repeat what we don't repair..

(إحنا بنكرر اللي مش بنصلحة.)

«يارا» بنت رقيقة جداً، بس كل ما تتعرف على عميل جديد في الشركة تقدم نفسها بأسلوب عفوي مفتقن لأي مظهر احترافي، طبعاً العميل بيحس بعدم مهنية وما يكملش الاتفاق معها! فيارا تزعل، تحبط، تحس إنها إنسانة فاشلة.. المفاجأة، إن مع كل مرة يارا بتتمر بالمشاعر السلبية دي، فيه إدراكات جديدة بتخشن عقلها.. فبتفضل تغلط وتغلط لغاية ما العيوب اللي عندها تتصلح.

فيه مقالة بعنوان **How We Make the Same Mistakes Over and Over** بيقول الدكتور Steven Stosny إن العقل البشري مصمم انه بيتعلم بطريقة الصواب والخطأ، مش زي ما أغلب الناس متخيلاً إنه بيتعلم بالتحليل والتفكير المنطقي! فتغير أي سلوك معتمد بشكل أساسي على المشاعر السلبية التالية لأي حاجة غلط بتحصل، ودا بالظبط اللي بيحصل في النضج العاطفي أو الاجتماعي!

المشكلة إن ساعات الإنسان بيتصور مع الإخفاقات الكثيرة إن ما فيش أمل، أو من كتر ما هو محشور في نظرته الضيقة بتاعة الألم الحالي بيعتقد ان الحل هو بعد عن أي حاجة تعمل له توتر أو قلق.. فيربى جواه خوف من أي تجربة، يهرب من أي مواجهة ممكن تخليه يغلط، واللي طبعاً دايماً بتكون فكرة غبية بتخلية واقف مكانه، أو زي ما بيتفاول:

If you hide from all storms, how will you grow?

(إن كنت تختبئ من كل العواصف، فكيف ستتنفس؟).

فالموضوع يحتاج وعي حقيقي وقناعة قوية.. إن مهما كانت عملية التغيير عملية مؤلمة، مهما كانت عملية النمو عملية صعبة! فاللي أصعب وأكثر ألفاً، إن الإنسان يفضل في وضع مايليقش بيه أو يتجرأ على حلم مش حلمه! أو زي ما بيتفاول:

The pain of self disciplining is much better than the pain of regret.

(الم تهذيب النفس أفضل بكثير من ألم الندم)

الألم والمقاومة

من أعظم المعادلات النفسية:

suffering = pain x resistance

المعاناة = الألم X المقاومة

فيه فرق مهم جدًا بين «ال الألم» و«المعاناة» واللي بيحدد هو مدى مقاومة الألم، وكل ما الإنسان قاوم ألمه بشكل أعنف زادت معاناته، مثلاً:

- كريم أعجب بنوران، بس نوران ما بادلتوش نفس الإعجاب.. فحس بألم الرفض واللي اتضخم جواه واتحول لمعاناة عشان هو رافض يتقبل الحقيقة المؤلمة دي، عايش في إنكار إن إزاي ego بتاعه يترفض، مصدوم وعمال يلف في دائرة مفرغة من الوهم! فمعاناته قايمة على مقاومته للألم!

- شروق شكل مناخيرها مش عاجبها، كل ما تتصور وتشوف شكلها تحس بألم الخجل والعار من جسمها! واللي بيتضخم معاه لمعاناة عشان هي مصممة مقاوم الألم دا! يعني مش كفاية أنها متضايقة من حاجة ما لهاش ذنب فيها! لا دي كمان بتتعاقب نفسها على وجودها بالرفض الانتقامي الأهوج!

وأمثلة كتيرة بتأكد على إن من الغباء مقاومة الألم.. أو على رأي Leslie Becker في مقالتها Accept Your Pain; It Will Hurt Less تقبل الألم!

(...نعم هو موجود في كل مكان وزمان، يعرفه الجميع واختبروا وجوده جيداً، كلامي ليس عن الله، بل عن الألم).

نيتشه.

قبل الألم مش سلبية ولا حالة انهزمية، إنما هو بداية الخلاص! كسر لحلقة الصراع الأزلي بين الإنسان نفسه مع الألم! فالطفل اللي عمال يصرخ ويضرب الأرض عشان لعبته وقعت منه عمره ما هيعرف يركز ويلاقيها تاني غير لو بظل انفعاله الجارف دا وأخذ خطوات واعية مسؤولة! خطوات عقلانية بعيدة عن مشاعره البائسة بتاعة فقدانه للعبة! فالحكمة مش ان الإنسان يتخيّل انه هيقدر يهرب من ألمه أو يعيش حياة بدون ألم، إنما الحكمة أنه يتقبل الحياة بكل ما فيها من أوقات صعبة وقاسية، يتعامل مع لحظات ألمه بشكل ناضج رايق فيه قدر عالي من المرونة والتعايش.

اطلع بزا دماغك

(ينبع شقاء الإنسان من شيء واحد، هو عدم استطاعته البقاء وحيداً في غرفة).
بascal.

لو ركزنا في أغلب المشاكل النفسية هنلاقي إن تمركز الإنسان حول ذاته عامل مهم في المشاكل دي:

واحد حیاته اتدمرت عشان حس للحظة انه تم استبداله!

واحدة حياتها انهارت عشان مرت بمشاعر الرفض!

واحد محبوس في حالة اكتئاب عشان اتصد في اجتماع شغل أو لحظة مهمة
في حياته!

واحدة حصلها عقدة نفسية عشان تم تهميشها وإهمالها في علاقة عاطفية!

وحالات تانية كتيرة من نفس الفكرة!

لا دا عادي جدًا، بيحصل وهيحصل!

عادي جدًا تترفض في المقابلة أو يتقلّل من تعبك.

عادی جداً جداً یتقال لك: «سوري مش بافکر فيك!» أو «انت زى اختي!».

عادي جدًا جدًا يتقابل لك: «لا»، وبكل وضوح وصراحة! من غير تذويق أو اعتبار لتأثير الـ«لا» دي عليك أو على نفسيتك!

هي دي الدنيا! ولو كل مرة الإنسان اتوتر واتشنج عشان ego بتاعه اتجرح!
يبقى لسا عيل صغير! هيفضل في سلاسل لا متناهية من البهدلة والتشنجات
والأوهام الوردية!

(إذا شعرت بالحاجة إلى يد دافئة فأمسك بيديك الأخرى، فلن يهزم شخص يومن بنفسه).

جبران خلیل جبران.

فما فيش أي إلزام كوني على أي حد إنه بيص لنا بشكل مميز أو خاص! فبعيد عن الصراعات والقناعات والتخيلات وال حاجات الكثيرة اللي جوانا! بعيد عن كل المشاعر والإدراكات العميقه اللي عايشهة فيينا.. بعيد عن جوهernا ومعرفتنا الحقيقة بنفسنا.. إحنا بالنسبة للأخر ممكن نكون مجرد أجسام مادية بتشكل جزء من الفراغ! ويبيقى على رأي «ساراما جو»:

(يتبغي عليك أحياناً أن تتكيف مع حقيقة أنك لا تشكل أهمية عظمى لأحد).
ففي النهاية، ما تتصدمش لما حد يهمك يغيب عنك أو يقعد فترة ما يسألش

عليك، إنما تغيير الشخص لأولوياته أمر طبيعي ومقبول، فكل واحد بيتعامل معاك حسب أهميتك عنده مش أهميته عندك. وقمة السذاجة والبراءة السخيفة إنك ما تكونش عارف الموضوع دا! اللي بيتطلب ساعتها نوع عالي من النضج في رد الفعل مش شغل الأطفال والعيال الصغيرة بتاع الكراهية العامية والانتقام الانفعالي! اللي هو ما بقاش يسأل فعلى طول يبقى شخصية قذرة وندلة وحقرة وما يستحقش إني اتكلم أو اتعامل معاه تاني! لا أبداً.. أبسليوتلي.. خلي عندك شوية ثقة بالنفس واعتزاز حقيقي بقيمتك.. تعامل مع أي إنسان ما يقدرش وجودك في حياته بحالة من اللا مبالاة الهادية.. بكل تقل وشياكة تعامل معاه لو جات مناسبة وخرج برا الدايرة الضيقة بتاعة بحر الغدر.. عشان ما حدش بيفرق فيها وفي دوشتها والـ overthinking بتاعها غيرك! فتكيف مع الحقيقة دي بمزاجك، بدل ما العالم هيكيفك عليها غصب عنك.

أنت تستحق الطمأنينة

«تبدأ الرحلة الداخلية فقط، عندما تفهم بشكل واضح أن لا شيء في الخارج سوف يمنحك الطمأنينة!».

أوشو

فيه مقالة بعنوان Anticipating Pain Is Worse Than Feeling It (توقع الألم أسوأ من الشعور به!), بيقول الدكتور Giles Story: انه اتجاب مجموعة من الأشخاص وخيروهم: تحبوا تتلسعوا لسعة كهربائية متوسطة وتكون دلوقت، ولا تستنوا تتلسعوا لسعة كهربائية صغيرة بس بعد ربع ساعة؟! المفاجاة إن أغلب المشاركين في التجربة اختاروا اللسعة المتوسطة اللي دلوقت بدل اللسعة الصغيرة اللي بعد ربع ساعة! فتوقع الألم أصعب على الإنسان من الألم نفسه، وخصوصا انه بيضيف على الألم شق مهم تاني اسمه الـ قلق! القلق من الألم!

في جملة مهمة جدا بتقول:

stop worrying about things you can't control!

(توقف عن القلق من الأشياء التي لا تستطيع التحكم بها!).

الكاتبة Amy Morin بتقول ان من أكبر المشاكل اللي بتخليل الإنسان يعيش في قلق مستمر. Overthinking هو انه بيتوتر وبيقلق من حاجات ما لوش أي سيطرة عليها! فقبل ما يتوتر ويتسحل في التفكير اللي ما لوش لازمة، يسأل نفسه: هل أنا فعلاً أقدر أعمل حاجة في الموضوع دا؟! وبتبقى نصيحتها الذهبية عشان الإنسان يخفف من حدة القلق في حياته هي:

Determine what you can control.

(حدد اللي تقدر تتحكم فيه!).

وفي النهاية، مشكلتنا الأساسية اننا بن Shirley عباء مش بتاعنا! فبدل ما الإنسان بيبيقى مهتم بسلوكه أو شخصه، مهتم يحسن من نفسه أو يشتغل على حاله.. لا دا بقى مهووس بردود أفعال الآخرين وعايش على أعصابه عشان ظروف وحيثيات برا عنه! فبقى القلق مش عشان اشتغلت كوييس ولا لأن؟! إنما المدير هيقدر شغلي دا ولا لأن مش عشان أنا صادق في مشاعري ولا لأن؟! إنما عشان الطرف الثاني هيفهم مشاعري ويتواجب معاهها ولا لأن؟! فبقى الإنسان يتوتر على حاجات ما لوش أي سيطرة عليها! توتر لا إراديا! ودا اللي بيذود من حجم ألمه ومعاناته! وخصوصا انه بيحبس نفسه في انتظار حاجة ما لوش أي سيطرة عليها! فهو دا الجحيم بعينه!

كلمة الكاتب

آه الكتاب خلص، بس المدخل الحقيقي لفهم سيكولوجية الإنسان المهزأ لسا ما خلصش، دا يمكن يكون بالنسبة اللي قرا الكتاب لسا هيبدأ.. فكل اللي أنا حاولت أعمله في الكتاب اني افتح مواضيع مهمة كانت غایية عن عقول بعض الناس، مواضيع اتشوهرت بالأفكار التقليدية، أو اتحرفت عشان المجتمع مشجع ومستفيد لوجود الإنسان المهزأ.. فالإنسان المهزأ يعتبر غنية لمجتمع القهر وعقد النقص! فهو فرد دايما حاسس إن الغلط فيه، دايما مش قادر يعبر عن رفضه أو يطالب بحقه، دايما خجلان من نفسه وراضي بأقل من اللي يستحقه!

فمافيش عيب خالص إن إنسان يكون عنده مشاكل في شخصيته.. مش عيب إن التربية المتخلفة أو المفاهيم السطحية تخلي من الإنسان شخص ساذج مهزأ! مش قادر يطالب بحقه أو يعلن عن وجوده بحزم ووضوح.. لكن العيب الحقيقي انه يفضل على حاله بدون أي محاولة منه لتغيير الوضع.. فعندينا العاشق المهزأ والمواطن المهزأ والأب والأم المهزئين.. أنا -عن نفسي- كنت ضحية الأفكار المهزأة في فترة من فترات حياتي، دفعت تمنها من عمري وطاقتني.. واتعلمت أقاوم الأفكار دي بصعوبة ومرارا! زي ما تكون بتحاول تشيل شجرة بقالها كذا سنة من مكانها.. أكيد جذورها المتشعبه مش هتطلع بسهولة.. دا بالعكس بتطلع بأجزاء عزيزة قوي فيك!

فسواء إنت كنت حاسس إنك ضحية الأفكار المهزأة دي، أو فيه حد يهمك بيعاني منها.. حقيقي الفرصة دايما موجودة لكل إنسان مستعد انه يدافع بشراسة وقوة عن حقه في حياة أفضل وأكرم، وفي النهاية.. معركتنا الحقيقة ضد نزواتنا.. ضد أفكارنا الشخصية الرخوة... ضد نظرتنا المهيأة لذاتنا بضآللة ومسكنة!

عشان تبقى أصعب المعارك
وأعنفها هي اللي العدو فيها نفسك!

تقى

ناس حابب أشكرهم

• بيتي الأول، الدمرداش.. وخصوصاً مشفى الجراحة ووحدتي ١٠ جراحة (وحدة جراحات الثدي).. لو قلت واحد واحد أكيد هانسى ناس في النص، بس من أكبر أستاذ لأصغر عامل، أفضالهم على وما اقدرش أنساها.. المجد كل المجد لرجال ظل الدمرداش.

• بيتي الثاني مستشفى الشرطة.. وخصوصاً الأب الروحي د. أيمن جوهر، والأخ الأكبر الروحي د. ماجد عبد الله، ورجاله الجراحة كلهم حيدر ووجدي ومهند وحمدي ومصري ويوسف وظواهري وأبو عرب وديزل وسليم - هو آه مش جراحة بس قشطة بييجي يقعد معانا كدا- وفتحي هو مسالك بس ياما استغليت الهارد بتاعه وأخذت عليه أفلام.

• بيتي الثاني مكفر المستشفى الإيطالي.. القائد د. نبيل صابر ود. شريف سمير ود. عادل فاخوري وهاني الفنان وجو وأندرو وجورج ومهند ومايكل بهاء.. ورجاله العضم، غازي وبير وجمعة ود. عويس ود. سارة هي باطنة بس أختي الكبيرة.. وطبعاً ملايكة الرحمة، بسام ومريم وأمير ورمضان وعم جميل وأوشأ وميادة وباسم وطه وكلهم (باعتذر لو نسيت حد).

• أصدقائي وآخواتي اللي راجعوا الكتاب، وكان لهم دور مهم انه يطلع بالشكل دا.

• العظيم طارق رزق.. المخضرم شادي أمير.. غصون أجمل فتيات تخدير شرق القاهرة وضواحيها..

• مارينا باسم فوزية.. سارة جورج.. سيف علاء الدين.. البرنس أمير عادل.. أطيب دكتور نفسي في مصر

• محمد سعد.. نعمة صديقة قطط الشارع.. فبرونيا الرقيقة.. إسراء تاني أروش واحدة في المنصورة عشان طنط مامتها أروش واحدة.. ملك اللي مش هتعلملي ألماني في سنتها!

• أسرتي الجميلة.. أمي الملهمة.. والدي الحنين.. وكركر الشهير بالطالب، وصاحبه جرجس اللي بيكلمه ٢٨ ساعة في الـ ٢٤ ساعة! وأكوا الشهير بكلب الطالب!

• مش عارف.. بس عاوز أشكر مارك وإدوارد وفيلا وبنوة مع إنهم ما عملوش أي حاجة.. نوح وغمر ربنا يقويك مع صفت وفيلي.. يونس عارف أنا هاعمل فيه إيه! إبراهيم وحش عيادة الثدي.. أميرة ماهر استشارية علاج الثدي بالأعشاب والليوجا.. عبدالله.. وعمار.. محمد فصيح، زهراء إسماعيل.

• المحامي الكبير قوي أدهم العبودي.. أعظم دكتور أسنان في المجرة د. أحمد

أكمل... ببيو وخطيبته.. وفليب وخطيبته.. وفادي هاني ومراته.. أرجو لكم مستقبل سعيد مع شركاء حياتكم المخلصين.

• أي حد حبني من قلبه ورجا لي الخير والسلام.. أنا مدین لك بكتير.. يكفي ان وجودك في حياتي دلالة حقيقة إن الله لسا بيحبني وفاكرني.

• ناس زي العسل عرضت تطوعها في تصميم غلاف الكتاب: إيمان محمود، يوسفينا مجدي، أيمن خالد، نبيل صالح، دميان الأمير، رامي، مريم راضي.

Telegram:@mbooks90